

清代河臣傳

吳梅書





運 航



力 水



洪 防



澆 灌




水 給

# 清代河臣傳

汪 吳  
楨 慰  
祖 祖  
楨 祖  
編 次

建設總  
署收藏  
圖書之章



第二輯

第二種

封面題簽：吳瞿安先生

833 9 / 2

中華民國二十六年二月出版  
中國水利工程學會藏版

校對者 吳慰祖

清代河臣傳卷之三

康基田



康基田字茂園，山西興縣人。乾隆二十二年進士，授江蘇新陽知縣。調昭文，爲令幾十年。遷廣東潮州通判，以獲盜功晉秩同知。累遷河南河北道，調江南淮徐道。治河有聲。五十二年擢江蘇按察使，命每年大汛赴淮徐襄河務。六月，河南睢州河溢，基田奉檄馳往堵築。次年遷江寧布政使，兼河務如故。五十四年署江南河道總督，尋回任。六月，基田防汛睢南，值周家樓河溢，上游魏家莊大壩翻陷，基田壓焉，援救得生。詔嘉其奮勉，特加恩賚。五十五年護理安徽巡撫，以高郵糧胥僞造印串，巡撫閱鷲元被嚴譴，褫基田頂戴，復以陳奏不實，革職逮問。遣戍伊犁，尋許贖罪，以南河同知用。五十六年仍授淮徐道。五十九年力守豐汛曲家莊隄，特詔褒獎。擢江蘇按察使，調山東，仍兼黃運兩河事。嘉慶六年，南河豐汛河溢，基田赴工襄治，遷布政使，命回山東，疏消漫水，撫卹災民。基田遂往來其間。次年春，豐工竣，賜花翎，擢江蘇巡撫。秋，河溢，湯山楊家壩命馳視。山東曹縣河亦溢，復命往襄同堵築。授河東河道總督，尋調南河。三年，曹工合而復墊，部議革職，詔寬免。疏言口門深逾十丈，擬就二壩前河勢灣處開引河，別築一壩，即

以舊西壩改作挑水壩。俟秋後興工。詔責其延玩。褫翎頂。尋命專任下游挑河事。九月河南睢州河復溢。水入渦濰諸河。正河斷流。大工旋合。次年春睢工亦竣。河歸故道。引河通暢。復翎頂。時有條奏治海口及復舊制混江龍者。基田疏言治河之法。首在東水攻沙。自曹工漫溢。溜或旁趨。遂致正河淤墊。因上決而下淤。非先淤而後決。今睢工曹工既竣。連年黃水漫衍。所在停沙。比至清江。會淮已成清水。海口刷滌寬三百數十丈。毋庸疏濬。混江龍助水之力甚微。不若東水攻沙。以水治水之力大而功倍。仁宗嘉納之。秋河溢邵家壩。十二月堵合。未旬日壩復墊。滲水責基田賠帑。五年正月壩工失火。積料盡焚。革職留工效力。基田馭下素嚴。督率將卒守隄。動以軍法從事。稽延者杖枷不貸。人多怨之。又官吏積弊懼揭。陰縱火以掩其跡。帝亦知基田性剛守潔。惟責其苛細。仍命隨辦要工。欲復用之。及邵家壩工竣。以知州用。補江蘇太倉直隸州。逾年擢廣東布政使。調江西。又調江寧。十一年因貴州鉛船遲滯降調。授戶部郎中。十三年從協辦大學士長麟戴衢亨察視南河。基田請修復天然閘迤東十八里屯二石閘。靳輔所建也。足以減黃濟運。且山石夾峙。無奪溜沖決之患。據以入告。帝嘉其留心河務。加道銜。賜花翎。尋予太僕寺少卿職銜。稽核南河要工錢糧。十六年以年逾八旬乞休。允之。命來京就養。以示優卹。後議改建山盱五壩。特命與議。基田疏陳舊制盡善。不宜輕改。今仁義禮三壩石底損

壞。跌成深塘。不得已爲變通之計。請將仁義二壩先改其一。俟大汛果見順利。再議添所建擬。禮壩先築草壩。非湖水大漲不可輕放。奏入報聞。十八年鄉舉重逢。賜三品卿銜。與鹿鳴宴。尋卒。

### 司馬駒

司馬駒字雲舉。江蘇江寧人。乾隆中大學士高晉爲兩江總督。辟佐幕。司章奏。習河事。以從九品留工效用。授山陽主簿。累遷淮安同知。仍兼幕職。從晉塞河屢有功。薩載繼任總督。亦倚之。五十年奏擢江南河庫道。道庫歲修六十萬。溢額則俟上聞。遇險工廳員借帑久。輒因緣爲弊。駒從容籌補。公私具舉。五十五年遷江西按察使。在官七年。巡撫董筮不飭被劾。多所牽連。駒以謹慎獲免。嘉慶元年遷山西布政使。二年調山東。兼管河務。是年秋曹州河溢。命駒偕兩江總督李奉翰。南河總督康基田。前山東巡撫伊江阿。同任堵塞。冬擢河東河道總督。曹工尋合。龍三年春。西壩墊革職留任。疏言豫東兩岸隄工卑薄。請擇要增高。以禦汛漲。詔以下游不能深通。徒事加隄。斥其不揣本而齊末。曹工之墊由於堵築不堅。罰駒等賠修。奪翎頂。所議工事仍允行。九月。睢州河溢。詔免治罪。責速塞。四年正月工竣。復頂戴。議敘。免其代賠帑銀。尋卒於

工次賜卹。

### 吳 璈

吳璈字式如，浙江錢塘人。吏部侍郎嗣爵子。乾隆四十三年進士，選庶吉士，授編修。大考擢侍講學士，典陝西鄉試。五十四年督安徽學政，召見。高宗因其父曾爲總河，詢以河務，所對稱旨。即日授河南開歸陳許道。累遷布政使。五十九年巡撫出視賑，璈充鄉試監臨，聞河水暴漲，即出關馳防。帝嘉之。六十年署巡撫。嘉慶二年楚匪齊王氏犯河南，擊走之，復勦息縣匪，賜花翎。母憂留任。四年署河東河道總督，尋實授。請增河工料價，歸地糧攤徵，詔斥其病民。革職留任。五年調南河，堵合邵家壩漫口，加太子少保。八年秋河決，衡家樓命豫籌來年漕運，請疏邳州宿遷諸閘，於宿遷桃源交界築東水草壩，濬淤淺，依議行。又言徐州一帶河水寬深而未消落，乃海口壅塞所致，詔相度治之。尋疏陳雲梯關海口暗灘，尙非全被阻遏，請於黃泥嘴開引河，並挑吉家浦于家港倪家灘宋家尖諸灘，允之。九年秋，洪湖水漲未消，請緩築仁智兩壩，以保堰旣隄工。時東河衛工甫合，清江浦河口水淺阻糧船，上謂清水力弱，由啟放仁智等壩所致。命侍郎姜晟往會籌蓄黃濟運，璈與合疏，請堵二壩及惠濟閘之鉗口壩，使湖水全力東注，刷



通河口，並啟李工口門，減掣黃水，從之。上終以璫多病，治河不力，雖宥其罪，命解職。十年授兵部侍郎，調倉場侍郎。十一年復授河東河道總督，因物料例價不敷，請依南河按時價折銷，允之。復請歲料穀價歸地糧攤徵，被嚴斥革職留任。尋又以隄堰工需併入衡工善後題銷，上切責之。十三年召回京，授刑部尚書，命偕侍郎托津赴江蘇鞫獄，并勘議海口改道，請仍復故道，接築雲梯關外大隄，從之。復授江南河道總督。十四年疏陳海口應濬，而大隄不堅，旁洩必淤，蓄清爲要，而隄壩不復，遇漲必潰。今開壩無減黃之路，五壩無節宣之方，皆宜急爲救治。詔聽之，令盡心經理。是冬以海口挑復，正河費用浩繁，不及於次年桃汛前舉工，請權宜仍濬北潮河以通去路。十五年奉偕兩江總督松筠合疏，請修復正河，詔允行，而斥璫無定見。前後矛盾，責其認真督治，不得以事由松筠主持爲推諉之地。尋因病乞假，詔解職。俟病痊，以六部尚書用。璫既去任，松筠疏論河工積弊，謂璫與徐端治理失宜，用人不常，墊款九十餘萬，恐有冒捏。又兩淮鹽政阿克當阿劾揚河通判穆元淳浮冒工款，稱璫路過揚州，與言廳員營弁不肖者多，往往虛報工程，且有無工借支。前在任六七年，用帑一千餘萬。今此數年，竟至三四千萬，詔斥璫知而不奏，命尚書托津等往南河按之。劾璫失察誤工，又濬淮北鹽河未經奏陳，濬後復淤。詔以四級調用，與徐端分賠鹽河工款。命璫赴南河襄辦王營減壩及李家樓漫口十

七年。寺卿。累遷吏部侍郎。十八年。睢州河溢。命赴南河察勘。湖河十九年。授河東河道總督。督治。唯工次年。遷兵部尚書。工竣。回京。歷刑部吏部協辦。大學士。上以璫練習河務。無歲不奉使出勘。河二十一年。協防東河秋汛。二十二年。勘堆工及山東連河南河。蕭南民堰。清江浦禦黃東清諸壩。二十三年。築沁河漫口。二十四年。築河南蘭陽儀封及武涉馬營壩。決口。二十五年。勘南河東清禦黃諸壩及洩水事宜。其間再署河南巡撫。一署河東河道總督。道光元年。以病免。二年。因侍郎那彥寶治河不職降黜。追論敬與同罪。雖已致仕家居。褫其翎頂。尋卒。

### 王秉韜

王秉韜字含谿。漢軍鑲紅旗人。由舉人授陝西三原知縣。累遷河南光州直隸州知州。緣事降浙江按察司經歷。改雲南知縣。累遷山西保德知州。有政聲。五十五年。擢安徽潁州知府。因讞獄遲延罷職。詔以原官發江蘇。補淮安。嘉慶二年。復調潁州。會教匪犯河南。去潁州甚近。秉韜慨然曰。同爲守土臣。豈可以畛域遺害乎。與壽春鎮總兵定柱圍結鄉勇數千。勵以忠義。助糧餉。戰於境上。破賊走之。時大學士朱珪爲安徽巡撫。器其才。未幾擢廣西左江道。復以在潁州失察逸犯罪議。鐫級去官。留治江南豐楊河工。尋署廬鳳道。泊仁宗親政。朱珪薦之。擢奉天府

尹遷河南布政使。五年擢河東河道總督。秉韜老於吏事。治河主節費。隄壩單薄者擇要修築。不以不急之工擾民。河北道羅正堉信用劣幕舞弊。曹考通判徐鼎張臆費。並劾治之。薪料如額採買。河員濫報輒駁斥。使多積土以備異漲。於是浮冒者不便其所爲。言官逮論劾。詔慰勉。戒勿偏於節省。七年防汛。卒於工次。秉韜性方正。不沽名。時疆吏中長鱗汪志伊並以廉著。秉韜不愜其爲人。嘗曰。長三汪六皆名過其實。奚足貴。繼其任者爲嵇承志。

### 嵇承志

嵇承志大學士璜子。由舉人官內閣中書。累遷長蘆鹽運使。五十九年天津海河溢。築隄守禦。高宗以承志無守土責。能盡力。特詔嘉之。尋病歸。嘉慶六年從侍郎那彥寶治永定河。復授長蘆鹽運使。七年署河東河道總督。承志年已老。上特以其家世習河事。故任之。八年河決。封邱衛家樓。次年塞決工竣。召還京。授大理寺少卿。十年遷順天府尹。尋卒。

### 徐端

徐端字肇之。浙江德清人。父振甲。官江蘇清河知縣。端少隨任。習於河事。入貴爲通判。乾隆中

河決青龍岡。振甲知涉縣。分挑引河。端佐役。大學士阿桂督工。見而器之。留東河任用。授蘭儀通判。尋升缺爲同知。調睢寧。又調開封。下南河。嘉慶三年。署山東沂曹道。睢州河決。端預築曹州隄。得無害。四年。擢江西饒州知府。未之任。調江蘇淮安。七年。擢淮徐道。丁父憂。與假治喪。仍回任。九年。加三品頂戴。護理東河河道總督。時衡家樓甫塞決。詔以前官王秉綰借費。嵇承志年衰。修防多疏。責端通籌全河。爲未雨綢繆之計。端疏陳臨河埽工固緊要。無工之地尤須慎防。仁宗趨之。冬。清口水淺。阻漕船。端偕尙書姜晟等往視。請展引河。啟祥符五瑞壩。分河水入洪湖。助清敵黃。清口乃通。尋授江南河道總督。十年。請疏治雲梯關沙淤。培築桃源以下隄。工又請移建河口。東清壩於迤南湖水匯出之處。以資節制。挑清壩外築東清東壩。對岸張家莊增築西壩。留口門二十丈。視湖水大小爲束展。詔允行。秋。築義壩時。命侍郎戴均元會籌蓄黃濟運。端與合疏。請濬王營減壩以下鹽河。遇盛漲。相機啓放。庶黃減淮強。湖水暢出。堰工亦免著重。從之。十一年。洪湖異漲。高堰賴新築子堰抵禦。不爲害。俄黃水並漲決。鹽河民堰運河東岸荷花塘亦決。以功過相抵免議。舊制南河設正副總河。後裁其副。至是授戴均元爲河道總督。端副之。秋。河決周家樓。上游郭家房隄墊。命端專治郭家房堵口。四閱月。工竣。時黃水由減壩六塘河入海。正河斷流。羣議改道。上頒示御製黃河改道記。命端視察海口。尋以六塘河下

游水勢散漫，難施工作。復頒示御製治舊河記，命端專駐減壩督工。十二年春工竣，河循故道。加太子少保。秋海湖上漾，河由陳家浦旁溢入射陽湖歸海，請於黃泥嘴建壩，擇要疏淤，俾仍故道。十三年署正總河，先是端屢言河淤由於海口流緩，宜接築雲梯關外長隄，東水攻沙未及舉。至是兩江總督鐵保疏申前議，並請培高堰土坡，修補智禮二壩，以備湖漲。復毛城鋪石隄，王營減壩，以節宣黃水。端贊其議，命協辦大學士長麟、戴衢亨察視。惟駁毛城鋪壩工，改建徐州十八里屯雙閘，餘依原議行。夏湖水漲，端啓智信二壩，不敷宣洩，壞磚工百餘丈，概餉頂降三級留任。尋堵合復之，時黃水由馬港口分流，經灌河口歸海，命尙書吳璣侍郎托津會勘，以荷花塘壩工垂成復墊，降端爲副總河。十五年復授河道總督，裁副總河。端始終主復舊海口堵馬港，命尙書馬慧裕會同督治兩江總督松筠劾端於河流逢澇取直，以致停淤，上不直其奏。端疏辨，詔松筠無預河務，責端與慧裕速施工，勿游移。尋以洪湖風汛壞高堰山盱兩廳工甚鉅，革職留任。松筠復密陳端祇知工程，不曉機宜，糜帑千萬，迄無成功，且恐有浮冒之弊。詔斥端不勝河督之任，革職留工。專任堵築義壩。十六年命以通判用，復命治李家樓引河。十七年工甫竣病卒。端治南河七年，熟諳工作，葦柳積隄，一過測其多少，與夫役同勞苦，廉不妄取。河工積弊，端知之，憚於輕發，欲入覲面陳而終不得，以至於敗。繼之者爲陳鳳翔，河事遂益

敝。

### 戴均元

戴均元字修原，廣東大庾人。乾隆四十年進士，選庶吉士，授編修，遷御史，迭典江南湖北鄉試。督四川安徽學政。嘉慶三年由安徽任滿還京，兄子衢亨先已超授軍機大臣，故事大臣親屬任科道者，對品迴避，均元例改六部員外郎，特命以鴻臚寺少卿候補，累擢工部侍郎。八年偕侍郎貢楚克扎布察視張秋運河及衛家樓決口工程，歷戶部吏部侍郎。十年南河黃流奪運，高堰石工壞，特命馳視籌度。明年詔以湖河異漲，高堰隄工賴先築子堰保衛無虞，清水暢注，河口積淤刷濬，已復三分入運，七分入黃，舊制爲河事一大轉機。嘉均元盡心宣防，特復正副總河舊制，授南河總督，以舊督徐端副之。在任三年，堵合黃河周家堡郭家坊王營減壩，陳家浦及運河二堡壯原墩，築高堰義字壩，拆修惠齊閘，以減壩合龍，加太子少保，病乞解任，尋愈。因事降三品京堂，授左副都御史，督順天學政，未幾遷倉場侍郎。十八年秋河決睢州，出爲東河總督，詔以均元曾任南河，許便宜調用工員，責速堵合。明年春以吏部侍郎內召，途次擢左都御史，尋遷禮部尙書，調吏部。二十年協辦大學士，逾年授軍機大臣，充上書房總師傅。二十

三年拜文淵閣大學士。晉太子太保。管理刑部。二十四年河決武陟馬營壩。自秋徂冬尙未啟工。奉命馳視。還報購料未集。詔嚴斥。在事諸臣以示儆。二十五年七月從扈熱河。甫駐蹕。帝不豫。嚮夕大漸。均元與大學士托津督內侍。檢御篋得小金盒。啟鑰宣示御書。立宣宗爲皇太子。奉嗣尊位。然後發喪。泊還京。因撰擬遺詔。有高宗降生於避暑山莊之語。誤引御製詩注。樞臣皆被譴。鐫級。均元與托津並罷直。道光二年裕陵隆恩殿柱蠹朽。距修建甫二十年。承辦工員俱獲罪。均元以在事未久。從寬罷管部務。奪宮銜。責同賠修。工畢復之。漳水北徙。命均元馳視。次年因漳水下流。潰直隸元城紅花隄。塞之。則元城北境水無所洩。不塞則山東館陶受其害。復命均元往視。議展寬舊有引河。俾積水穿隄入衛水。別就隄下新刷水溝。挑成河道。分流洩入館陶境。築隄防溢。復借巡撫程祖洛勘上游。議漳水自乾隆五十一年南徙。合洹水後。衛水爲所格阻。頻年衝決。由於合則爲患。今漳水北徙。與洹水分流入衛。當因勢利導。各完隄防。使漳洹不再合。疏上。詔從之。四年予告回籍。食全俸。先是建萬年吉地於寶華峪。均元相度選定。帝敦崇儉樸。命偕莊親王。繇課協辦大學士英和監修。面戒規制。一從節減。迨七年孝穆皇后梓宮奉安。帝親視。嘉其工程堅固。晉均元太子太師。及是地宮有浸水。上震怒。嚴譴在事諸臣。褫均元職。逮京治罪。擬重辟。念其耄老。免罪釋歸。均元歷官五十餘年。叔姪繼爲樞相。家門鼎

盛自在翰林數司文柄。及躋卿貳。典順天鄉試。一典會試。三晚歲獲咎家居。世猶推爲耆宿。二十年卒。年九十有五。

### 那彥成

那彥成字釋堂。章佳氏。滿洲正白旗人。大學士阿桂孫。乾隆五十四年進士。選庶吉士。授編修。直南書房。四遷爲內閣學士。嘉慶三年命在軍機大臣上行。走遷工部侍郎。調戶部。兼翰林院掌院學士。擢工部尙書。兼都統內務府大臣。那彥成三歲而孤。母那拉氏守志撫之成立。至是三十載。仁宗御書勵節教忠額表其門。時教匪張漢潮久擾陝西。參贊大臣明亮及將軍慶成巡撫永保同勦之。互有隙。師行不相顧。是年秋命那彥成爲欽差大臣。督明亮軍。褫慶成永保職。逮治。那彥成以樞臣出膺軍寄。意銳甚。明亮聞其將至。急擊賊敗之。漢潮伏誅。帝嘉其先聲奪人。特詔褒美。漢潮黨冉學勝亦狡猾。猶在陝。冬敗之。五郎竄秦嶺老林。又迭敗之高關。崑崙嶺。鳳凰山。賊乘間逸入湖北河南境。五年春進兵漢中。遂入棧。勦川匪。追出棧。大破之。隴州隴山鎮。俘斬甚衆。授參贊大臣。會經略額勒登保病。上以那彥成隴山捷後。軍威已振。命兼督各路兵。高天升馬學禮陷文縣。蹉卡郎寨。乘夜渡河破之。賊南竄。趨松番岷州。額勒登保病起。合



擊敗之。餘賊將竄川境。即陰平入蜀道也。那彥成以地險不利騎兵。檄總兵百祥迎擊於農安。自率師回陝。初那彥成西行。以南山餘賊付巡撫台布。繼而川賊五家營至與合。欲東犯台布。遣將扼之。賊趨鎮安。張世龍張天倫爲經略大兵所驅。亦奔鎮安。羣賊皆注漢北山內。額登勒保追入老林。賊向商維。爲楊遇春所破。始不敢東。那彥成與會師鎮安。商維賊折狎禁境。上以軍事不得要領。召回京。面詢方略。而高馬二賊入川。後益張總兵施綰戰歿。詔斥那彥成縱賊。罷軍機書房一切差使。及至。召對忤旨。再斥在陝漫無布置。面詢兵事。餉事。惟諉諸劫數。未盡。且有忌額勒登保戰功意。褫尙書講官花翎。降翰林院侍講。歷少詹事。內閣學士。七年赴江西。按巡撫張師誠被劾事。未定讞。兩廣總督吉慶以勦會匪被譴。自戕。命往鞫。八年率提督孫全謀平會匪。條上善後。署吏部侍郎。擢禮部尙書。九年復授軍機大臣。赴河南鞫獄未畢。命署陝甘總督。治搜捕餘匪。善後事宜。手詔戒之曰。汝誠柱石之臣。有爲有守。惟自恃聰明。不求謀議。務資兼聽並觀之益。勿存五日京兆之見。未幾調授兩廣總督。廣東土匪勾結海寇爲患。久不靖。那彥成以兵不足用。乃招撫盜首黃正嵩李崇玉。先後降者五千餘人。獎以千總外委銜及銀幣有差。巡撫孫庭玉劾其賞盜。降藍翎侍衛。充伊犁領隊大臣。旣而李崇玉盪遼京師。訊得與正嵩皆受四品銜守備劄。褫職戍伊犁。十二年復予二等侍衛。充領隊。調喀喇沙爾辦事大

臣又調西甯平叛番擢南河副總河以荷花塘漫口合而復決降二等侍衛歷喀喇沙爾葉爾羌辦事大臣喀什噶爾參贊大臣十四年復授陝甘總督十八年河南天理會教匪李文成等倡亂陷滑縣直隸山東皆響應林清糾黨犯禁門初命總督溫承惠往勦清既誅乃發京兵授那彥成欽差大臣加都統銜督師率楊遇春楊芳等討之迭詔責戰甚急那彥成以小醜不足平惟慮遁入太行勢且蔓延十月至衛輝合師而後進賊踞桃源集道口與滑縣爲犄角連敗之於新鎮丁夔集遇春擊破道口殲賊萬餘焚其巢尋破桃源集追道口餘賊抵滑縣文成遁輝縣司寨楊芳德英阿追破之文成自焚死親督遇春等圍滑城數旬以地雷攻拔之獲首虜二萬餘山東賊亦平捷聞加太子少保封三等子爵賜雙眼花翎授直隸總督賜祭其祖阿桂墓二十一年坐前在陝甘移賑銀津貼脚價褫職逮問論大辟繳完賠銀改戍伊犁會丁母憂詔援滑縣功免發遣二十三年授翰林院侍講歷理藩院吏部刑部尙書授內大臣道光二年青海野番甫定復擾命那彥成往接途授陝甘總督驅私住河北番族回河南原牧嚴定約束緝治漢奸乃漸平五年調直隸七年回疆四城既復命爲欽差大臣往治善後事先後奏定章程革各城積弊諸領隊辦事大臣歲終受考覈於參贊大臣又總考覈於伊犁將軍互相糾察增其廉俸許其携眷久其任期印房章京由京揀選不用駐防除伯克賄補之弊嚴制資格保

舉迴避。五城叛產歸官收租。歲糧五萬六千餘石。支兵餉外餘萬八千石。爲酌增各官養廉鹽米銀之用。有餘則變價解阿克蘇採買儲倉。改建城垣。增卡堡。練戍兵。浩罕爲遁逃藪。所屬八城安集延。即其一。嚴禁茶葉大黃出卡。盡逐內地流夷。收撫各布魯特。待其款關求貢。然後撫之。詔悉允行。張格爾既誅。加太子太保。賜紫韁雙眼花翎。繪像紫光閣。列功臣之末。浩罕匿張格爾妻孥。詐使人投書伺隙。那彥成禁不使與內地交接。絕其貿易。九年使人出卡搜求逆屬。上慮其邀功生事。召還京。仍回直隸總督任。未及兩歲。西陲復不靖。論者謂那彥成驅內地安集延沒費產絕貿易所致。十一年詔斥誤國肇釁。褫職。十三年卒。宣宗追念平教匪功。賜尙書銜。依例賜卹。諡文毅。那彥成遇事有爲。工文翰。好士。雖屢起屢躋。中外想望風采。子容安容照。

### 馬慧裕

馬慧裕漢軍正黃旗人。乾隆三十六年進士。改翰林院庶吉士。三十七年散館。改主事。籤分吏部。三十九年補官。四十年升員外郎。四十五年五月兼公中佐領。十二月升郎中。四十六年丁父憂。四十九年服闋補原官。五十年丁母憂。五十二年服闋補原官。五十三年授江蘇鎮江府知府。五十五年調揚州府。五十九年四月調蘇州府。五月諭曰。馬慧裕在揚州府任內辦理地

方事務甚爲妥協。操守廉潔。商民愛戴。著仍留揚州府任。六十年擢河南開歸陳許道。嘉慶二年七月以協理三省軍務及勦辦息縣匪徒。均屬妥速。賞戴花翎。十一月升陝西按察使。旋調河南按察使。三年遷山西布政使。四年正月調陝西布政使。二月護理巡撫。時教匪滋事。命招撫被脅良民。妥議章程具奏。尋奏言自行投出者官給執照。飭令回籍。嚴禁挾仇訐告。如人數衆多。酌量分配閒日行走。或能勸諭數十人及帶領一股來歸者。並予優賚。其產業被人侵占。稟官追給。至年老殘廢。無家可歸者。分撥附近各州縣。支給孤貧口糧。下軍機大臣議行。四月御史李遵條奏省曾首邑及府州縣丞倅等官題調缺出。不准將不合例人員奏請升調。其未經卓薦佐貳人員不准委署州縣。部議已行。慧裕奏見辦軍需地方。需人孔亟。與他省情形不同。且佐貳中承辦軍需尤爲出力者。亦當予以鼓勵。所有川楚陝甘等省仍請量予變通。俟軍務告竣。再遵新例辦理。允之。五年二月調河南布政使。四月因前在河南按察使任內。將毆斃竊賊民人汪元誤擬絞候。部議降三級調用上。加恩改爲留任。七月寶豐縣匪徒聽從教首劉之協勾結滋事。慧裕帶兵往勦。槍斃並施。殲斃賊匪二百數十名。餘匪退據翟家寨。復督兵攻破寨門。生擒僞元帥李岳僞總兵孫繼元及餘賊二百三十餘名。殲斃六百七十餘名。首逆劉之協旋於葉縣就獲。上以辦理迅速。實馬慧裕一人之功。且設卡盤詰。將首逆劉之協擊獲。

尤爲快事。賞慧裕騎都尉世職。九月升湖南巡撫。六年奏楚省應辦京局鑄錢黑鉛年久沙竭。請暫歸黔省代辦。上以其藉詞推諉。嚴飭之。七年四月調河南巡撫。十月奏楚匪將次蕩平。應將防江鄉勇撤伍歸農。但江岸空虛。必須移兵易勇。請令南陽鎮總兵田永桐移駐江岸。撥兵二千名分別布置。其應撤鄉勇酌量給銀遣歸原籍。允之。八年七月奏豫省前經招募新兵七千四百名。並將開封團練鄉勇一千一百餘名作爲撫標兵丁。茲除節次挑補額缺並陸續裁革外。尚存二千五百餘名。見在三省肅清。邊防江防全行撤退。所有前項新兵若概行裁汰。不特訓練垂成。棄之可惜。且其中無恆業者居多。亦須妥爲安頓。請暫留各原營。隨同額兵一體當差。遇有缺出。逐漸挑補。照舊支給餉銀。從之。九月東河衛糧廳屬衡家樓河水漫溢。以疏防下部議處。尋議降調。諭曰。馬慧裕兼管河務。咎無可辭。本應照部議實降。姑念趕辦堵築購料各事宜。正需經理。著加恩准其抵銷。九年三月衛工合龍。下部議叙。四月奏武陟縣攔黃民挖向係民間修築。見屆伏秋兩汛。河勢北趨。挖身未免單薄。再沁河兩岸隄工亦須培築。均請於藩庫內借款興修。上允之。七月因奏報河工尋常事件。誤用五百里急遞。褫花翎。九月因秋汛安瀾。河工穩固。賞還花翎。十二月安徽亳州一帶匪徒滋事。慧裕以歸德府屬毗連安省。帶兵駐紮。檄委知府富忠阿參將翼貴等帶領弁兵赴永城鹿邑等縣邊境防守。上嘉其辦理妥協。

十一年偕河東河道總督吳璥奏河工歲料例價不敷請增幫價歲以三十萬兩爲額歸入地糧攤徵諭曰唯工幫價銀兩本年甫經徵完衡工幫價銀七百餘萬兩於明年始行啓徵今再加以歲料幫價是小民於常賦之外歲有攤徵永定爲額與加賦何異吳璥等率行奏請實屬謬誤著交部嚴加議處尋議降二級調用上改爲降三級留任十二年因勒休知府熊之書來京呈遞奏章言詞誕妄命前任浙江巡撫阮元刑部侍郎廣興赴豫查辦先是之書官河南時染患瘋疾慧裕未經糾參僅請飭令回籍奉旨將之書勒休至是自請下部嚴議部議降調諭曰熊之書患病瘋顛馬慧裕若據實奏參明治其罪何致來京呈遞奏摺捏砌多款乃馬慧裕僅請飭令回籍且稱俟該員病痊起用爲劣員曲留地步經朕特旨勒休該撫又不即時勒令回籍馬慧裕辦事罷軟屢經降旨訓飭並不加意振作巡撫職任封圻馬慧裕不能察吏焉能安民本應照部議降調姑念其操守廉潔官聲尙好著來京以內閣學士補用十三年正月授盛京刑部侍郎六月授河東河道總督十四年正月以餽送欽差刑部侍郎廣興程儀部議降四級調用上改爲革職留任六月以山東民人張文興赴京控告平原縣知縣浮收漕糧致將伊叔張樹桂押斃敕慧裕提訊仍照原審革率擬結部議革職命降三品頂帶仍革職留任七月調漕運總督九月復二品頂帶十二月因徽州湖蓄水短絀致江南邳州一帶運河水淺回

空糧船多有阻滯。降三品京堂。尋授盛京戶部侍郎。兼管奉天府尹事務。十五年二月。調工部右侍郎。兼正紅旗漢軍副都統。六月。遷工部尙書。七月。以修復雲梯關外海口。命慧裕赴南河督辦。九月。授湖廣總督。仍留南河督工。十二月。工竣。諭曰。雲梯關外北岸馬港口。於嘉慶十三年。黃水旁溢。海口淤塞。經朕定議修復。派馬慧裕前往督辦。自九月開工。將引河認真挑挖。口門陸續進占。茲於本月。大溜東趨。奔騰浩瀚。順利非常。隨將壩工堵閉合龍。黃流全由正河歸海。從此恬波順軌。暢達尾閘。此事係馬慧裕一手經理。宜力可嘉。著交部從優議敘。並賞給御筆親書福字。用錫春祺。十六年正月。以河復故道。請增設淮海道一員。督理海口。從之。二月。赴湖廣總督任。七月。南河齋南廳屬李家樓漫口。以慧裕所辦海口挑工。於攔潮壩基未能起除淨盡。致泥沙停阻爲患。部議革職。上加恩改爲留任。十九年。湖南提督魁保奏湖南例食淮鹽。惟所屬州縣有與川粵接壤者。該處私鹽順流而下。較淮鹽貴賤懸殊。遂致網引滯銷。請將川粵鹽斤加增稅課。以杜私販。命慧裕詳議以聞。尋奏言。各省鹽課均因地定額。若因私鹽侵越。邊將川廣兩省鹽課一律加增。民力未免重困。湖南向有苗鹽一項。係於正引外增設准引三千二百餘道。專爲接濟苗疆。近來商人圖省運費。每於內地私售。致苗民違禁買食川粵私鹽。惟有嚴行稽查。務使苗鹽實運到境。仍申明舊例。通飭地方官嚴緝鄰境私梟。從之。二十年。

六月因僧人王樹勳冒捐知府。在楚多年。慧裕未經查參。部議降調。上改爲留任。十二月復以江陵縣知縣李若疇捐升知府。本任有承緝展參處分。未經聲明。即代請加捐離任。部臣如前議。上仍改爲留任。二十一年五月召來京。授都察院左都御史。七月遷禮部尙書。八月卒。諭曰。禮部尙書馬慧裕久歷外任。著有廉名。在河南藩司任內。拏獲首逆劉之協。勦辦寶豐郟縣匪徒。尤爲出力。擢用督撫。宣力有年。昨授爲禮部尙書。正資倚畀。遽聞溢逝。殊爲軫惜。馬慧裕著加贈太子少保銜。其騎都尉世職著伊子河洲承襲。踰百日即行帶領引見。所有歷任攤捐未完銀六千二百餘兩。俱著加恩寬免。其靈柩到京之日。准其入城治喪。所有任內一切處分悉予開復。照例給予應得卹典。尋賜祭葬。予諡清恪。子瀛洲。候選同知。河洲襲騎都尉。官兵部郎中。孫積慶。山西大同鎮總兵。

### 陳鳳翔

陳鳳翔字竹香。江西崇仁人。騰錄議叙縣丞。發直隸河工。累遷永定河道。嘉慶六年畿輔大水。河決者四。鳳翔從侍郎那彥寶塞決。爲仁宗所知。逾年丁父憂。賜金治喪。後復授永定河道。十四年擢河東河道總督。逾年調南河。時南河敝壞已久。河湖受病日深。詔以蓄清敵黃爲急務。



其要在修復高堰之堤。責鳳翔尅期程工。尤以借黃濟運爲戒。十六年疏陳急治河口及運河各工。高堰二堤亦次第興辦。尋偕兩江總督勒保奏報堵合禦黃鉗口兩壩。疏末微言海口北岸無人烟之地。面而皆水。俟秋間水落。相機辦理。上以上年堵築馬港。兩岸皆新堤。北岸地勢尤高。明是新決。諱飾責令據實奏聞。適王營減壩土隄又決。詔切責革職留任。尋奏王營減壩旁注。由海口逼緊。水無他路。致有漫溢。請俟水落修築減壩。海口但保南岸。勿築北岸。以免水逼。援引高宗諭旨。雲梯關外勿與水爭地。詔以從前瀕海沙灘無居民。今則馬港口外現有村落。非昔可比。且水勢散漫。河緩沙停。弊不勝言。又鳳翔等所繪海口圖無村落地名。與十三年吳璣所呈圖說不同。河形曲直亦異。斥鳳翔意存朦混。恃才妄作。前稱雲梯關外溜勢暢達。未挑處刷深至十餘丈。可見海口非高仰。鳳翔既未身歷其境。今因北岸漫溢。束手無策。反言從前挑築皆屬非計。以相抵塞。特簡百齡爲兩江總督。與鳳翔同勘海口。鳳翔謂海口不能暢下。壅故上清。諉爲淮海道黎世序所言。而世序實謂下壅在倪家灘新隄上下。非在海口。及百齡至。親勘海口深通。惟中段涸成平陸。乃去歲挑河積土河灘。春水漫刷。仍歸河內。又攔潮壩放水時壩根起除未淨。阻水停淤。世序屢請籌辦。鳳翔視爲緩圖。詔斥因循貽誤。會上游縣山拐李家樓兩處漫口。革職留任。十七年春禮壩又決。百齡劾鳳翔急開遲閉。壩下衝動。不早親勘。

堵築用帑二十七萬兩有奇。而壩工未竣。清水大洩。下河成災。嚴詔斥鳳翔貽誤革職。罰賠銀十萬兩。荷校兩月。遣戍烏魯木齊。尋鳳翔訴辨。命大學士松筠府尹初彭齡按訊。得百齡與鳳翔同時批准開壩狀。鳳翔又託百齡信任鹽巡道朱爾蔚額督辦葦柴料。捏報邀功。譴百齡等。鳳翔免枷。仍赴戍。未行病歿。

### 蔣攸銛

蔣攸銛字礪堂。漢軍鑲紅旗人。先世由浙江遷遼東。從入關。居寶坻。乾隆四十九年成進士。年甫十九。選庶吉士。授編修。嘉慶初遷御史。敢言有聲。受仁宗知。五年出爲江西吉南贛道。署按察使。八年廣昌齋匪廖幹周作亂。攸銛率兵平之。疆臣上其功。會丁母憂去。十年特起署廣東惠潮嘉道。歷江西按察使。雲南布政使。十四年調江蘇。就擢巡撫。調浙江。擢江南河道總督。以不諳河務辭。詔回原任。十六年擢兩廣總督。嚴於治盜。遴勤幹文武大員駐廣肇。詔連諸郡居中之地。分路搜截。飭州縣官赴鄉勸導耆老。使境內不得藏奸。舉劾嚴明。吏皆用命。歷禽匪盜七百餘名。自首者許自新。特詔褒獎。十八年應詔陳言。略曰。我朝累代功德在民。而亂民惑不畏法。變出意外。此皆由於吏治不修所致。臣觀近日道府州縣貪酷者少。而委靡者多。夫開冗之釀。患與貪酷等。竊以爲方今急務。莫先於察吏。而欲振積習。必用破格之勸懲。凡貪酷者固

應嚴參。平庸者亦隨時勒休改用。勿俟大計始行覈辦。其有勤能者即請旨優獎。果道府州縣得人。則禍衝之萌自息。次年又上疏曰。道府由牧令起家者十之二三。由部員外擢者十之七八。聞近來司員少卓著之才。由於滿洲之廢生太易。漢員之捐班太多。請飭部臣隨時考覈。其不宜於部務者。以同知通判分發各省。使練民事。部曹亦可疏通。今之人才沈於下位者多矣。請飭大臣薦達。擇其名實相副者擢用。抑臣更有請者。任事之與專擅有義利之分。若任事而以專擅罪之。人皆推諉以自全矣。協恭之與黨援有公私之別。如協恭而以黨援目之。人且立異以遠嫌矣。此近今之積習。爲大臣者當力除之。至翰林儒臣務在崇正。學黜浮華。養成明體達用之才。不必以文章課殿最。科道爲耳目之官。敷陳能否得體。糾劾是否爲公。詢事考言。難逃洞鑒。其有卓越清正者。當由京堂而擢卿貳。與翰詹參用。用人之道。因才因地。因時。臣下無可市之恩。君上有特操之鑒。人無求備。政在集思。此之謂也。疏入。上嘉納之。英吉利兵船入內洋。攸銛飭停貿易。乃聽命引去。請禁民人爲洋人服役。洋行不許建洋式房屋。鋪商不得用洋字店號。清查商欠。不準無身家者濫充洋商及內地人私往洋館。並如議行。商人負暹羅國貨價。以官錢代償。旣而貢使來繳還。攸銛以奉旨頒給。乃示懷柔。不得復收。回却之。詔嘉其得體。二十二年調四川總督。四川兵故驕縱。一裁以法。民多帶刀劍。禁鄉村設鐘製兵刃。城市編

牌取結有犯連坐。以義倉息助灌縣都江堰歲修。禁派捐累民。重修文翁石室。興學造十言。官請禁非刑。飭屬鎗毀違法刑具。而嚴戒縱匪。不得博寬厚虛名。貽閭閻實害。二十四年。率土司頭目入都祝嘏。賞賚有加。時因慶典。普免天下積欠錢糧。獨四川無欠。可免。詔嘉其撫綏有方。予優敘。二十五年。仁宗崩。入謁梓宮。宣宗諭褒爲守兼優。加太子少保。道光二年。召授刑部尚書。尋授直隸總督。值水災。請截南漕四十萬石。賑款先後二百萬兩。踰年賑事竣。時方治畿輔水利。命侍郎張文浩蒞其事。尋以程含章代之。攸銛與合疏。言東西兩淀。大清永定子牙南。北運五河及天津海口。千里隄不可緩之工。請部撥銀一百二十萬兩。又疏陳千里隄章程。規復兩淀。築船殺夫。移改管河員弁。駐所添建巡防堡房。並如議行。命協辦大學士。仍留總督任。五年。拜體仁閣大學士。充軍機大臣。管理刑部。以回疆平。加太子太保。七年。授兩江總督。疏言。總督於河務非專責。與河臣同治。徒掣其肘。請毋庸駐清江浦。從之。時清水不能敵黃。漕運屢阻。攸銛初在浙。不主海運。至是。見河漕交困。試行海運。便利。遂請續行。並預儲銀六十萬兩。備河運盤壩之用。廷議方主倒塘濟運法。且疑其畏難便私。不許。攸銛疏辯。極言倒塘之不足恃。上終不以爲然。姑許海運。而禁言盤壩。未幾海運亦罷。以張格爾就禽。追論贊畫功。晉太子太傅。黃玉林者。鹽梟巨魁。以儀徵老虎頸爲窟穴。長江千里。呼吸皆通。詔責嚴捕。玉林投首乞捕。

私自效。十年攸銛病乞假。假滿召回京供職。而玉林復圖販私。攸銛疏請嚴治。發遣新疆。尋復慮其潛回滋事。密請處絞。詔誅玉林。切責攸銛苟且從事。嚴議褫職。加恩降兵部侍郎。未至京。卒於途。優詔軫惜。依尙書例賜卹。攸銛精敏強識。與人一面一言。閱數十年記憶不爽。勇於任事。不唯阿。尤長於察吏。薦賢如不及。所舉後多以事功名節著。子爵遠。官至貴州巡撫。自有傳。

### 黎世序

黎世序初名承惠。字湛溪。河南羅山人。嘉慶元年進士。授江西星子知縣。調南昌。擢江蘇鎮江知府。十六年遷淮海道。與河督陳鳳翔爭堵倪家灘漫口。由是知名。十七年調淮陽道。尋鳳翔黜。詔加世序三品頂戴。署南河河道總督。俟三年後果稱職。始實授。疏言自上年大濬千里長河。王營減壩及李家樓漫口堵合。雲梯關外水深二三丈至四五丈。爲近年所未有。而清江浦至雲梯關一帶。較之河底深通時尙高八九尺。此非人力所能猝辦。計惟竭力收蓄湖水。以期暢出敵黃。蓄清之法在堰阨二隄。有旨緩辦。今年禮壩跌損。宜洩路少。二隄尤應急築。以資捍衛。允之。十八年以仁義禮三壩基壞。請於蔣家壩附近山岡移建三壩。挑引河三道。詔令詳議。並飭填實舊壩。尋如議行。因全漕渡黃較早。議敘。疏請加高徐州護城石工。添築越隄於清江。

浦。汰黃隄外加重隄。又於駱馬湖尾閘五壩迤下添碎石滾壩。並允之。先是百齡擬於清江浦石馬頭築圈隄。其灣處對王營。上起禦黃壩。下屬貼心壩。河寬千餘丈。至此陡束爲二百丈。論者以爲不便。得不行。世序卒成之。是年秋。睢南薛家樓桃北丁家莊漫水壞隄。世序躍入河者再。會上游河南睢州決口奪溜。河水陡落。睢桃兩工得補築無事。詔以世序不能先事預防。降一級留任。睢州決口久未合。黃水全入洪湖。世序力籌宣洩。濬順清河於清口淤窄處。自束清壩起至禦黃壩止。挑引河三。束清壩鉗口各壩一律開展。智仁兩壩及蔣壩以南新挑仁義兩壩。引河並爲分減之路。至十九年霜降安瀾。詔嘉世序修防得宜。加二品頂戴。二十年疏言徐州十八里屯舊有東西兩閘。金門寬三丈五尺。不足減水。其西南虎山腰兩山對峙。凹處寬二十餘丈。山根石脚相連。可作天然滾壩。北面臨河。即十八里屯山岡淤於土中。削平山頂。改作臨河滾壩。以虎山腰爲重門擎托。可期穩固。允之。夏洪湖盛漲。拆展束清禦黃兩壩。啓山旰引河滾壩。清水暢出。會黃東注。刷河益深。特詔嘉獎。賜花翎。世序治河。力舉束水對壩。課種柳株。驗土壩。稽垛牛。減漕規例。行之既久。灘柳茂密。土料如林。工修河暢。南河歲修三百萬兩爲率。每年必節省二三十萬。碎石坦坡自靳輔始用之。於高堰。後隳第錫吳璣徐端偶一用之。世序始用之。於運工。謗言四起。世序力持。卒獲其效。二十一年京察議敘。二十二年因禦黃壩刷

深不能施工。束清壩掣溜太急，亦難穩立。請於舊二壩水淺處添築重壩。又於束清壩外添建一壩，以爲重門鉗束。於是比歲安瀾。奏減料價一成。道光元年入覲，宣宗嘉其勞動，加太子少保，開復一切處分。賜詩以寵之。二年京察，復予議敘。四年卒於官。優詔褒卹，加尙書銜，贈太子太保，諡襄勤。入祀賢良祠。江南請祀名宦建專祠。帝追念前勞，御製詩一章，命勒石於墓。賜其子學淳主事。學淵舉人。學澄副榜貢生。自乾隆季年，河官習爲奢侈，帑多中飽，寢至無歲不決。又以漕運牽掣，常其事者無不蹶敗。世序澹泊寧靜，一掃靡俗，任事十三年，獨以恩禮終焉。幕僚鄒汝翼無錫人。世序倚如左右手，欲援陳潢故事薦之於朝，力辭而止。涇縣包世臣號知河事。世序多用其說，惟築圈堰一事論不合。及剷虎山膠滾壩，世臣阻之曰：「河以無溜爲至險，攻大壩不與焉。湖以淤底爲至險，掣石工不與焉。公謂減黃入湖爲化險爲平，黃緩湖高，吾坐見其積平成險也。兩險交至，其禍甚烈。公意在及身，然以憂患貽後世已。」世序初奏亦謂壩成遇不得已乃啓，然後實無歲不啓。泊二十五年上游河南睢州馬營兩口既合，閎歲大汛至，清河安東阜寧三縣境內河水常平隄，而中泓無溜。世序心知其害，憂瘁而卒。後數月高堰竟決。

### 初彭齡

初彭齡字頤園，山東萊陽人。乾隆三十六年巡幸山東，召試賜舉人。四十五年成進士，選庶吉士，授編修。五十四年遷江南道御史，劾協辦大學士彭元瑞徇私爲培姪營事，元瑞被黜。又江西巡撫陳淮以貪著，劾罷之。風采振一時。累遷兵部侍郎。嘉慶四年出爲雲南巡撫。時總督富綱請罷官鹽改歸民運，民銷詔下。彭齡議疏上，略曰：滇鹽向例官督窰煎，分井定額，按月完納。省倉行銷之法，按州縣戶口多寡定額，地方官備價運銷交課。其始窰戶所領官給券本敷裕，交足額鹽之外，尚有餘鹽，官售額鹽扣還腳價之外，尚有餘課，行之日久，不肖州縣勾通井官，私買額外餘鹽，行銷肥己。窰戶利於賣私，益滋偷漏。前巡撫劉秉恬遂令州縣額銷十萬斤者，加銷一二萬，以資辦公。窰戶薪本不敷，無力加煎，攙和灰土。州縣滯銷，因有派累之事。乾隆五十六年鹽道蔣繼勳以官銀盡買安窰等井，私煎之鹽，并發州縣銷售，欲以彌縫虧空。額鹽積壓愈多，於是州縣又有計口授鹽短秤加課之弊。煙戶無論男女老幼，皆應交課，窮困已極。迤西一帶，遂至聚衆抗官，斃差焚屋。前年威遠猥夷滋擾，即有此等姦民。祿豐一案，亦由鹽務起。毀江蘭並匿情不奏，富綱到滇，實見有不得不改革以甦民困者。竊思滇鹽官運官銷，積弊難返，應如督臣所奏，改爲就井收課，聽民自便。於是損益原奏，令窰戶自煎自賣，商販領照，聽其所之。試行二三年，再定各井歲額。下部議行。又籌置堡田，免徭役，加派滇民感之。劾前撫江蘭



匿抱母恩耕二井水災不奏。蘭因黜罷。六年自陳親老乞改京職。允之。以貴州巡撫伊桑阿代。途次劾伊桑阿驕奢乖戾。苛派屬員。勦石岷苗。飾詞冒功。遣使勘實。實伊桑阿於法。回京授刑部侍郎。七年偕副都統富尼善往貴州按事。劾巡撫常明鉛廠之弊。褫職治罪。即代署巡撫。尋調署雲南巡撫。劾布政使陳孝昇迺西道薩榮安以維西軍務冒帑治如律。八年偕侍郎額勒布清查陝西軍需。自巡撫奏承恩以下黜罰有差。調工部侍郎。又調戶部。九年誤聽湖北巡撫高杞言。劾湖廣總督吳熊光受賄不得實。後復以獨對時密諭私告杞事覺。下廷臣議罪。以大辟上。仁宗知彭齡無他。不欲因言事加重譴。詔斥諸臣所擬過當。有意杜言事者之口。又念彭齡親老。免遠謫。罷職家居。逾年起授右庶子。驟遷內閣學士。十一年偕侍郎英和往陝西讞獄。途經山西。命察議河東鹽務。尋授安徽巡撫。壽州武舉張大有因妒姦毒斃族姪張倫及雇工人。總督鐵保徇蘇州知府周鏗以自中蛇毒定讞。彭齡推鞫得實。詔嘉之。特予議敘。鐵保等降黜有差。父憂歸。十四年奪情授貴州巡撫。固辭不起。服闋。署山西巡撫。遂實授。劾前巡撫成齡需索供應。又劾布政使劉清署按察使張曾獻及府州縣多人。尋調陝西河東道。劉大觀揭劾初。彭齡任性乖張。命回山西聽勘。以怒斥前撫金應琦及瞻徇知府朱錫庚。部議革職。詔寬之。降補鴻臚寺卿。遷順天府尹。十六年偕尙書托津清查南河工帑。劾罷廳營四十八員。復偕尙

書崇祿往福建讞獄。遷工部侍郎。署浙江巡撫。尋命往兩湖按訊湖北按察使周季堂及湖南學政徐松。季堂無貪跡。惟袒庇屬員。褫職免治罪。松需索陋規。出題割裂聖經。褫職遣戍。十七年調戶部侍郎。時兩江總督百齡劾兩河總督陳鳳翔。啓智禮兩壩。鳳翔已被譴。自訴辯。又訐百齡信任鹽運道朱爾庶。額督辦葦蕩失常。命彭齡松筠往按。百齡於啟壩時實同畫諾。遂請薄懲百齡。而朱爾庶額被重譴。語詳百齡等傳。累南河總督。尋調倉場侍郎。十九年命往廣西按訊巡撫成林。以恣意聲色。用度多糜。褫成林職。籍其家。擢兵部尚書。特命署江蘇巡撫。清查虧空。疏言虧空應立時懲辦。而各省督撫往往密奏。僅使分限完繳。始則屬官玩法。任意侵欺。繼則上司市恩。設法掩蓋。是以清查爲績。虧出路。密奏爲綏。辦良圖。請飭禁。帝聽之。劾江甯布政使陳桂生。江蘇布政使常格。催徵不力。並褫職。尋巡撫張師誠回任。仍命彭齡會同清查。彭齡與百齡師誠意不合。各擬章程上。詔斥其不能和衷。旣而疏劾百齡師誠受關道鹽員饋銀。又劾陳桂生弊混。命大學士托津尙書景安往按。至則百齡師誠嗾屬員多方沮格。所劾並不得實。上以彭齡性褊急。嫉惡過嚴。斥其輕躁。降內閣學士。召回京。茅豫者以部員隨赴廣西。因留江蘇佐理。改知府。至是彭齡疏陳豫兩耳重聽。代爲乞假。詔斥越職專擅。再降以翰林院侍讀侍講候補。百齡復劾彭齡沈湎於酒。事一委茅豫。致陳桂生之罪。私拆批摺。挾怨誣參。

且豫實非耳聾，亦徇欺。上怒，褫彭齡職，停其母九旬恩。賚令閉門思過。二十一年起爲工部主事。丁母憂，未歸，請改注籍順天。服闋，以員外郎用。道光元年授禮部侍郎，尋擢兵部尚書。三年萬壽節，與十五老臣宴，繪圖於萬壽山玉瀾堂，御製詩稱其耿介。優賚珍物，四年以年老休致，食半俸。五年卒，詔優卹。

### 李鴻賓

李鴻賓字鹿萃，江西德化人。嘉慶六年進士，選庶吉士，授檢討，遷御史給事中。十八年巡視東漕，會林清之變，數疏陳時政利弊。又以山東河南直隸毗連之地頻年遭兵，條上善後事。始受仁宗知，命偕河督吳璥巡撫，同與按河督李亨特貪劣不職狀，得實以聞。十九年超授東河副總河。時微山湖蓄水盡涸，運河淤塞，鴻賓自巡漕時講求疏泉濟運之策，至是疏淪上游，湖水通暢，滌蓄充盈，漕運無阻，被褒獎，命赴隄工。會同吳璥塞河，二十年擢河東河道總督，由諫官不三年而膺方面，爲時所罕。尋丁母憂，賜金治喪，予諭祭，異數也。服闋，署禮部兵部侍郎，命赴河南山東獄，並察黃河運河湖水情形。二十三年署廣東巡撫，二十四年授漕運總督，復調河東河道總督。河決蘭陽儀封，命偕尚書吳璥治之。鴻賓專駐儀封，會北岸馬營壩復決，合疏言馬營土質沙鬆，河溜尙勁，未能遽定壩基，被詰責，遂自陳不勝河督之任，詔斥其見吳璥辦

工遲緩。慮同獲咎。預爲地步。褫職。予郎中銜。留河南專司大工錢糧。二十五年命營山東運河事務。兼署山東巡撫。專駐張秋。籌備運事。尋授安徽巡撫。道光元年調漕運總督。二年擢湖廣總督。初湖廣行銷淮鹽用封輪法。大商壟斷。小商向隅。甫改開輪。又有跌價爭售之害。鴻賓請設公司。僉商經理。無論鹽船到岸先後。小商隨到隨售。大商按所到各家計引均銷。試行兩月後。販運踴躍。著爲令。時議折漕以資治河。鴻賓疏言徵收折色。弊竇叢生。莫若令民間完交本色。由州縣賣米易銀。轉解河工。詔以易啓勒捏價加收平色諸弊。未允行。調兩廣總督。廣東通商久。號爲利藪。自嘉慶以來。英吉利國勢日強。漸跋扈。故事十三行洋商有缺。十二家聯保承充。虧帑則攤償。英領事類地知洋行獲利厚。欲以洋虜容阿華充商。諸商不允。乃賄鴻賓得之。類地曰。吾以爲總督若何嚴重。詎消數萬金便營私耶。於是始輕中國官吏。容阿華尋以淫侈耗資。逃勿獲。官帑無著。不能責諸商代償。乃以抽分法爲彌補。衆商藉以漁利。夷情不服。日益多事。鴉片流行日廣。漏銀外洋。鴻賓屢疏陳查禁之法及禁種罌粟。並增築虎門大角礮臺。以資控御。而奉行具文。未有實效。十年協辦大學士。仍留總督任。十一年崖州黎匪亂。鴻賓駐雷州。令提督劉榮慶總兵孫得發勦平之。給事中劉光三奏廣東匪徒立會滋擾。鴻賓疏陳無三點會名目。惟搶劫打單勒索民財根株未絕。隨時訪拿。準自首免罪。請廣湖肇嘉諸府州

山塢荒地。令無業游民報墾。永不升科。庶衣食有資。免流匪僻。如議行。入覲賜花翎。十二年春。湖南騷趙金龍倡亂。廣東連州騷聞風蠢動。遣兵防勦。五月鴻賓赴連州。三路進兵。雖有斬獲。兵弁傷亡多。疏請俟湖南事竣。進勦。詔斥任賊蔓延。提督劉榮慶。衰庸不早糾劾。嚴議革職。改留任。命尙書禧恩等。由湖南移師赴粵勦辦。禧恩言粵兵多食鴉片。不耐山險。鴻賓陳奏不實。褫職逮治。遣戍烏魯木齊。十四年釋還。予編修。家居久之。二十年卒。

### 李逢亨

李逢亨。陝西平利人。乾隆丁酉拔貢。以州判分發河南。歷遷開歸陳許道。陞至河道總督。在任多年。黃流順軌。無決溢之患。帝以福星獎之。後署直隸總督。

### 葉觀潮

葉觀潮。福建閩縣人。乾隆四十八年舉人。六十年大挑一等。分發山東試用。嘉慶二年借補濟甯州州同。五年捐升同知。分發南河試用。八年補淮安府海防同知。九年調出清外河同知。十年四月捐升道員。九月丁母憂。經兩江總督鐵保奏留工次。十二年三月。以王營減壩合龍。賞戴花翎。十二月服闋。十三年補江南淮揚道。十五年承辦裏河平橋汛隄工。勘估不實。降五品頂帶。十六年二月。命戶部尙書托津順天府尹初彭齡查勘河工。以觀潮所轄屢有漫口工。

段疏劾之罷職并褫花翎。十二月重挑雲梯關外馬港口淤墊引河以觀潮等初次疏濬未盡罰賠重挑工銀。十九年捐復原官留東河委用。二十年二月河南睢州二堡合龍復賞戴花翎。九月補永定河道二十一年賞三品頂帶擢河東河道總督二十三年奏道員謝學崇童槐搶險出力懇加按察使銜上以其冒昧陳請嚴飭之二十四年二月請添建南旺湖閘從之八月黃河南岸蘭陽儀封兩處決口褫觀潮職命原任刑部尙書吳璣新授河東河道總督李鴻賓馳往籌堵觀潮隨同搶辦旋以北岸黃沁廳武陟汛縷隄漫水敕觀潮專司堵築九月馬營壩決全河下注蘭陽儀封復決諭曰葉觀潮辦理不善若不嚴行懲治何以示儆著將葉觀潮先在北岸工次枷號北岸工竣再移至南岸工次枷號俾通工人員皆知儆畏俟大工合龍再發往伊犁效力贖罪該革員誤工糜帑此時姑免籍沒著伊自矢天良先竭力措交銀兩以助工需十月李鴻賓自以不勝任辭職宥觀潮罪復授河東河道總督不予頂帶十一月因壩工遲延嚴飭之二十五年三月馬營壩大工合龍旋以南岸儀封三堡漫口褫職留工效力十二月儀封大工合龍因督辦引河出力命以道員選用道光元年卒子椿齡候選員外郎。

張文浩

張文浩順天大興人入貲爲布政司經歷投效東河工竣發南河嘉慶十年授山清外河同知。

屢以河溢奪職。尋復之。補外河南岸同知。十九年。河督吳璵奏調赴隄。工委用。擢署淮海道。三十四年。河溢僣封。復決武陟馬營壩。調辦馬營壩工。工竣。賜花翎。儀封決口猶未塞。仁宗以吳璵年老。令文浩署河東河道總督。專駐工次。疏陳築壩挑河估銀四百五十萬。報可。工竣。晉二品頂戴。兼兵部侍郎銜。道光元年。春。欽天監奏。彗星出東壁。分野在衛地。占主大水。敕文浩防範。侍郎吳烜請加高河隄。文浩疏言。河灘高下不齊。長隄千餘里。未能一律增高。請加子堰二三尺。從之。實授河道總督。三年。丁母憂。服未闋。以畿輔連年水患。召署工部侍郎。偕三品卿繼昌勘南北運河。及永定河漫溢。詔繼昌還。文浩駐工會辦。工竣。與總督蔣攸銛合疏陳直隸河道漫水未涸。無從查勘。考詢各處隄埝。無不壅塞殘廢。每年二月。方可動工。五月。即須停止。工繁時促。斷難同時興作。請於來歲春融。周歷履勘。分別緩急估辦。又言。永定河爲患。固由下口不能暢流。亦由上游無所宣洩。請修築重門閘。添設減水壩。又近年河流每多側注北岸。宜添築越隄以爲重障。四年。春。授江南河道總督。其秋。糧艘回空。黃河高於清水。停阻河北者數月。詔切責。降三品頂戴。命設法蓄清。以資浮送。十一月。始全數渡黃。會洪澤湖漲水未消。高堰十三堡隄潰萬一千餘丈。山旰周橋悉浪卷。亦過水八九尺。各壩漫溢。宣宗怒。褫文浩職。命尙書文孚。汪廷珍。馳勘。劾文浩禦黃壩應閉不開。五壩應開不開。蓄清過旺。以致潰決。命於工次枷

號一月遣戍新疆回疆軍事起。繙營效力。事平請釋回不許。十六年卒於戍所。

### 姚祖同

姚祖同字亮甫。浙江錢塘人。乾隆四十九年南巡。召試賜舉人。授內閣中書。充軍機章京。累遷兵部郎中。以纂輯勦平教匪方略。擢四五品京堂。補鴻臚寺少卿。歷通政司參議。內閣侍讀學士。鴻臚寺卿。二十年出爲河南布政使。請限制河工提款。清釐州縣交代。庫儲頓充。二十一年調山西。又調直隸。嚴查虧空。令州縣自報虧數。凡新任不得私受前任舊虧。其新虧者勒停升補。倉穀自經饑稔兼軍需支領。蕩然無餘。祖同飭各屬糴補數十萬石。雄縣安州高陽諸縣水道淤阻。連年漫溢。並遴員治理。相機疏濬。二十二年畿輔旱災。重者二十有九州縣。先令停征。截漕備賑。徧歷災區。勸屬吏辦振不實者。發米賈囤積數十萬石。責令平糶。民賴以濟。二十三年仁宗東巡。灤河漲溢。祖同督造橋工成。賜花翎。面諭曰。是非爲橋工。因汝能實心辦事耳。二十四年擢安徽巡撫。會河南大水。灌入渦河。下游諸縣被災。祖同乘小舟巡視賑卹。二十五年調河南。時儀封大工未竣。黃沁並漲。漫及馬營工壩尾。祖同相機培禦。疏陳政務雖多。河工爲重。學習河務以履勘爲先。宣宗初即位。命祖同每屆旬以大工進占丈尺奏聞。及冬口門漸狹。



而大河冰堅。祖同親乘小舟督工鑿冰。歲杪大工始告成。道光元年祖同疏陳河南情形。略曰。河工之敵。境顯而易見。民生之凋瘵。隱而難治。河工加價。自常賦三百六十餘萬外。逾額攤徵。衡工未已。隍工繼之。隍工未已。馬工儀工又相繼接徵。此外復有各處隍工。隨時攤徵之款。民力其何以堪。請概停緩三年。以紓積困。從之。開封護城大堤。河溢時半圯。請繕完以資保障。二年河督嚴燮奏。請馬營壩工拋護碎石。已奉命允。復命祖同籌度。祖同言。時常大隍放淤。遏其奔衝。既非順水之性。伏秋盛漲。壩西水勢加高。上游隍埝愈險。則河北可虞。且慮攔沁。轉致攔黃。於實事爲未便。乃下煇摺議。卒如祖同言。初儀工經費。自祖同嚴覈弊竇。省帑金甚鉅。迨工員報銷。截長補短。漸合成例。言官以浮冒入奏。二年命左都御史玉麟。王鼎按之。事得白。而以八子錢五萬六千餘緡。責祖同償補。八子錢者。工員以雜用不敷。議以銀易錢。銀一兩加扣八十文。祖同置弗問。卒以罷議。降補太常寺少卿。五年授廣東按察使。請建流芳祠。以祀關中士女之死節義者。六年詔來京。另候簡用。七年授廣東按察使。尋偕尙書陳若霖赴湖北。察勘京山王家營隍工。未幾召授通政司副使。累遷左副都御史。十八年以年老重聽。原品休致。二十二年卒。

## 嚴 娘

嚴娘字小農。浙江仁和人。嘉慶中入貲爲通判。發南河。累擢徐州道。丁母憂。道光元年服闋。授河南河北道。尋命以三品頂戴署河東河道總督。三汛安瀾。乃實授。汝水漫決既塞。疏言運河北路。以蓄汶敵衛爲最要機宜。必使汝水層層擡高。然後能敵衛水。請加高臨清口磚閘。資收蓄。從之。初黎世序治南河多用碎石。乃奏請敕東河仿行。娘取其說。請於馬營北岸挑壩仿南河拋護碎石。估工需銀十萬兩。布政使程含章巡撫姚祖同先後言其不便。而馬營既放淤壩。前水勢已緩。娘仍請於壩尾沁水灌注之所。拋護碎石。從之。四年南河高家堰潰決。調娘江南河道總督。五年與尙書文孚汪廷珍合疏。陳蓄清敵黃爲河務第一關鍵。蓄清全賴湖隄。隄潰則清水洩枯。重運經臨。無以資浮送。擬遵古人成法。借黃濟運。所慮運河窄小。黃流湍悍。多則不能容納。少則必致膠淺。議於禦黃壩外建壩三道。鉗束黃流。俾有節制。又添築繕道。以資用水行穰。襄陽兩廳長河挑挖淤淺。幫培隄身。並豫儲料物。隨時築壩。逼溜刷淤。禦黃壩未啟。則先挑高堰引河。道清水入運。將啟則嚴堵束清。杜黃水入湖。至修復湖隄。必乘天寒水涸。取土較易。擬就近採料。限大汛前砌高十層。備湖水漸長。共需帑銀三百萬。又議覆侍郎朱士彥條

上南河事宜。大要拆修高家堰壩工。先築越壩。以便工作。並於石隄外拋碎石坦坡。可期永無塌卸。又於王家壩減壩內鹽河加築隄埽。及仁義禮舊壩處所添建石滾壩。以防異漲。並如議行。於是偕孫玉庭等會辦重運。至五月禦黃壩啓放後。河道仍淺滯。漕船不能通行。就近盤壩。劄運難繼。玉庭被重譴。娘亦鵠級留任。娘既因濟運事不敢擅離。不能巡河勘工。兩江總督琦善以爲言。乃命娘周歷履勘。仍諭蓄足清水。爲來年敵黃濟運之計。娘疏言。從前黃河底深。湖水收至數尺。即可外注。隄身不甚喫重。今則湖水必蓄至二丈。始可建瓴而刷黃。以四百里浩瀚之湖水。恃一線單隄爲之護。西風衝擊。勢必潰決。擬仿成法。於隄外築碎石坦坡。護隄既固。則湖水可蓄。又偕琦善奏陳。刷黃必須湖水收至二丈。上年湖水丈七寸餘。即致失事。刻下清水萬難蓄足。惟有蓄清減黃二法並行。碎石護隄。所以蓄清。改移海口。所以減黃。詔妥籌具奏。尋又會陳山王營減壩至灌河口。可導黃入海。查灌河口外海灘高仰。轉無把握。惟拋碎石坦坡。可漸收蓄清刷黃之益。需費六百餘萬。應分年辦理。六年洪湖石工既竣。娘知工未堅固。實不足恃。遂堅主碎石之工。每年拋石三十萬方。八年始能告成。宣宗怒斥娘調任以來。一籌莫展。禦黃壩至今不能啓放。辦理不善。念在東河修守。尙無貽誤。降三品頂戴。署河東河道總督。七年實授。復二品頂戴。以蘭陽柴壩西北頂衝。前拋碎石已著成效。遇伏秋汛漲。仍形喫重。請

加寬坦坡。八年請繕拋下北蘭儀兩廳碎石，並於中河祥河險工儲石備防。十一年命侍郎鍾昌等抽查東河料塼，祥河曹者兩廳料塼虛糝殘朽，煇坐失察，降三品頂戴，鑄四級留任。尋以病請開缺。十三年病痊到京，疏陳浙江海塘事宜。十四年命偕侍郎趙盛奎往勘，請分別緩急，改修柴埽，以護塘根。歲撥銀五萬備修費，從之。尋命毋庸在工督辦，復以病乞歸。十五年河東河道總督吳邦慶劾煇虛拋碎石，並收受紅封盤費，以運同降補。二十年卒。

### 張井

張井字芥航，陝西膚施人。嘉慶六年進士，以內閣中書用，改知縣。銓授廣東樂會，引見，特命改河南正陽，調祥符，遷許州直隸州知州。襄辦馬營壩大工，加知府銜，署汝甯知府。道光四年擢開歸陳許道，尋以三品頂戴署河東河道總督。五年秋汛安瀾，乃實授。增培黃河南岸隄工，並修泉河隄，濬各湖斗門引渠，疏陳河工久遠大計。略曰：今日之黃河有防無治，每遇伏秋大汛，司河各官奔走搶救，竭蹶情形，惟日不足。及至水落霜清，則以目前可保無虞，不復求疏刷河身之策。漸致河底墊高，清水不能暢出，並誤漕運。又增盤壩起剝及海運等費，皆數十年來斤斤於築隄鑿埽，以防爲治，而未深求治之之要，有以致之也。當此河底未能疏濬之時，惟仍守

舊規以隄束水而水不能攻沙。河身日形淤墊。必得有刷深之方。始可遂就下之性。宣宗聽其言。命偕兩江總督琦善。南河總督嚴烺。河南巡撫程祖洛。籌議。遂赴南河會勘。六年。疏言。黃河病在中滿。淤墊過甚。自應因勢利導。擬仿前大學士阿桂改河避險之法。導使繞越高淤。於安東東門之北。別築新隄。以北隄改作南隄。中間抽挑引河。傍舊河而行。至絲網濱以下。仍歸海口。無淤灘阻隔。似可暢順東趨。去路既暢。上游必掣。深得黃與清平立。啓禦黃壩。挑逼清水。暢出刷黃。自有建瓴之勢。詔嘉其有識。調江南河道總督。與總督琦善及副總河潘錫恩會議。以改河避淤。口門有碎石阻遏。諸多窒礙。請開放王營減壩。以期減落黃水。刷滌河身。從之。既而給事中楊煊奏。啓放減壩。黃流湍急。鹽河勢難容納。恐滋流弊。援嘉慶間減壩兩次漫口情形。爲證。復下詳議。并言煊稽考成案。於今昔情形。似未周知。昔年開壩漫口。時在五月。本年啟放。定在霜後。來源無慮。續漲。惟現據委員稟稱。去路未見通暢。是煊所奏。不爲無見。因思啟壩時。水勢或可暢達。堵合後。全河仍必抬高。恐徒深四邑之災。無補全河之病。請仍改河避淤。上斥并持論游移。不許。是秋。開放減壩。如期堵合。被褻敍。七年春。汛黃水倒漾。仍高於清水。御壩驟難啟。放漕船。倒塘灌漣。自請治罪。降三品頂戴。命大學士蔣攸銛。尙書穆彰阿。往勘。會黃水低落。啟禦壩。漣運船幸得全渡。詔斥并急於求功。泥於師古。革職留任。以觀後效。八年。疏陳要工四

事。黃河接築海口長隄。並於下游多築埽壩。以資刷掣。洪澤湖添建滾壩。加寬湖隄。南運河移建昭關壩。加幫兩岸埽隄。北運河修復劉老澗石滾壩。補還南岸埽隄。命郁統英和會同蔣攸銛查勘。以添築埽壩。不能疏通積淤。海口築隄。可從緩辦。餘如議行。九年以兩屆安瀾。復二品頂戴。諭相機規復河湖舊制。疏言南河利害。全係清江。必清水暢出。助黃刷淤。則河與漕兩治。惟黃水積淤。必清高於黃數尺。又必啟壩時多。閉壩時少。乃能暢出濬刷。現在清水能出。僅免倒灌。不誤漕行。殊未易收刷濬之效。十二年桃源縣民聚衆私掘官隄掣溜。致成決口。革職暫留任效力。御史鮑文淳宗人府丞潘錫恩並言黃水入湖。恐妨運道。命穆彰阿陶澍會勘籌議。疏陳黃水入湖後。即由吳城七堡仍入黃河。僅淤沿隄。不及湖中。未入束清壩。不致病及運河。正河乾涸。正可將桃南桃北兩廳間大加挑濬。除去中滿之患。十三年于家灣合龍。予四品頂戴。尋引疾歸。十五年卒於家。井任兩河凡十年。初治南河。銳意任事。泊興大工。糜帑三百餘萬。而無成效。仍爲補苴之計。用灌塘法。較勝借黃之險。勤於修守。世稱其亞於黎世序云。

潘錫恩 子駿文

潘錫恩字芸閣。安徽涇縣人。嘉慶十六年進士。選庶吉士。授編修。大考第一。超擢侍讀。道光四

年復大考一等。擢侍讀學士。時河患急。錫恩上疏條陳河務。略曰。蓄清敵黃爲相傳成法。大汛將至。急堵禦黃壩。使黃水全方東趨。今年漕艘早渡。因禦黃壩遲堵。以致倒灌停淤。釀成大患。且欲籌減洩。當在下游。乃輒開祥符牐減黃入湖。壩口已灌於下。牐口復灌於上。黃水俱無出路。湖底淤墊極高。若更引黃入運。河道淤滿。處處壅溢。恐有決口之患。宣宗聽其議。五年命以道員發往南河。補淮揚道。六年加三品頂戴。授南河副總河。九年母憂去官。服闋。授光祿寺卿。歷宗人府府丞。左副都御史。督順天學政。擢兵部侍郎。調吏部。仍留學政。十九年內監狄文學以婢考試被黜。至錫恩私宅。言所取錄多出請託。挾制訛詐。錫恩疏聞。特詔論文學大辟。二十二年疏言黃河自桃北崔鎮汛蕭家莊北決口。穿運河。壞遙隄。歸入六塘河。東注正河。自揚工以下斷流。去清口約有六七十里之遠。回空漕船阻於宿遷以上。臣前任淮揚道時。詳辦戽水通船之法。行之十餘年。幸無貽誤。今若於中河西口外築箝口壩。添設草牐。以爲黃水啟閉之用。即將楊家壩作攔清堰。以爲清水啟閉之用。就中河運道爲一大塘。道里長則容船衆。兩次啟閉。漕船可以全渡。惟黃水先已灌入運河。中泓淤墊。兩岸繚隄亦恐有衝缺。趕緊修濬。計需費亦不甚多。此時果可回空。來年即可出重。則蕭莊決口不妨從緩堵築。儻此法趕辦不及。祇有竟用引黃濟運之法。其臨黃箝口壩草牐照式築作。引黃水入壩送船。沿途多築對頭小壩。

以偪溜刷深。庶免淤滯之患。迨出楊莊。匯入清河之水。即可牽挽南行。蓋南岸不可借黃者。恐其淤湖淤運。今所引黃水。一出楊莊口。仍歸舊河。自可用清口之水。以刷滌之。應無流弊。並以圖說進。下河督麟慶議行。麟慶亦主用灌塘法。與錫恩言合。尋代麟慶爲江南河道總督。時揚工漫溢。尙書敬徵等查勘堵築決口。開挖引河。接挑長河淤墊。估銀五百七十萬兩。有奇。御史雷以誠奏決口無庸堵合。祇須改舊河爲支河。以通運道而節糜費。下錫恩會議。錫恩奏覆。灌口非可行河之地。北岸無可改河之理。請仍堵築決口。漕船回空。仍由中河灌塘。命侍郎成剛。府尹李德赴工。會同錫恩督辦。二十三年。夫工以下挑河四萬一百九十餘丈。工竣。啓除界壩。放水通暢。會河南中牟河決。黃水注湖。請放山旰各壩。宣洩湖水。並將夫工導出湖水引入中河。暫濟鹽柴轉運。復以上游河水陡落。間有淤墊。請改估蕭工以下未挑之工。並挑築大隄。單薄卑矮處。是秋湖水接長。掣卸高堰石工四千餘丈。搶護未決。二十四年。黃流未復。故道急籌濟運。並宣洩湖水。請啓放外南廳屬順清河。導引入河歸海。軍船抵壩。即由其處放渡。並於外南之北。擱黃壩址築鉗口土壩。以資停蓄。尋奏黃河上游六月間陡長水丈餘。山旰林家西壩。舊義河直壩及仁義河中。間攔堰間有掣塌。補修完密。裏河揚三廳承受洪湖之水。兩岸鱗隄。舊有護埽者。致多刷墊。亦擇要加鑿。二十五年。中牟工始合龍。南河連年無險。二十八年。以病



乞歸。咸豐中命在籍治捐輸團練。八年前江西巡撫張芾劾其勸捐無狀褫職。同治三年捐京倉米折復原銜。命赴安徽廬州會辦勸捐守禦事。五年鄉舉重逢。加太子少保。六年卒。漕運總督張之萬疏陳錫恩治績。賜祭葬。諡文慎。入祀鄉賢祠。子駿文。入貴爲刑部郎中。改山東知府。咸豐末捻匪犯省城。駿文率兵團迎擊於段家店。却之。署青州。平淄川鳳皇山土匪。擢道員。同治中巡撫閻敬銘丁寶楨皆倚之。從寶楨會勦捻匪。塞河侯家林功尤多。授兗沂曹道。光緒中遷按察使。坐事降調。以諳習河事。仍留山東。歷治上下游要工。調河南鄭工。專任西壩。以合龍愆期革職留工。工竣復原官。授山西按察使。護理巡撫。遷福建布政使。十九年卒於官。山東士民以其治河功。請建專祠。

### 林則徐

林則徐字少穆。福建侯官人。少警敏。有異才。年二十舉鄉試。巡撫張師誠辟佐幕。嘉慶十六年進士。選庶吉士。授編修。歷典江西雲南鄉試。分校會試。遷御史。疏論福建閩安副將張寶以海盜投誠。宜示裁抑。以防驕蹇。被嘉納。未幾出爲杭嘉湖道。修海塘。興水利。道光元年聞父病。引疾歸。二年起授淮海道。未之任。署浙江鹽運使。遷江蘇按察使。治獄嚴明。四年大水。署布政使。

治賑。尋丁母憂。命赴南河。修高家堰隄。工竣。回籍。六年。命署兩淮鹽政。以未終制辭。服闋。補陝西按察使。遷江甯布政使。父憂歸。十年。補湖北布政使。調河南。又調江甯。十一年。擢河東河道總督。疏陳楛料爲河工第一弊。數親赴各廳察驗。又言碎石實足爲埽工之輔。應隨宜施用。十二年。調江蘇。巡撫吳中。存饑。奏免逋賦。籌撫卹。前在藩司任。議定賑務章程。行之有效。至是仍其法。宿弊一清。賑竣。乃籌積穀備荒。清釐交代。盡結京控諸獄。考覈屬吏。疏言察吏莫先於自察。必將各屬大小政務。逐一求盡於心。然後能以驗羣吏之盡心與否。如大吏之心。先未貫徹。何從察其情僞。臣惟持此不敢不盡之心。事事與僚屬求實際。詔嘉之。勉以力行。先是總督陶澍奏濬三江。則徐方爲臬司。綜理其事。旋以憂去。至是黃浦吳淞工已竣。則徐力任未竟者。劉河工最要。撥帑十六萬五千有奇。自蒞次要。官紳集捐十一萬兩。同時開濬。以工代賑。兩河舊皆通海。易淤。且鑿河工鉅。改爲清水。長河與黃浦吳淞交匯通流。各於近海修開建壩。泥沙不能壅入。內河漲則由壩洩出歸海。復就原河逢灣取直。節省工費三萬餘兩。用濬附近劉河之七浦河及附近白茆之徐六涇東西護塘諸河。又濬丹徒丹陽運河。寶帶橋泖澱諸工。以次興舉。爲吳中數十年之利。兩署兩江總督。十七年。擢湖廣總督。荆襄歲罹水災。大修隄工。其患遂弭。整頓鹽課。以減價敵私無成效。專嚴緝私之禁。銷數大增。湖南鎮寧兵悍。數肇釁。巡

閱撫馭。密薦總兵楊芳擢爲提督。移駐辰州。慎固苗疆屯防。十八年鴻臚寺卿黃爵滋請禁鴉片烟。下中外大臣議。則徐請用重典。言此禍不除。十年之後。不惟無可籌之餉。且無可用之兵。宣宗深韙之。命入覲。召對十九次。授欽差大臣。赴廣東查辦。十九年春至。總督鄧廷楨已嚴申禁令。捕拏烟犯。洋商查頓先避回國。則徐知水師提督關天培忠勇可用。令整兵嚴備。檄諭英國領事義律查繳烟土。驅逐躉船。呈出烟土二萬餘箱。親莅虎門驗收。焚於海濱。四十餘日始盡。請定洋商夾帶鴉片罪名。依化外有犯之例。人即正法。貨物入官。責其甘結。他國皆聽命。獨義律枝梧未從。於是閱視沿海礮臺。以虎門爲第一門戶。橫檔山武山爲第二門戶。大小虎山爲第三門戶。海道至橫檔分爲二支。右多暗沙。左經武山前水深。洋船由之出入。關天培創議於此。設木排鐵練二重。又增築虎門之河角礮臺。英國商船後至者不敢入。義律請令赴澳門載貨。冀陶烟私販。嚴斥拒之。潛泊尖沙嘴外洋。會有英人毆斃華民。抗不交犯。遂斷其食物。撤買辦工人以困之。七月義律藉索食爲名。以貨船載兵犯九龍山礮臺。參將賴恩爵擊走之。疏聞。帝喜悅。報曰。既有此舉。不可再示柔弱。不患卿等孟浪。但戒卿等畏葸。御史步際桐言出結徒虛文。則徐以彼國重然諾。不肯出結。愈不能。不向索取。持之益堅。尋義律浼澳門洋商轉圜。願令載烟之船回國。貨船聽官查驗。九月商船已具結進口。義律遣兵船阻之。開礮來攻。關天

培率游擊麥廷章奮擊敗之。十月又犯虎門。官涌官軍分五路進攻。六戰皆捷。詔停止貿易。宣示罪狀。飭福建浙江蘇嚴防海口。先已授則徐兩江總督。至是調補兩廣。府尹曾望顏請罷各國通商。禁漁船出洋。則徐疏言。自斷英國貿易。他國喜此。盈彼絀。正可以夷制夷。如概與之絕。轉恐聯爲一氣。粵民以海爲生。概禁出洋。其勢不可終日。時英船寄碇外洋。以利誘奸民。接濟銷烟。二十年春。令關天培密裝礮械。雇漁船蛋戶出洋設伏。候夜順風。縱火焚燬附夷匪船。接濟始斷。五月再焚夷船於磨刀洋。謀知新來敵船揚帆北嚮。疏請沿海各省戒嚴。又言夷情詭譎。若逕赴天津求通貿易。請優示懷柔。依嘉慶年間成例。將遞詞人由內地送粵。六月英船至廈門。爲閩浙總督鄧廷楨所拒。其犯浙者。陷定海。掠甯波。則徐上疏自請治罪。密陳兵事。不可中止。略曰。英夷所憾在粵。而滋擾於浙。雖變動出於意外。其窮蹙實在意中。惟其虛憍性成。愈窮蹙時。愈欲顯其桀驁。試其恫喝。甚且別生秘計。冀售其奸。一切不得行。仍必帖耳俛伏。第恐議者以爲內地船礮非外夷之敵。與其曠日持久。不如設法羈縻。抑知夷情無厭。得步進步。威不能克。患無已時。他國紛紛效尤。不可不慮。因請戴罪赴浙。隨營自效。七月義律至天津。投書總督琦善。言廣東燒烟之變。起自則徐及鄧廷楨二人。索價不與。又遭詬逐。故越境呈訴。琦善據以上聞。上意始動。時英船在粵窺伺。復速敗之。蓮花峯下及龍穴湖。捷書未上。九月詔曰。

鴉片流毒內地。特遣林則徐會同鄧廷楨查辦。原期肅清內地。斷絕來源。隨地隨時妥爲辦理。乃自查辦以來。內而奸民犯法。不能淨盡。外而輿販來源。並未斷絕。沿海各省紛紛徵調。糜餉勞師。皆林則徐等辦理不善之所致。下則徐等嚴議。飭即來京。以琦善代之。尋議革職。命仍回廣東。備查問差委。琦善至。義律要求賠償烟價。廈門福州開埠通商。上怒。復命備戰。二十一年春。予則徐四品卿銜。赴浙江鎮海協防。時琦善雖以擅與香港逮治。和戰仍無定局。五月詔斥。則徐在粵不能德威並用。褫卿銜。遣戍伊犁。會河決開封。中途奉命襄辦塞決。二十二年工竣。仍赴戍。而浙江江南師屢敗。是年秋和議遂成。二十四年新疆興治屯田。將軍布彥泰請以則徐綜其事。周歷南八城。濬水源。闢溝渠。墾田三萬七千餘頃。請給回民耕種。改屯兵爲操防。如議行。二十五年召還。以四五品京堂候補。尋署陝甘總督。二十六年授陝西巡撫。留甘肅。偕布彥泰治叛番。禽其酋。二十七年授雲貴總督。雲南漢回互鬪。焚殺歷十數年。會保山回民控於京。漢民奪犯。燬官署。拆瀾滄江橋以拒。鎮道不能制。則徐主止分良莠。不分漢回。二十八年親督師往勦。途中聞彌渡客回滋亂。移兵破其巢。殲匪數百。保山民聞風股栗。縛犯迎師。誅其首要。散其脅從。召漢回父老諭以恩信。遂搜捕永昌順甯雲州姚州歷年戕官諸重犯。威德震洽。邊境乃安。加太子太保。賜花翎。二十九年騰越邊外野夷滋擾。遣兵平之。以病乞歸。逾年文宗

嗣位。學詔宜召未至。以廣西逆首洪秀全稔亂。授欽差大臣。督師進勦。並署廣西巡撫。行次潮州病卒。則徐威惠久著南服。賊聞其出。皆震悚。中道遽歿。天下惜之。遺疏上。優詔賜卹。贈太子太傅。諡文忠。雲南江蘇並祀名宦。陝西請建專祠。則徐才識過人。而待下虛衷。人樂爲用。所莅治績皆卓越。道光之季。東南困於漕運。宣宗密詢利弊。疏陳補救本原諸策。上幾輔水利議。文宗欲命籌辦而未果。海疆事起。時以英吉利最強爲憂。則徐獨曰。爲中國患者。其俄羅斯乎。後其言果驗。

### 吳邦慶

吳邦慶字壽峯。順天霸州人。以拔貢官昌黎訓導。嘉慶元年成進士。選庶吉士。授編修。遷御史。巡視東漕。奏請重浚運河。並復山東春兌春開舊制。數論河漕事。多被採用。十九年擢鴻臚寺少卿。命偕內閣學士穆彰阿督潞北運河。累遷內閣侍讀學士。二十年出爲山西布政使。調河南。謫理巡撫。二十三年擢湖南巡撫。調福建。未之任。湘潭土客民羣鬪。死傷甚衆。侍郎周系英面陳與邦慶疏奏有異。命總督慶保往按。邦慶亦發系英私書。系英獲譴。邦慶鑄級。以三品京堂用。補通政使。二十五年擢兵部侍郎。調刑部。尋授安徽巡撫。黃水注淮。鳳潁被災。而皖南苦

早親赴災區振撫。涇縣民徐飛瀧傷斃。邦慶誤聽承審官。謂由於徐孝芳捏傷圖賴。奏捕之。激衆拒捕。命兩江總督孫玉庭鞠治。得其狀。詔斥邦慶幾釀冤獄。部議革職。予編修。累遷少詹事。十年授貴州按察使。未之任。予三品卿銜。署漕運總督。尋實授。禁糧船裝載蘆鹽。請緝拿沿河窩頓。十一年調江西巡撫。十二年授河東河道總督。以不諳河務辭。不許。初嚴烺在東河。多用碎石拋護。歷年歲料未有節省。詔飭覈減。邦慶疏請酌改舊章。每年防料經費。四成辦積。六成辦石。蘭儀商虞下北三廳現工險要。仍專案請辦碎石。所議六成之石。積儲數年。使各廳皆存二千方。緩急可恃。則專案之石亦可逐年遞減。從之。武涉攔黃堰民築民修。嗣歸廳管。工段歲增。十三年奏定畫界立石。官民分守。如有新生埽工。先借帑辦理。按河北三府攤徵歸款。以山東運河全賴泉源灌注。請復設泉河通判。以專責成。壽東汛滾水壩外舊有土堰。爲蓄汶敵衛。以利漕運。大水鄉民私開釀事。奏立誌椿。濟運之水以七尺爲度。重運過竣。啟堰以利農田。如議行。初邦慶著畿輔水利叢書。後在官。考河南通省志乘。所載有水田處。臚列其水之衰旺。既田多寡之數。爲渠田說。修防之暇。率道廳捐資造水車。就馬營壩北及蔡家樓大窪積水地七千餘畝。試行墾治。先是邦慶因石碎工劾嚴烺。罷之。既而給事中金應麟亦劾邦慶保舉過濫。動撥過多。十五年命大學士文孚山東巡撫鍾祥按之。坐違例調地方人員改歸河工。及以屬

員爲幕僚廳員饋銀不奏參。被職詔復斥其參劾嚴煊遲至三年之久亦屬取巧。念在任三屆安瀾加恩復予編修年已七十遂告歸二十八年卒。

### 麟慶

麟慶字見亭。元顏氏。滿洲鑲黃旗人。嘉慶十四年進士。授內閣中書。遷兵部主事。改中允。道光三年出爲安徽徽州知府。調潁州。擢河南開歸陳許道。歷河南按察使。貴州布政使。護理巡撫。十三年擢湖北巡撫。尋授江南河道總督。丁母憂。改署理。服闋乃實授。疏陳籌辦南河情形。略曰。近年河湖交敝。欲復舊制。不外蓄清刷黃。古人引導清水。三分濟運。七分刷黃。得力在磨盤埽。自廢棄後。河務漸壞。擬規復磨盤埽舊制。洪澤湖水甚寬。高家堰工絕險。各壩多封柴土。蓄水盛漲。啟放輒壞壩底。糜費不貲。應仿滾水壩成法。抬高石底。至蓄水尺寸爲度。山圩五壩暨下游楊河境內車邏等壩。一遵奏定丈尺。啟放水。定即行堵合。至黃河各工。當體察平險。節可緩之埽段。辦緊要之土工。一切疏浚器具。祇備運河挑挖。若黃河底淤。非人力所能強刷。惟儲備料工。遇險即搶。以防爲治。而其要全在得人。又以蘆葦爲工程必需。右營湯地荒廢。蘆葦不足。請築圩蓄水。以資灌溉。疏入。詔嘉其言正當。勸慎勉從事。十四年以洪澤湖老子山西北挑



砌石壩。東西沙路加築碎石。高出湖面。以便水師巡哨。及商民停泊。疏請淮海常鎮等道。另案用銀。詔以南河連歲安瀾。而工用日增。切責之。十九年。修惠濟正閘。福興越閘。會河湖並漲。險工疊生。請例外撥銀五十萬。詔允之。戒嗣後不得援例。署兩江總督。二十一年。河決祥符。黃水匯注洪澤湖。南河無事。詔嘉其化險爲夷。子議敘。二十二年。英吉利兵艦入江。命籌淮揚防務。以保運道。請以鹽運使。但民倫備防揚州。以清江爲後路策應。捕內匪陳三虎等。誅之。秋。河決桃北。崔鎮汛。值漕船回空。改由中河灌塘。通行無誤。詔念防務及濟運勞。革職免罪。二十三年。發東河中牟工效力。工竣。以四品京堂候補。尋予二等侍衛。充庫倫辦事大臣。乞病未行。病痊。仍改四品京堂。尋卒。著有黃運河口古今圖說。河工器具圖說。子崇實。崇厚。並自有傳。

### 栗毓美

栗毓美。字樸園。山西渾源人。嘉慶中。以拔貢。考授知縣。發河南。歷署溫孟安陽河內西華。補甯陵。所至著績。父憂歸。道光初。服闋。補武陟。遷光州直隸州知州。擢汝甯知府。調開封。歷糧鹽道。開歸陳許道。湖北按察使。河南布政使。護理巡撫。十五年。擢河東河道總督。毓美自爲令時。於黃沁隍工馬營壩工。皆親其事。勤求河務。時串溝久爲河患。串溝者在隍河之間。始僅斷港。積

水久而溝首受河，又久而溝尾入河，於是串溝遂成支河，而遠隄十餘里之河變爲切近隄身，往往潰隄，疏美莅任，乘小舟周歷南北兩岸，時北岸原武汛串溝受水已三百丈，行四十餘里至陽武，溝尾復灌入大河，又合沁河及武陟滎澤諸灘水，畢注隄下，兩汛素無工，無稽石隄，南北皆水，不能取土築壩，毓美乃收買民輓，拋成輓壩數十所，工甫就而風雨大至，支河首尾皆決數十丈而隄不傷，於是始知輓之可用，疏陳辦理情形，以圖說進，尋又疏言王屋莊進水之口較前更寬百餘丈，由中流大灘益向南淤，溜勢南緩而北緊，南股正河成爲迂道，北股之溜勢轉建瓴，其故由廣武山前老灘坍千餘丈，溜趨山根，爲山所遏，折回東北，中流挺生淤灘，水口旣日見刷寬，從省估計，約需銀十餘萬兩，至原陽兩岸隄根，因沿陂試拋輓塊，深資假護，月石壩堵合，加高幫寬，迺下楊封封邱二汛，灘水已停淤壩下，七十餘村莊居民安堵，惟串溝分溜，關繫北岸全局，不能緩至來年興工，已借撥銀兩估辦，允之，是役支河危險，賴輓工化險爲平，尋偕巡撫桂良勘奏，老河分溜已有六分，王屋莊口寬勢順，輓土各壩未可深恃，原武十六堡當其頂衝，並有秦家廠鹽店莊各灘水，串溝分注十七堡，當支河尾閘，皆險要，請購料豫防，如議行，十六年擇要挑濬，修築魚臺汛隄岸，改民堰歸運河廳，十八年旱，漕艘阻滯，濬泉源及各湖進水渠道，嚴諸閘啓閉，又濬曹州濟寧河渠，十九年奏定徽山湖收納運水章程，但計水

存丈三尺以內。即築壩蓄水。加高戴村壩。以防旁洩。初毓美以輒工屢著成效。奏請許設審燒造。御史李純疏言其不便。命尙書敬徵往勘。仍請改辦碎石。停止設審。毓美上疏爭之。曰。豫省歷次失事。皆在無工處所。隄長千里。未能處處籌備。一旦河勢變遷。驟遇風雨。輒倉皇失措。幸而搶護平穩。埽工費已不貲。鑲埽引溜生工。久爲河工所戒。味者轉謂非此別無良策。查北岸爲運道所關。往者原陽分溜。幾掣動全河。若非用輒拋護。費何可數計。今祥符下汛。陳留一汛。灘水串注隄根。形勢正與北岸同。濱河土民多有呈請用輒者。誠有見於輒工得力。爲保田廬。情至切也。夫事之有利於民者。斷無不利於國。特事近於創。難免浮言。前南河用石之始。衆議紛如。良由工程平穩。用料減少。販戶不能居奇。工簡務閒。游客幕友不能幫辦謀住。是以妄生浮議。賴聖明獨斷。救下東河試辦。至今永慶平成。惟自用碎石。請銀幾七十餘萬。嗣改辦六成碎石。然因購石不易。埽段愈深愈多。經費仍未能節省。自試辦輒壩。三年未生一新工。較前三年節省銀三十六萬。蓋豫省情形與江南不同。產石祇濟源鞏縣。采運維艱。輒則沿河民鑿不下數十座。隨地隨時無悞事機。且石性滑。入水流轉。輒性澀。入土即黏。卸成坦坡。自能挑溜。每方輒塊直六兩。石價則五六兩至十餘兩不等。碎石大小不一。堆埽半屬空虛。尺輒十塊爲一方。平鋪計數。堆埽均實。每方石重五六千斤。而輒重九千餘斤。是一方石價購輒兩方。而拋輒

一方可當石兩方之用也。或謂輓塊入土易損裂。不知輓得水更堅。拋成輓壩。一經淤泥。即已凝結。或謂拋築輓壩。近於與水爭地。不知隄前之地。尺寸在所必爭。自來鑲埽之法。隄前必先築土壩數十丈。然後用埽鑲設。輓壩則無須乎埽。師土壩之意。不泥其法。拋作坦坡。大溜自然外移。未有可築土壩而不可築輓壩者。上年盛漲。較二年及十二年尤猛迅。輓壩均屹立不移。儀隄中河兩廳河水下卸。塌灘滙壩。搶鑲埽段。旋即走失。用輓拋護。均能穩定。是用輓搶辦險工。較鑲埽更爲便捷。昔衡工失事。因灘陷不能鑲埽。馬工失事。因補隄不能得碎石。使知用埽不如用輓。運輓易於運石。則費省而工已固。見在各廳無工之處。串溝隱患。必應未雨綢繆。若於黃沁下兩豫儲輓塊。則可有備無患。應儲之輓。仍令向民間採買。不必廳員燒造。此外別無流弊。卒如所議行。遂請以四成辦稽之款。改辦輓塊。又疏言從前治河用捲埽法。並有竹絡木困輓石柳葦。自用料鑲埽。以稽料爲正宗。而險無定所。亦無一勞永逸之計。緣鑲埽陡立。易激水怒。其始水深不過數尺。鑲埽數段。引溜愈深。動輒數丈。無工變爲險工。溜勢上提。必須添鑲。溜勢下坐。必須接鑲。片段愈長。防守愈難。新工既生。益形勞費。埽工無法減少。不得已而減土工。少購碎石。皆爲苟且因循之計。自試拋輓壩。或用以杜新工。或用以護舊工。無不著有成效。且輓工不特資經久。而堆儲亦無風火堪虞。從此工固瀾安。益復培增土工。專用力於根本之

地既可免漫溢之患，亦保無衝決之虞。宣宗深嘉納之。巡撫牛鑑入覲，諭以毓美治河得手，遇事毋掣其肘。二十年京察，特予議敘。尋卒。優詔褒惜，贈太子太保。依總督例賜卹。賜其子耀進士，諡恭勤。祀名宦祠。毓美治河，風雨危險，必躬親。河道曲折高下，嚮背皆所隱度。每日水將抵某所，急備之，或以爲迂且勞費。毓美曰：能知費之爲省，乃真能費者也。水至乃大服。在任五年，河不爲患。歿後吏民思慕，廟祀以爲神。數著靈應，加封號，列入祀典。

### 慧成

慧成戴佳氏，滿洲鑲黃旗人。道光十六年進士，改翰林院庶吉士。十八年散館，授檢討。十九年二月大考二等。陞詹事府左春坊左贊善。三月陞翰林院侍講。四月轉侍讀。旋充日講起居注官。五月擢侍講學士。七月充山西鄉試正考官。二十年二月稽察右翼覺羅學。三月陞詹事府詹事。五月充福建鄉試正考官。八月遷通政使司通政使。十二月署理藩院左侍郎。二十一年三月充會試知貢舉。四月充殿試讀卷官。七月河南祥符決口，命慧成偕大學士王鼎前往查辦。旋擢兵部右侍郎。時新任河道總督朱襄尙未到任，上命將應估各工物料與河南巡撫牛鑑趕緊興辦。九月安徽監生劉楹在都察院呈控安慶府知府徐思莊勒派濫押，上令慧成前

往訊辦。尋查明徐思莊並無勒捐分肥等情。劉楹因有他案未結。交縣看管。並非無故濫押。惟於姚祥慶訐告劉瀚事。不干己之案。業經縣訊批示。照例立案不行。徐思莊輒復批准嚴訊。以致姚祥慶挾嫌疊控。殊屬不合。奏請將徐思莊下部議處。從之。十一月授鑲藍旗蒙古副都統。先是慧成前往安徽審案時。御史張庭樺奏湖南保舉人員被控。上命慧成於訊結劉楹案後。馳往湖南查辦。至是查明郴州知州王景章被控各款。並無實據。徵收錢糧亦無浮收濫派情弊。惟不循照舊價折錢。致士民藉口滋訟。請將王景章下部議處。湖廣總督裕泰因王景章平日辦事勤能。列入保舉。尙無不合。湖南巡撫吳其濬以王景章堵緝贖匪喫緊。未便更易生手。被控後請暫緩解任。亦係爲慎重地方起見。裕泰吳其濬請免置議。均從之。二十二年二月以祥符河工被風蝕失埽段。革職留任。旋以大工合龍。開復處分。仍下部優敘。九月署東河河道總督。十一月實授。尋奏添補各廳四成防料。六成碎石。請將河南防料銀兩酌量改辦。甄石以適工用。並查明用存措掣扣銀還司。以歸撙節。又奏勘估運河淤淺工段。確覈土工紋銀數。及南北兩岸搶辦甄埽挑溝各工動撥司庫銀款。均如所請。二十三年二月奏。東省運加河插橋埽壩。並引渠泉河分別挑修。以資利濟。七月奏請暫開捐輸議敘例。以裕工需。皆從之。旋因中河廳九堡隄頂過水。場陷一百餘丈。奪溜南趨。革職留任。閏七月諭曰。慧成身任河道總督。河

務是其專責。乃並不先事預防。致有漫口。前已降旨革職。暫行留任。見在口門塌至三百六十餘丈。較上次祥符漫口情形更爲寬廣。糜帑殃民。厥咎甚重。著即革職。枷號河干。以示懲儆。九月又諭曰。慧成到任甫及數月。與文冲之經歷三汛者。究有不同。著疏枷留於河工。效力贖罪。即交麟魁等差遣委用。二十五年大工合龍。上以慧成在工差委。著有勤勞。以六部員外郎用。二十六年補戶部員外郎。二十八年賞二等侍衛。充科布多參贊大臣。三十年諭令來京。咸豐元年正月。疏言恭閱邸鈔。敬悉皇上納諫求賢。數大端。竇深慶幸。伏思皇上飛龍紀元之始。恐中外臣工。咸侈陳祥瑞。以粉飾太平。自古以來。未有不君臣警惕。而能致隆盛者。請敕下大小臣工。禁止陳奏祥瑞。庶可上下交儆。以迓休和。又言吏治之壞於今已極。今諸臣應詔敷陳。固已詳悉周備。但新章之更定。旣已善其變通。而舊典之詳明。尤宜昭其恪守。請申明舊例。乾綱獨斷。凡中外大吏。聖心默加遴選。將見人人爭自靡厲。以獻其能矣。疏入。詔嘉納之。八月因病奏請開缺。命候伊昌阿到任後。即行回京。二年三月病痊。六月授東河河道總督。九月以捐備軍需。賞戴花翎。十二月署四川總督。三年二月粵匪竄擾江南。時慧成將赴四川。行抵陝西。諭令折回。馳赴江南淮揚一帶。會同漕運總督楊殿邦辦理防勦。並於陝西見調赴防官兵內酌帶數千。與先調之吉林黑龍江精兵馳往江北扼要之處。以資調遣。旋奏徐州鎮總兵苗金鏞

玩視軍務。請予嚴議。又奏調己革知府步際桐及例應迴避之河庫道德良來營差委。均如所請。四月督兵進攻。江南揚州府粵匪方偷搭浮橋。由天寧廣儲兩門地道突出。慧成等先期拏獲奸細。偵知賊情。密約欽差大臣琦善等併力攻擊。大敗之。東關城上亦有賊多人蜂擁而來。慧成率其子翰林院侍講學士晉康及己革江蘇按察使查文經等施放鎗礮。火箭。燒燬望樓。旋派勁兵扼賊竄路。並增築砲臺。臨城俯擊。賊屢出窺伺。均經慧成等擊退。先後殺賊無算。八月授閩浙總督。九月以捐助軍需。下部優敘。十二月賊全股竄至瓜洲。慧成所部兵勇被賊鈔襲。未能堵禦。命褫職。帶罪自效。同治三年卒。子晉康。六品頂帶。前翰林院侍講學士。晉翼。戶部郎中。晉度。戶部筆帖式。

### 楊以增

楊以增字至堂。山東聊城人。道光二年進士。知貴州荔波縣。調貴筑。歷升松桃廳同知興義府知府。廣西左江道。調湖北安襄鄖荆道。治盜有聲。提督羅思舉甚重之。父憂歸。服闋。授河南開歸道。轉兩淮鹽運使。擢甘肅按察使。捕妖民夏長春等。悉平其餘黨。雪貞女冤。致雨。人比之東海子公。遷陝西布政使。時關中旱饑。巡撫林則徐舉以增自代。遂署巡撫。旋實授。禱雪輒應。歲



以大熟諭屬吏曰。三輔土厚民醇。然大災以後。元氣未復。牧民者無事更張也。曾回疆有警。命署陝西總督。總理糧臺。尋授江南河道總督。是時已減河工經費。以增至。悉力楛柱。盡除浮費。嘗除夕風雪中。幕宿河上。薪炭鹽米。不以費屬吏官錢。官吏奮興。工歸實用。較嘉慶中費。不什一。會粵匪犯江甯。兵事日亟。舊費歸河工者。悉移以餉軍。河事倚閣不行。而兵勇備防堵者。方日日索哺。以增先機。籌畫兵食。不見韓漏。兵民安謐。以勞致疾。卒於官。奉恩旨。照軍營病故例。議卹。贈右都御史。廕一子。以知縣用。賜祭葬。諡端勤。祀陝西名宦。本縣鄉賢。國史有傳。

### 徐澤醇

徐澤醇。漢軍正藍旗人。嘉慶二十五年進士。以主事用。分吏部。道光十二年補官。十三年陞員外郎。十七年陞郎中。十九年授四川重慶府知府。二十一年陞山西河東道。二十二年調江南河道。二十三年以拾護南河險工及捐辦江北礮局。均下部議。二十五年陞湖南按察使。二十七年陞山東布政使。二十八年六月擢巡撫。八月奏緝獲著名匪犯過半。並續獲捻幅各匪。上嘉勉之。時山東洋面屢有閩廣匪船闖入劫掠。十月澤醇以閩伍順赴登州親勘。二十九年三月奏請裁山東泉河通判河南陽河通判。允之。閏四月兼署河東河道總督。七月遵議酌

減漕務浮費。九月擢四川總督。三十年三月兼署成都將軍。咸豐二年十一月召來京。十二月授禮部尚書。賜紫禁城騎馬。三年三月孝和容皇后奉安禮成。加二級。旋充會試正考官。四月充殿試讀卷官。八月署戶部尚書。十月充考試漢中書閱卷大臣。十二月議覆署禮部左侍郎。宋晉請明定糧臺減給薪水章程。八年八月命恭送宣宗成皇帝實錄尊藏盛京。十月差旋。因病乞假。十一月卒。賜祭葬。予諡恭勤。

陸應穀

陸應穀字樹嘉。雲南蒙自人。道光壬辰進士。由編修擢御史。出授山西朔平知府。歷官江西巡撫。兼署河道總督。以捐備軍餉。賞戴花翎。入爲刑戶兩部侍郎。降授直隸按察使。多所建白。如添兵禦盜。禁販罌粟。嚴除倉弊。封禁礦洞。蠲緩糧賦。搜掘蛟患。均如所請。撫河南時。值粵匪猖獗。始攻長沙。繼陷武昌。應穀屢上疏。言分兵防勦。扼守襄樊。並陳防堵情形。勦匪事宜。得旨報可。復諭應穀駐紮南陽。相機辦理。已而揚州鎮江各城失陷。河南戒嚴。應穀馳往歸德防堵。擊退永城亳州等處賊匪。擒斬無算。尋賊竄豫境。歸德失陷。應穀馳赴河口。會大兵防勦。而賊已由柘城直撲開封。進犯省城。旋復歸德。解開封圍。賊復由汜水渡河。陷溫縣。進撲懷慶許州等

處經官軍奮擊，賊勢窮蹙，遂竄山西，陷武安，涉縣，擾及直境。京師戒嚴，上以應殺未能先事豫防，致賊渡河北，竄命褫職來京，交巡防大臣差委。先是以應穀講求地理之學，命赴東陵、西陵協同選建，並疏浚各河道。復諭相度平安峪成子峪兩處情形，及勸永陵河道應修各工，授直隸按察使。七年卒。蒙恩追贈巡撫銜。子葆德，同治甲戌進士，授四川榮昌知縣，著有地理或問、抱真書屋詩鈔行世。

### 福濟

福濟字元修，必祿氏，滿洲鑲白旗人。道光十三年進士，選庶吉士，授編修，擢侍講。四遷少詹事。大考二等，復三遷兵部侍郎，兼鑲白旗蒙古副都統，總管內務府大臣，調工部，復調吏部，兼右翼總兵。二十八年命偕右庶子駱秉章往河南、江蘇、山東按事，歸德知府胡希周貪劣鞫實，論如律。河南賈魯河工糜費虛報，工竣河復淤，巡撫鄂順安以下皆坐譴。蘇州知府鍾殿選等濫刑誹盜鞫實，論如律。又按山東鹽運使韋德成計巡撫崇恩，勒令開缺，請交刑部議治。復調戶部。二十九年授正白旗護軍統領，命偕刑部侍郎陳孚恩按山西巡撫王兆琛、賊污兆琛坐譴。三十年轉左翼總兵醫士，辭執中坐妖言得罪，事牽福濟奪官，尋予四品頂戴，署山西按察使。

授山東按察使。咸豐二年授奉天府尹。擢南河道總督。三年調漕運總督。命暫行督辦淮北鹽務。時粵匪踞江寧。擾江北。福濟會琦善敗賊揚州。授安徽巡撫。福濟調漕河標兵六百。自臨淮關赴廬州。疏請飭琦善撥精兵二千扼關山澗溪。防賊北竄。又請仍兼督淮北鹽課。藉濟安徽軍餉。皆允之。四年至廬州。土匪陷六安。下部議處。福濟奏言抵廬後統計調兵約二萬餘。月餉不下十五六萬。請飭浙魯秦晉各撫臣協濟。復請以前江南河道總督潘錫恩安徽學政孫銘恩會辦徽州甯國廣德三府州防勦。俱從之。提督和春以欽差大臣督辦軍務。福濟與會師克六安。收英山霍山。五年十月克廬州。加太子少保頭品頂戴。於是廬江巢縣無爲相繼克復。被優敘。賜御用棉袍。翎管。搬指。荷包。十一月移軍桐城。七年無爲廬州附近各縣復爲賊陷。桐城被圍。屢擊却之。二月賊大至。福濟率兵潰圍出。還駐廬州。詔斥調度無方。下部議處。未幾六安復陷。福濟因病請開巡撫缺。專辦軍務。不許。時安徽本省無兵。軍務實主於和春。賊踞安慶。皖南數郡縣隔。遙轄於浙江。淮北捻匪蔓延。袁甲三任之。巡撫號令所及僅十餘縣。兵後荒蕪。賦稅無出。餽緇兵譁。遣失巡撫關防。自請嚴議。上原之。薄譴而已。會江南大營潰。和春移赴督師。惟總兵秦定三鄧魁士兩軍仍留倚以戰守。粵匪大股由湖北入皖。捻匪縱橫於皖豫之交。省爭調定三魁士二人。奏上。皆報可。福濟依違無可否。定三久攻桐城未下。魁士亦奉命而至。

兩軍爭餉生嫌。賊乘隙撲營。遂致大潰。八年。滁州來安。鳳陽。懷遠。相繼失陷。福濟以病乞假。詔斥日久無功。褫宮衛頭品頂戴。命來京尋授內閣學士。予副都統銜。充西寧辦事大臣。九年。以安插投誠野番功。還頭品頂戴。十年。授工部侍郎。署陝甘總督。兼正黃旗漢軍都統。十一年。授成都將軍。調雲貴總督。文宗崩。福濟奏請謁梓宮。不許。詔斥規避。演黔軍務。褫職。予四品頂戴。仍赴雲南。交署總督。潘鐸差遣。同治元年。予副都統銜。赴西藏查辦事件。道梗未往。四年。還京。六年。授科布多幫辦大臣。調布倫托海辦事大臣。八年。授烏里雅蘇台將軍。九年。回匪陷烏里雅蘇台。褫職。十二年。捐銀助賑。直隸總督李鴻章爲陳在安徽前勞。還原銜。光緒元年卒。依巡撫例賜卹。

## 李鈞

李鈞。直隸河間人。嘉慶二十二年進士。改庶吉士。授編修。歷官刑部左侍郎。咸豐四年。兼署順天府尹。時粵匪北竄。軍需浩繁。鈞司糧臺總局。密疏言賊竄直境。被脅從賊者多。請飭統兵大臣。高豎旂牌。書投誠免罪字。或箭縛招降。諭射入賊營。俾其黨解散。報聞。是年南漕改海運。僅浙江船抵津。上命鈞偕戶部侍郎基溥。工部侍郎文彩。崇實。設局採買米石。鈞等議以國用維

艱若發帑採買。則以銀易錢。既多折耗。以錢買米。又恐侵吞。無論軍需之際。籌款不易。即令儲有米價。而行市不齊。胥吏狡猾。事必紛擾。因奏請立局開捐。照捐銅局新例。斟酌推廣。擬升章程十條。議上。如所請行。充抽查漕糧大臣。賜紫禁城騎馬。五年授河東河道總督。下北廳蘭陽三堡黃流漫口。倡捐塔禦。疏凡十餘上。悉中竅要。九年積勞卒官。

### 黃贊湯

黃贊湯字莘農。江西廬陵人。道光癸巳進士。改庶吉士。授編修。幼入塾。即愛誦程子四箴。范氏心箴。父庭訓嚴。官編修時。迎養至京。中秋家饌稍豐。夜呼贊湯跪階前。斥之曰。爾甫入翰林。飲食便有官氣。用奢則取不廉。他日臨民。尙能有守邪。由國史館纂修補御史。疏言外國就撫。預防失業民夫。遷吏科給事中。擢奉天府府丞兼學政。命會辦事件。上稱明慎。稽查東四旗覺羅教習。充江南鄉試副考官。遷光祿寺卿。宗人府府丞。都察院左副都御史。署順天府尹。充福建鄉試正考官。補兵部右侍郎。留視福建學。調補刑部右侍郎。道光三十年疏陳防夷之策。摺入留中。咸豐元年頒賞御製文餘集詩餘集。及御門聽政示。在廷諸臣述志詩墨刻。壬子頒賞經筵御論一冊。回籍省墓。旋丁內艱。會妖人鄒恩籓倡亂。泰和既平。偕永豐修撰劉繹勸捐。得二

十餘萬緡。備吉安軍需。甲寅奉命督辦本省捐輸。濟侍郎曾國藩。餉船軍需。又總理本省鹽務。赴京召見便殿。垂詢良久。咸豐八年。以二品頂戴任通政使。旋補刑部右侍郎。疏請修守備。己未。簡放河東河道總督。敷陳鹽務銷變通之法。復密奏黃河宜因勢利導。籌河南巡撫。十一年。應詔陳言。疏請慎選內侍。以杜非幾。同治元年。調巡廣東。疏陳吏治軍務。於北江等處。加增緝盜巡船。陸路則撥清遠勇。並增勇分駐山塘洪岡等處。肇慶土客互鬥。贊湯委員前往勸導。紳民感悟。復修省垣東北礮臺。以禦寇警。信宜踞匪鄭金劉超。殺其渠陳金缸。獻清玉僞印。以降。收復城池。尋解職。取道本籍赴京。過贛病發。遂寓焉。乙丑二月。歸故里。呼其子諭之曰。荷三朝知遇。涓埃未報。今中原雖靖。邊疆尙未肅清。此豈臣子優遊日耶。倘病愈。當擊楫枕戈。上紓宵旰勤勞。己巳正月病卒。年六十五。子祖纓。道光己酉舉人。侍讀銜。內閣中書。早卒。祖綸。廕工部主事。湖南候補知府。祖絡。邑庠生。湖北候補道。均賞戴花翎。祖彝。候選同知。祖徽。正二品廕生。

清代河臣傳 卷之三

一八八



清代河臣傳卷之四

譚廷襄

譚廷襄字竹厓。浙江山陰人。道光十三年進士。選庶吉士。散館。授刑部主事。再遷郎中。出爲直隸永平知府。調保定。遷順天府尹。擢刑部侍郎。咸豐六年出爲陝西巡撫。直省採米運京。倉廷襄疏言陝西產米少。轉輸不便。請改折解款。由部召糴。費節而事集。七年署直隸總督。是時英法俄美四國合軍陷廣東省城。廷襄疏請封貨閉關。恩威並用。上以海運在途。激之生變。虛聲無實益。不允。八年四月英兵北犯。占大沽礮臺。窺內河。大沽口外積沙。海舟不能直入。敵舟至。數以小汽船探測。時方議款。不爲備。不虞其驟發。欽差大臣僧格林沁劾廷襄奪官戍軍臺。九年以三品頂戴署陝西巡撫。上命直省禁習天主教。廷襄疏言天主教流行中國二百餘年。到處窮搜。轉滋駭愕。惟有密飭官吏稽查保甲。列冊密記。乘機啓導。時款議未定。或請西巡。借總督樂斌疏陳三便三難。議乃寢。十一年授山東巡撫。頻歲軍興。山東諸郡縣羣盜蠡起。皖捻入境。勾結土匪。滋擾幾徧。僧格林沁大軍駐山東督勦。廷襄率兵出省協助。並督各郡縣團練防

勦兼施。具詳僧格林沁傳。同治元年兼署河東河道總督。三年入爲刑部侍郎。調工部。又調戶部。五年湖北巡撫曾國荃疏劾總督官文貪庸驕蹇。並以公使錢餽四川考官胡家玉張晉裕等。上命尙書繇森及廷襄往按。並詰家玉。家玉言自四川還京。道湖北。官文等餽噓。以道梗改水程。無州縣支應。乃受以充費。廷襄等至湖北。疏言丁漕鹽釐關稅捐輸實用實支。並無浮濫。惟漢陽竹木捐零星不請獎敘者。凡因公動用例不報銷之項。由此動支。官文餽家玉等事實。上爲罷官文。即令廷襄督署總督。家玉等並下吏議。御史佛爾國春劾國荃言國荃亦以竹木稅治公解。嚴責廷襄蒙蔽。廷襄等復疏陳國荃上官未久。無以竹木稅治公解事。因言湖北三次陷賊。百端草創。不循例案。諸廢具舉。隨事設施。今以動用官款。加以處分。亦足示警。若更罪及所受之人。路遠給費。親喪承賻。皆望吏議。王道本人情。瑣屑煩苛。似非政體。於是諸受餽者皆置不問。六年上用前事奪官文總督。是冬國荃亦以病乞罷。廷襄還京署吏部侍郎。遷左都御史。再遷刑部尙書兼署吏部。九年卒。贈太子少保。諡端恪。

鄭敦謹

鄭敦謹字小山。湖南長沙人。道光十五年進士。選庶吉士。散館。授刑部主事。再遷郎中。出爲山

東登州知府。擢河南南汝光道。咸豐元年。泌陽土匪喬建德踞角子山。敦謹與南陽鎮總兵關塔布督兵捕獲之。被議敘。署布政使。二年。授廣東布政使。仍留署任。粵匪入湖北。命赴信陽。會南陽鎮總兵柏山扼要設防。三年。命河南巡撫陸應穀統兵駐南陽會城。及信陽。有事許敦謹專摺馳奏。欽差大臣琦善督師援安徽。檄敦謹總理信陽糧臺。及師屯江北。糧臺移設徐州。仍令敦謹往任其事。尋調授河南布政使。留筭糧臺如故。四年。光州陳州捻匪起。巡撫英桂出駐汝陽。詔敦謹赴本任。省城戒嚴。敦謹督率官紳倡捐經費。與團練皖捻犯永城夏邑。增調兵勇防黃河各渡口。斷寇北竄。尋命暫署巡撫。五年。坐欠解甘肅兩年協餉降調。召還京。以四品京堂候補。授太常寺少卿。八年。督山東學政。累遷大理寺卿。同治元年。署戶部侍郎。復出爲山西布政使。調署陝西布政使。調授直隸布政使。擢河東河道總督。四年。授湖北巡撫。尋召授戶部侍郎。五年。調刑部。六年。擢左都御史。捻匪渡河入山西境。巡撫趙長齡按察使陳湜疏防被劾。詔敦謹往按。長齡湜並坐罷。即命敦謹署山西巡撫。七年。出省治防。移軍駐澤州。攔車鎮。爲各路策應。授工部尙書。仍留署巡撫。回匪入河套。近邊震動。敦謹移駐甯武營防。別遣兵守榆林保德。下游各隘增募礮勇。補葺河曲邊牆。回匪窺包頭鎮。沿河堵禦。會綏遠將軍定安遣隊迎勦。總兵張曜自河曲截擊。破走之。八年。調兵部尙書。回京。九年。調刑部。兩江總督馬新貽被刺。

獲囚犯張汝祥。江甯將軍魁玉漕運總督張之萬會請。言汝祥爲洪秀全餘黨。其戕新貽。別無主謀者。命敦謹往會鞠。仍以初讞上論極刑。十年春敦謹還京。至清江浦上疏。以病乞罷。光緒十一年卒。謚恪愼。

### 張之萬

張之萬字子青。直隸南皮人。道光二十七年以一甲一名進士授修撰。咸豐二年出督河南學政。粵賊破歸德。近偃開封。之萬條上防勦事宜。多允行。俄召還。授鍾郡王讀。由侍讀累遷內閣學士。同治元年擢禮部侍郎。兼署工部。嘗被詔偕太常寺卿許彭壽等彙輯前代帝王及垂簾事蹟可法戒者上之。錫名治平寶鑑。會河南州縣以苛派擅殺爲御史劉毓楠奏劾。命之萬往按得實。巡撫鄭元善以下降黜有差。即以之萬署巡撫事。疏陳軍興財匱。請仿湖北變通漕折。言汴漕一石舊折銀四兩。今請令州縣留辦公費七錢。實解司庫三兩三錢。以二兩購米實倉。餘一兩充汴餉。其三錢爲通省公費。允行。捻酋陳大喜犯南陽。之萬親赴汝州督師。大喜竄阜陽。勾結皖捻。一由岳城趨楊莊偃雷堰。一入張岡。總兵張曜馳擊破之。圍練大臣毛昶熙諸軍相繼至。連戰皆捷。斬逆酋張鳳舞。汝南肅清。之萬駐軍許州。旣分遣諸將設防。自引軍還省。而

毫捻乘虛襲許。陷兩寨。坐降二級。留任。西捻張總愚竄鄧州。蓋大順走西坪。謀與合。張曜既敗。總愚重陽店。乘勝襲西坪。大順亦敗走。之萬復進汝州。三年移屯南陽。賊犯開封。還軍擊走之。四年遷河道總督。僧格林沁戰歿。曹州督兵大臣皆獲咎。之萬亦革職留任。以助防省城功。給二品頂戴。五年移督漕運。捻入徐州。之萬以裏下河爲財賦所出。嚴防清淮。及六塘河諸要地。六年淮軍獲賴文光於揚州。東捻平。捷聞。賜之萬花翎頭品頂戴。七年會勦西捻。總愚溺死。東南大定。之萬疏陳江北善後事宜。九年調江蘇巡撫。遷浙閩總督。以母老乞養歸。光緒八年起兵部尙書。調刑部。十年入軍機。兼署吏部。充上書房總師傅。協辦大學士。十五年授體仁閣大學士。轉東閣。賜雙眼花翎。二十年免直軍機。之萬入直凡十年。領樞密者爲禮親王世鐸。治尙安靜。故得無事。及日韓事棘。之萬乃先罷退。又二年以病致仕。卒。年八十七。贈太傅。諡文達。

### 蘇廷魁

蘇廷魁字府堂。廣東高要人。道光十五年進士。選庶吉士。授編修。二十二年遷御史。海疆兵事方亟。迭上疏論列。請修築虎門礮臺及燕塘墟。大沙河龜岡諸要隘。以防敵回擾粵。旣而和議成。二十三年春有白氣自天西南隅直掃參旗。因災異。上疏數千言。極論時政。乖迕。歸罪樞臣。

穆彭阿等請立罷黜。並下罪已詔。開直諫之路。語多指斥。宣宗覽奏。動容嘉其切直。朝野傾望。丰采遭憂去官。服闋。遷給事中。咸豐元年。上謹始疏。請求宏濟之道。執勞謙之義。防驕泰之萌。推誠任賢。慎始圖治。選擇翰詹爲講官。嚴取孝廉方正。備採用。文宗嘉納之。賽尙阿出督師。援引內閣侍讀穆蔭擢五品京堂。在軍機大臣上學習行走。廷魁疏劾其壞舊制。用私親。超擢太驟。易啓倖進之門。請俟賽尙阿還。令回章京本任。詔斥擅預黜陟。猶以素行端方。不之罪。上先隱其名。出疏示賽尙阿。賽尙阿退飲臺垣酒。問誰實彈我。廷魁出席曰。公負國。某不敢負公。再以憂歸。咸豐四年。廣東紅巾匪起。將犯省城。或獻議借外兵。以鋪捐爲餉。精力爭罷其議。八年。英法聯軍踞廣州。廷魁與侍郎羅惇衍等。倡設團防局。嚴清野。絕漢奸。招募東莞及三元里佛山練勇。得數萬人。聲言戒期攻城。敵師出擊。斬百餘級。敵始有戒心。稍戢。連艘北犯。旣而天津議和。廣東敵兵未退。民益憤。廷魁等請留練局。以防土寇。敵謂旣媾和。何復募勇。且以懸金購領事巴夏禮爲責言。議和。大臣桂良慮撓成議。奏請撤局。初艇匪擾廣東。圍四會肇慶。兵疲糧罄。或勸之去。廷魁曰。予圍防大臣也。誓與城爲存亡。會提督崑壽克梧州。以兵來援。城得完。疆臣屢欲上其功。皆固辭。同治初。以中外大臣薦。授河南開歸陳許道。歷布政使。擢東河總督。七年。河決滎澤。未奪溜。革職留任。閏三月工竣。復之。踰年內召去官。稱疾歸。光緒四年卒。

## 喬松年

喬松年字鶴儕。山西徐溝人。道光十五年進士。授工部主事。再遷郎中。咸豐三年。以知府發江蘇。除松江。調蘇州。會匪劉麗川據上海。省城潮勇潛與通。松年偵知之。白上官。誅其爲首者。丁父憂。總督怡良奏留從。克上海。授常鎮通海道。擢道員。賜花翎。六年。從怡良駐常州。署兩淮鹽運使。八年。丁本生父憂。總督何桂清復奏留。九年。授兩淮鹽運使。兼辦江北糧臺。十年。奏劾南河河道總督庚長擅提淮北存鹽變價充餉。又截留山西解江北糧臺餉銀。復劾庚長在清江聞警。猶演劇設宴。迨寇急。倉皇退守。命侍郎文俊往按得實。庚長褫職逮問。又疏論用勇不如用兵。請發京師護軍營暨北五省綠營赴江北防勦。英吉利法蘭西兵入犯。京師戒嚴。松年請赴畿輔督兵禦敵。諭止之。十一年。設江南北兩糧臺。仍命松年辦理。彼勞以按察使記名。同治二年。擢江甯布政使。仍留辦糧臺。擢安徽巡撫。三年。抵任。駐防臨淮。時苗匪已平。李世忠亦解兵柄。捻匪竄河南湖北。松年增募勇千人。就穎宿間設防。奏請雒河集地處交衝。當建縣設官。從之。又奏苗沛霖餘黨自非積惡。請予寬貸。李世忠散遣勇丁。恐流爲盜。飭州縣整頓捕務。粵捻諸匪自湖北麻城羅田東竄入皖境。松年移軍壽州。急調英翰自湖北回援。令朱淮森屯正

陽關。蔣凝學迎擊於英山。克金家寨。英翰等敗賊於陶家河黑石渡。僧格林沁大軍追至合擊。諸賊窮蹙。紛紛乞降。先後凡十餘萬。賊首陳德才後至。爲蔣凝學擊敗。服毒死。獲其屍。上飭英翰等移軍進勦。松年請留英翰防皖境。郭寶昌援河南。蔣凝學赴湖北。四年僧格林沁戰歿。上命會國藩督師山東。松年奏國藩久治軍務。氣體較遜於前。李鴻章才識亞於國藩。而年力正強。如以代國藩督師山東。必能迅奏蕩平。疏上。報聞。時捻匪大舉犯皖北。圍英翰於雒河集。國藩遣援軍至。乃擊走之。五年調陝西巡撫。前任巡撫劉峇奉命留陝辦理軍務。時捻匪張總愚竄入陝境。松年初至。與峇意見不合。奏劾峇軍政墮壞。留陝無益。峇亦劾松年掣肘。貪利徇私。十二月賊逼省城。峇軍潰於灞橋。六年正月提督劉松山援軍至。破賊雨花寨。連戰皆捷。省城始安。迭奏請帥鮑超軍援陝。迄不至。皖軍郭寶昌應調來援。偕劉松山轉戰涇渭之間。屢捷。總愚窺同州。欲渡河未得。遂趨陝北。六月總督左宗棠至。陝軍事始有統轄。松山寶昌等連破賊於北路。至冬總愚由垣曲渡河。循太行東趨。松山寶昌尾追。七年春宗棠率師入衛畿輔。陝西自捻匪出境。西路回氛仍未靖。松年以病乞假歸。九年病痊。授倉場侍郎。十年授河東河道總督。奏言今日言治河。不外兩策。一則堵銅瓦廂決口。復歸清江浦故道。一則就黃水見到處築隄束之。俾不至橫流。至利津入海。權衡輕重。以就東境築隄束黃。爲順水之性。事半功倍。前數



年大溜全趨張秋後。又決胡堰。洪川口。霍家橋。新興屯諸地。黃流穿運。節節梗阻。惟有盡堵。旁洩之路。自張秋西南沙河。迤北就舊隄。修補爲黃河北隄。又自張志門起至沈家口。馬山頭築新隄一百八十餘里。爲黃河南隄。俾仍全趨張秋。借以濟運。下廷臣議行。十三年奏請裁東河總督。以巡撫兼領河工。下部議。格不行。光緒元年卒。諡勤恪。

### 錢鼎銘

錢鼎銘字調甫。江蘇太倉人。父寶琛。湖北巡撫。鼎銘道光二十六年舉人。從寶琛治團練。曾匪劉麗川據上海青浦。周立春起應之。陷嘉定。鼎銘與嘉定舉人吳林募勇從官軍。復其城。授贛榆訓導。入貲爲戶部主事。丁父憂歸。江南大營再潰。諸郡縣淪陷。巡撫薛煥退保上海一隅。曾國藩旣克安慶。圍練大臣龐鍾璐等議乞援。道路梗阻。鼎銘奮然請行。乘洋商輪船溯江上。至安慶。謁國藩。陳吳中百姓陸危。上海中外互市。權稅所入。足餽兵數萬。不宜棄之資賊。策畫數千言。繼以痛哭。國藩遂決策濟師。時薛煥遣將至湖商募勇萬二千。國藩知所募皆各軍汰遺。不可用。令鼎銘往解散。遇諸漢口。鼎銘簡留精壯九百人。餘悉罷歸。無譁者。還上海。籌餉十八萬。租船五。復率赴安慶迎師。於是國藩奏令延建邵道李鴻章率淮勇五千人赴之。同治元年

三月至上海。鴻章尋署江蘇巡撫。奏請以鼎銘參軍事。多所贊畫。積功擢道員。賜花翎。加布政使銜。五年。鴻章代國藩督師勦捻。令鼎銘駐清江浦。主轉運糧餉軍仗。訖捻匪滅。始終無緇誤。鴻章與漕運總督張之萬。畧疏薦。國藩移督直隸。奏調以從。八年。授大順廣道。就遷按察使。又遷布政使。十年。擢河南巡撫。十一年。擒匪餘孽。蠢動。鼎銘令總兵崔廷桂勦平之。用直接練軍制。就河南三鎮額兵。簡其精壯。抽練馬步各三營。重其額餉。擇駐衝要地訓練。期年。成軍。修水利。鑿賈魯河故道。南自周家口。北至朱仙鎮。又西北至鄭州。京水塞。疏積沙。補殘隄。俾上游無水滂。下游通舟楫。復濬勺金河。丈八溝。餘濟河永豐渠。以資灌溉。令諸州縣勸民按畝出穀。就鄉分倉。擇公正紳耆董其事。毋假手胥吏。通省積穀九十餘萬石。提督張曜一軍出關勦回。全軍餉由河南供給無缺。光緒元年卒。賜卹。諡敏肅。

### 曾國荃

曾國荃字沅甫。湖南湘鄉人。大學士國藩之弟也。少負奇氣。從國藩受學京師。咸豐二年。舉優貢。六年。粵匪石達開犯江西。國藩兵不利。國荃欲赴兄急。與新授吉安知府黃冕議。請於湖南巡撫駱秉章。使募勇三千人。別以周鳳山一軍合六千人。同援江西。十一月。克安福。連破賊於

大汾河千金坡。進攻吉安。下旁數縣。七年春。丁父憂。回籍。夏。賊唐聚吉安。周鳳山軍敗潰。時王  
鑫。劉騰鴻皆喪亡。士氣衰沮。江西巡撫耆齡奏起國荃統吉安諸軍。軍復振。冬。敗石達開於三  
曲灘。吉安圍始合。八年春。克吉水。萬安。八月。督水師。毀白鷺洲賊船。破城外堅壘。遂克吉安。禽  
賊首李雅鳳。以功累擢知府。撤軍還長沙。九年。復赴江西。率朱品隆等軍五千餘人。援勦景德  
鎮。時諸軍與賊相持數月。莫肯先進。國荃至。乃合力。敗援賊於浮梁南。三戰皆捷。火鎮市。追殲  
賊及半。克浮梁。擢道員。江西肅清。國藩出九江至黃州。與胡林翼議分路圖皖。國荃留軍巴河。  
自還湖南。增募爲萬人。多隆阿鮑超等。旣大破賊於太湖潛山。十年閏三月。國荃乃進軍集賢  
關。規攻安慶。陳玉成來援。擊走之。十一年。陳玉成復糾捻衆。至於菱湖。兩岸築堅壘。與城賊更  
番來犯。國荃調水師入湖。令弟貞幹築壘湖東以禦之。會陳玉成在桐城。爲多隆阿所敗。還趨  
集賢關。迎擊破之。玉成由馬踏石遁走。仍留黨踞赤岡嶺。與菱湖賊壘犄角。國荃困以長濠。鮑  
超來合攻。悉破其壘。禽斬萬餘。進破安慶城外賊營。燬東門月城。惟北門三石壘堅不可下。令  
降將程學啓選死士緣礮穴入拔之。陳玉成屢爲多隆阿所創。收餘衆。糾合捻匪。復屯集賢關。  
襲官軍後路。城賊葉芸來亦傾巢出撲。國荃憑濠而戰。屢擊却。仍復進。增築新壘。遣貞幹合水  
師扼菱湖。絕賊糧路。八月。以地雷轟城。克之。殲賊萬餘。俘數千。捷聞。以按察使記名。加布政使。

銜賜黃馬褂。尋以追殄餘賊，賜號偉勇巴圖魯。於是國藩進駐安慶，國荃率師東下，規江甯。克無爲州，破運漕鎮，拔東關，加頭品頂戴，分兵守諸隘。自回湖南，增募勇營，同治元年授浙江按察使。遷江蘇布政使，詔以軍務緊要，毋庸與兄國藩迴避。同省三月，率新募六千人至軍，自循江北岸，令弟貞幹循南岸。彭玉麟等率水師同進，拔銅城，插雍家鎮諸隘，復巢縣、含山和州，克裕溪口、西梁山，渡江會攻金柱關，乘間襲太平，克之。回克金柱關，貞幹亦克蕪湖，令彭毓橘截敗賊於薛鎮渡口，大破之。五月，連奪秣陵、關大勝關要隘，水師進扼江甯護城河口，陸師逕抵城南雨花台，駐屯賊來爭，皆擊却之。國藩猶以孤軍深入爲慮，國荃謂舍老巢勿攻，浪戰無益。逼城足以致敵，雖危事有可爲。會秋疫大作，士卒病者半，賊酋李秀成自蘇州糾衆數十萬來，援結二百餘壘。國荃於要隘增壘，輔以水師，先固糧道，賊環攻六晝夜，彭毓橘等乘其乏出擊，破賊營四，賊悉向東路填濠而進。前仆後繼，國荃督軍抵禦，礮傷頰，裹創力戰，賊始退。李世賢又自浙江率十萬衆至，與秀成合攻，屢掘地道來襲，燬營牆，百計攻襲，皆未得逞。蕪湖守將王可陞率援師至，國荃簡精銳分出焚賊數壘，餘棄壘走，進擊大破之。先後殲賊數萬，圍乃解。秀成世賢引去，是役以病餘之卒苦戰四十餘日，卒保危局，詔嘉獎，頒珍賚，議者欲令乘勝退保蕪湖，國荃以賊雖衆，烏合不足畏，不肯退。二年春，國藩親至視師，見圍屯堅定，始決止退軍之

議。詔擢浙江巡撫。仍統前敵之軍。規取江甯。四月。攻雨花台。及聚寶門外石壘。克之。九洲洲爲江甯犄角。賊聚守最堅。國荃偕彭玉麐。楊岳斌。往覘形勢。合水陸軍血戰。克之。江面遂清。連克上方橋。江東橋。近城之中。和橋。雙橋。門七甃。橋稍遠之方山。土山上。方門。高橋。門。秣陵。關。博望。城。諸賊壘。以次並下。國荃初至。合各路兵。僅二萬。至是募圍師。至五萬人。十月。分軍扼孝陵衛。李鴻章克蘇州。李秀成率敗衆。分布丹陽。句容。自入江甯。勸洪秀全。同走不聽。遂留同城守。三年。春。克鎮山。天保城。城圍始合。賊糧匱。城中種麥。濟饑。國荃迭令掘地道數十處。賊築月圍。以拒。士卒多傷亡。會詔李鴻章移師會攻。諸將以城計日可破。耻借力於人。攻益力。鴻章亦不至。國荃慮師老生變。督李臣典等。當賊礮密處。開地道。旣成。懸重賞。募死士。李臣典。朱洪章。伍維壽。武明良。譚國泰。劉連捷。沈鴻賓。張詩日。羅雨春。誓先登者九人。六月十六日。日加午。地道火發。城崩二十餘丈。李臣典。朱洪章等。蟻附爭登。賊傾火藥轟燒。彭毓橘。蕭孚泗。手刃退卒數人。遂擁入。朱洪章。沈鴻賓。羅雨春。攻中路。回僞天王府。劉連捷。張詩日。譚國泰。攻右路。趨神策門。朱南桂等。梯城入。合取儀鳳門。其左路。彭毓橘。由內城至通濟門。蕭孚泗等。奪朝陽洪武門。羅逢元等。從聚寶門入。李金洲。從通濟門入。陳湜。易良。虎。從旱西水西門入。於是江甯九門皆破。守陣賊誅殺殆盡。猶保子城。夜半。自縱火焚僞王府。突圍走。要截斬數百人。追及湖熟。俘斬亦

數百。洪秀全已前一月死。獲其屍於僞宮。其子洪福瑱年十五。訛言已自焚死。餘黨挾之走廣德。國荃令閉城救火。搜殺餘賊。獲秀全兄洪仁達及李秀成伏誅。凡僞王主將大小酋目三千餘皆死。亂兵斃賊十餘萬。拔難民數十萬。捷聞。詔嘉國荃堅忍成功。加太子少保。封一等伯爵。錫名威毅。賜雙眼花翎。國荃功高多謗。初奏洪福瑱已斃。既而奔竄浙江江西。仍爲諸賊所擁。言者以爲口實。遂引疾求退。遣撤部下諸軍。溫詔慰留。再疏始允開缺回籍。四年起授山西巡撫。辭不就。調湖北巡撫。命幫辦軍務。調舊部勦擒匪。五年抵任。汰湖北冗軍。增湘軍六千。以彭毓橘郭松林分統之。時擒匪往來鄂豫之交。國荃檄鮑超由棗陽趨浙川。內鄉防西路。郭松林由桐柏唐縣出東路。劉維楨向新野爲聲援。賊折而北竄。詔郭松林越境會勦。是年冬敗賊於信陽孝感。賊竄雲夢。應城德安。郭松林擊走之。克應城雲夢。又敗之皂河楊澤。松林追賊曰口。中伏受重傷。其弟芳鈔戰死。彭毓橘破賊於沙口。又敗之安陸。國荃以賊多騎。難與追逐。欲困之山地。毓橘偕劉維楨屢戰不能大創。賊竄去。總督官文與不協。國荃疏劾其貪庸驕蹇。詔解官文總督任。六年春賊復犯德安。爲劉銘傳鮑超所敗。遁入河南境。尋復回竄。彭毓橘恃勇輕進。遇賊蘄州戰歿於六神港。五月擒匪長驅經河南。擾及山東。詔斥諸疆吏防勦日久無功。國荃摘頂下部議處。尋以病請開缺。允之。光緒九年。起授陝西巡撫。遷河東河道總督。二年復

調山西巡撫。比年大旱，災連數省。國荃力行賑卹，官帑之外，告貸諸行省，勸捐協濟，分別災情輕重，賑期久暫，先後賑銀一千三百萬兩，米二百萬石，活饑民六百萬。善後蠲徭役，歲省民錢鉅萬。同時荒政，山西爲各省之冠。民德之，爲立生祠。六年，以疾乞罷，慰留。尋召來京，七年授陝甘總督，命赴山海關治防，復乞病歸。八年，署兩廣總督。九年內召，十年署禮部尚書，調署兩江總督，兼通商大臣，尋實授。時法蘭西兵犯沿海，中朝和戰兩議相持，國荃修江海防務，知上海關緊，諸國商務，法兵不能驟至，馭以鎮靜，詔遣文臣分赴海疆會辦，福建疆吏遂不能主兵。國荃言權不可分，朝廷亦以其老於軍事，專倚之，命遣兵輪援臺灣，原議五，實遣其三。坐下部議革職，留任。兵輪終不得達，其二折至浙洋，助戰鎮海有功，和議尋定。十一年，京察以國荃夙著勳勤，開復處分。十五年，皇太后歸政，推恩加太子太保。國荃治兩江凡六年，總攬宏綱，不苛細故，軍民相安。十六年卒於官，贈太傅，賜金治喪，命江甯將軍致祭，特諡忠襄，入祀昭忠祠賢良祠，建專祠。

### 李鶴年

李鶴年字子和，奉天義州人。道光二十五年進士，由編修改御史，轉給事中，父憂歸，服除，命赴

河南襄辦軍務。同治元年授常鎮通海道。署河南按察使。調直隸。授布政使。四年擢湖北巡撫。調河南。時捻匪由山東南竄。鶴年以爲十餘年來賊屢擾歸陳南汝間。卽去而他竄。必假道於豫。乃增募兩軍各萬餘人。一曰毅軍。宋慶統之。一曰嵩武軍。張曜統之。更以馬隊屬善慶。與兩軍爲犄角。於是宋慶等軍大破張總愚睢州。鶴年親赴陳留杞督戰。任賴各逆復乘虛北擾。鶴年以賊蹤無定。防河尤急。賊果犯中牟。以有備不得逞。乃於省治西決隄引水南流。擾及長垣。鶴年飛檄水陸各軍沿隄勦堵。賊西走湖北麻城黃岡。詔飭宋慶一軍越境會勦。賊無算。鶴年自駐許州策應。賊竄裕州。慶擊敗之。善慶及淮軍劉銘傳大敗賊贛榆。任柱被戕死。賜鶴年頭品頂戴。七年奉命督師出境。馳抵磁州。擒犯近畿。更由滑澹等處沿河東趨。坐防堵不力。再議處。豫軍告捷。賞還頂戴。總愚溺死。擒匪平。照一等軍功議敘。十年擢閩浙總督。明年陞見。賜紫禁城騎馬。旋署福州將軍。兼署巡撫。詔詢海防事宜。覆奏言海防之策。莫重於練兵。籌餉製器用人四端。四者之中以用人爲急務。而尤在專其責成。沿海疆臣固責無旁貸。第無統率大員。仍恐意見紛歧。臨事推諉。上韙其議。光緒元年調河東河道總督。兼署河南巡撫。七年授河南巡撫。仍兼河督。十年坐審辦盜犯胡體安連疏抗辨。部議革職。以視假恩賞降二級職銜。十三年署河督。疏言黃河分流。自宋時河決澶州分爲二派。明築黃陵岡始合爲一。河性上漫則



下淤。今兩路皆淤。急宜疏支河以預籌宣洩。報可。逾年鄭工復決。發軍臺效力。未幾釋歸。並賞三品銜。十六年卒。宣統元年開復原官。鶴年有知人鑒。少與文祥同學相淬厲。及居言職。嚴疏劾肅順跋扈。而奏起曾國藩於家。謂必能辦賊。拔宋慶張曜統豫軍。後皆爲名將。治豫久。多善政。豫人刻石頌之。始任河督。黑岡隄潰。不絕如縷。鶴年親督工二十餘晝夜。險工克濟。德宗嘗詢李鴻藻以善治河者。鴻藻舉鶴年。上亦識前事之枉也。故再任河督。其卒也。豫民有流涕者。三子葆恂。博學多文。尤知名。

### 梅啓照

梅啓照字小巖。江西南昌人。咸豐二年進士。由庶吉士改授主事。翁心存相國謂人曰。此好翰林也。今在吏部七年。隨冢宰花文定公赴天津換約。啟照察其約僞。亦急匿約曰。我國約未押寶。須遲之。使者知不可欺。乃出真約。復隨往蘇州。上海事竣。回江西。辦團練。在市汶與賊慶戰六晝夜。人皆傳其戰歿。十年。曾文正公檄赴大營。鮑超至營。文正怒其不聽遣調。欲罪之。啓照爲解。且代請馬隊。許之。鮑超勦江西賊。實以馬隊得力。旋入都。補御史。授惠州知府。在任甫八月。調廣州巡撫。蔣益澧以其能軍。使統兵治海盜。并辦曹冲寨事。曹冲寨者地絕險。恩平土客

構難已十三年矣。客匪據寨，官軍攻之，輒爲所敗。啓照私以重金募潮之敢死士百人爲親兵，率以往。數月平之，奏賞強勇巴圖魯勇號。同治六年八月，授長蘆鹽運使。十一月，授廣東按察使。歷江寧布政使。沈文肅公督兩江，會議購輪船招商局。沈以告啓照，且質之。答曰：「此兩言可決耳。」沈訝曰：「我思之兩日不得決。」汝云：「兩言何也？」啓照曰：「爲身家計辭，爲國家計辦。」沈色變，時批牘已出，立追回。撥款二百萬與之，招商局成立。啓照之一言也。巡撫浙江修海塘，用鐵筍貫石。自雍正時，朱文端公所築外，工未有堅實過之者。胡文忠公嘗奏保左文襄、閻文介等十八人，皆名臣。啓照與焉。及開缺，陛見，詢良久，知其被譖。曰：「汝精神原好，又謂汝辦事認真，任勞任怨，則文忠薦牘之語，未幾除內閣學士、禮部侍郎，授東河總督。河南有首盜臨刑呼冤案，命啓照覆訊。幕僚執毋實奏。啓照曰：「吾固知之。」然生平以戒欺爲學，畏禍縱盜，義不爲也。迨刑部定讞，河南全省大吏皆獲咎。啓照亦坐褫職。罷歸後，杜門不通賓客，亦不問地方事。年六十九卒。官御史時，劾湖南鄧輔綸躁進，鄧竟不仕。悔之終身，曰：「以不仕之人，誣其躁進，失言甚矣。」此急於建言之過也。精算術，以意造水甲數百領。吳長慶高麗之役，借以涉海，尤留心西人鐵路、船礮機械，欲師其長而致於用。雖退居，尤亟講之。

## 慶裕

慶裕字蘭圃。喜塔臘氏。滿洲正白旗人。以繙譯生員。致取內閣中書。充軍機章京。兼總理各國事務衙門行走。從文祥赴奉天勦匪。還補侍讀。出知湖北鄖陽府。追錄平捻功。晉道員。光緒元年擢奉天府尹。歷遷至漕運總督。調河東河道。九年除盛京將軍。明年法越構衅。慶裕巡視沒溝營旅順口。大連灣。諭示居民曰。有能殺敵立功擒獲奸細者賞。又遵旨增練蘇拉千人。食餽旗兵五百。上言整頓旗營兼顧海防。今日多一兵。即有一兵之用。異日補旗兵。即可裁客兵之餽。所費者少。所繫者重。詔嘉許之。朝鮮亂作。檄提督黃仕林等扼隘口。以營口爲兵衝要地。運石塞海口。設電綫達省城。建議籌邊籌餽機宜。附陳宜變通者三事。一道府年終加考。一推廣薦舉卓異。一崇府尹品秩。行巡撫事。議行。十一年安東十二州縣告災。慶裕籌賑撫卹。民獲甦。是秋霖雨。遼河大凌河暴長。田禾被淹。發倉以濟。設粥廠牛莊田莊台收養之。明年金州蝗旱。虜爲虐。又明年與京水浸。賑如初。十九年授熱河都統。道孫河半壁店。上流民被災就食狀。並請變通盜案稅額章程。又使吏捕平泉。畧役爲害鄉里者。頗著政聲。二十年調福州將軍。閩海關沿襲舊規。吏胥因緣爲奸。上敕其整理。既至。鈎稽糾剔。蠲苛息煩。弊風盡革。其秋卒於官。

卹如制。

### 李鴻藻

李鴻藻字蘭孫，直隸高陽人。咸豐二年進士，選庶吉士，授編修。典山西鄉試，督河南學政。十年上擇儒臣爲皇子師，大學士彭蘊章以鴻藻應召來京，明年特詔授大阿哥讀，穆宗登極，皇太后懿旨命直弘德殿，同治元年擢侍講，累遷內閣學士，署戶部左侍郎。四年命直軍機，五年授禮部右侍郎，遭母憂，皇太后懿旨撥雍正乾隆年大臣孫嘉淦等故事，命鴻藻開缺，守孝百日，後仍授讀，兼參機務，並諭移孝作忠，勿以守禮固辭。鴻藻懇終制不允，倭仁等亦代爲陳請，仍命恭親王傳諭慰勉。鴻藻連疏稱疾，遂得賜告卒。終制始出。七年捻擾畿疆，鴻藻方里居，以各路統兵大員事權不一，疏請特派親王爲大將軍，坐鎮京師，以固北路。左宗棠、李鴻章爲參贊大臣，分紮保定、河間、東西兩路，各率所部兵勇相機勦辦。陳國瑞爲幫辦軍務，專統一軍爲游擊之師，直隸總督官文專顧省城，籌備諸軍餉需，以資接濟。丁寶楨駐紮直東交界，防賊東竄。李鶴年駐紮直豫交界，防賊南竄。直晉交界由左宗棠等分撥勁旅扼要駐紮，並請敕下各該大臣和衷商辦，迅奏膚功。奏入，上遂命各路統兵大臣均歸恭親王節制，旋起禮部左侍郎，仍

直弘德殿及軍機如故。十年擢都察院左都御史。加太子少保。時有修葺圓明園之旨。朝臣同起力爭。鴻藻亦言粵捻初平。回氛方熾。宜培養元氣。以固根本。不應虛糜帑精。爲此不急之務。乃止。十三年。上有疾。命代批答章奏。旋崩。自劾輔導無狀。罷弘德殿行走。光緒二年。命兼總理各國事務衙門。尋丁本生母憂。服闋。起故官。以兵部尚書協辦大學士調吏部。時崇厚與俄商定伊犁約。鴻藻堅持不可。爭於廷。卒治崇厚罪議改約。及法越啓釁。言路愈奮發。劾能樞臣。鴻藻謫遷內閣學士。後復累遷禮部尚書。十三年。河決鄭州。上命鴻藻馳往督辦。先是。河道總督李鶴年。河南巡撫倪文蔚。議於西壩興工。鴻藻至。仍之。又續興東壩工。疊遇奇險。皆力爲守固。會伏秋汛至。西壩失事。請暫停工。上以鴻藻督率無方。革職留任。並奪李鶴年河道總督。命鴻藻暫行署理。尋回京。復以禮部具奏典禮繕籤改日期。再議革職。上特寬免。大婚禮成。復原官。二十年。日韓事棘。命鴻藻商辦軍務。再授軍機大臣。與翁同龢皆主戰。並爭和約。卒不能阻。旋以禮部尚書協辦大學士調吏部。歷蒙頒賞書畫及諸上方珍物。充鄉試會試殿試等閱卷大臣。二十三年。以病乞假。疾篤。賞給藥餌。命御醫往視。卒。年七十有八。遺疏入。上震悼。予諡文正。贈太子太傅。子焜。瀟。煜。瀛。均賞給郎中。鴻藻性至孝。爲學守程朱。務實踐。持躬儉約。傅穆宗十餘年。盡心啓沃。一日。穆宗學書。故爲戲筆。鴻藻立前捧上手。曰。皇上心不靜。請少息。穆宗改。

容謝之。其在樞府，獨守正持大體。御史王鵬運諫止修頤和園，幾獲重譴。鴻藻力解之，得免。德宗間，日一往頤和園侍起居，時留駐蹕，言官有言其不便者，太后大怒，欲黜之。鴻藻謂如此必失天下臣民之望，乃止。所薦引多端士，朝列有清望者，率倚以爲重，然亦不免被劾持云。

### 吳大澂

吳大澂字清卿，江蘇吳縣人。同治元年秋，彗星見西北，詔求直言。大澂方爲諸生，入都應京兆試，上書言致治之本在興儉舉廉，不言理財而財自裕，若專務剖克，罔恤民艱，其國必敝。後六年成進士，授編修。穆宗大婚典禮隆，疏請裁減繁費，直聲震朝右。出爲陝甘學政，奏以倉頡列祀典，允之。又薦諸生賀瑞麟、楊樹椿、篤志正學，給瑞麟國子監學正銜，樹椿翰林院待詔銜。士風爲之一變。時詔修頤和園，大澂復言時事艱難，請停止工作，疏入留中。光緒三年，山陝大饑，奉命襄賑賑務，躬履災區查勘，全活甚衆。左宗棠曾國荃、李鴻章等交章論薦。四年授河北道，時比歲荐饑，貧民減價鬻田，十不得一。巡撫涂宗瀛飭荒歲賤價之田，准取贖，然往往爲勢家所持，以故失業者衆。惟大澂能判決如巡撫指。六年詔給三品卿銜，隨吉林將軍銘安辦理西北邊防。大澂周歷要隘，始知瑯春黑頂子地久爲俄人侵占，因請頒舊界圖，將定期與俄官

抗議未得旨。時有韓效忠者登州人。備於復州侯氏。負博進遁往吉林。夾皮溝地產金。在甯古塔三姓東。萬山環繞。廣袤七八百里。流冗嘯聚其中。亡慮四五萬。咸受效忠約束。效忠嚴而不擾。衆服其公允。屢抗大軍不出。大激單騎抵其巢。留宿三日。勸效忠出。效忠猶豫。意難之。大激曰。我不疑若。若乃疑我耶。對曰。非敢疑公。某負罪久。萬一主兵者執前事爲罪。某死不恨。辜公意奈何。大激挺以自任。遂與效忠出。奏給五品頂戴。子七品。孫登舉有平寇功。授參將。七年授太僕寺卿。法越事起。會辦北洋軍務。駐防樂亭。黎十年遷左副都御史。俄命使朝鮮。定其內亂。驢運使續昌副之。至則日本使臣井上馨避不肯見。而挾朝鮮左議政金宏集於議政院。索償兵費三十萬。大激謂續昌曰。是蔑我也。立率兵至議政院。排闥入。責數宏集。柄國敗壞國事。今定約稍不慎。便滋異日紛。非所以靖國也。宏集唯唯。井上馨亦氣懾。減索兵費十一萬而去。十一年詔赴吉林。會同副都統伊克唐阿與俄使勘侵界。即所侵瑯春黑頂子地也。遂援咸豐十一年舊界圖立碑五座。建銅柱。自篆銘曰。疆域有表。國有維。此柱可立不可移。於是侵界復歸中國。而船之出入圖們江者亦卒以通航無阻。十二年擢廣東巡撫。葡萄牙侵界至澳門。香山總署與立約通商。畫澳門歸葡轄。大激持不可。條上駁議不報。十四年鄭州河再決。上震怒。褫河督李鶴年職。以大激代之。是年冬河工合龍。大激力居多。大激盛負時譽。會海軍議起。以

醇親王奕譞爲總理。大澂素與王善。治河功成。實授河道總督。加頭品頂戴。大澂遂疏請尊崇醇親王稱號禮節。疏入。孝欽顯皇后震怒。出醇親王元年所上預杜妄論疏。頒示天下。大澂幾得嚴譴。以母喪歸乃已。十八年授湖南巡撫。朝鮮東學黨之亂也。日本與中國開釁。朝議皆主戰。大澂因自請率湘軍赴前敵。優詔允之。二十一年出關。會諸軍規復海城。而日本由間道取牛莊。魏光燾往禦。戰不利。李光久馳救之。亦敗。僅以數騎免。大澂憤湘軍盡覆。拔劍欲自裁。王同愈在側格阻之。同愈以編修參大澂軍事也。光燾請中軍法。大澂歎曰。余實不能軍。當自請嚴議。退入關。奉革職留任之旨。乃還湖南。尋命開缺。二十四年復降旨革職。永不敘用。二十八年卒。年六十八。大澂善篆籀。罷官後貧甚。售書畫古銅器自給。著有古籀補古玉圖攷權衡度量攷恆軒古金錄。窳齋詩文集。

許振禕

許振禕字仙屏。江西奉新人。咸豐初。以拔貢生參會國藩戎幕。迨楚軍困於江西。都邑相繼陷。振禕偕內閣中書鄧輔綸募鄉兵擊賊。進賢東鄉。旋復吉安。敘功以同知銓選。同治二年成進士。授職編修。出督陝甘學政。時河州降回復叛。而西甯諸郡回漢民亦日相仇殺。試事久停不



舉振禕始按試各郡多錄降人子弟補行八次歲科試入學者數千人回民大服建味經書院於涇陽廣置書籍以化其曠俗又請陝甘分闈鄉試各設學政允之總督左宗棠以謂邊氓長治久安之效胥基於此父憂歸光緒二年起故官八年授彰衛懷道減屬縣差徭費歲二十餘萬豫修襄河隄防淮海各鹽區得免水患十六年擢河東河道總督築榮澤大壩胡家屯米童寨各石壩河賴以無患其要尤在嚴稽察不私財權令七廳徑赴司庫支領故積弊除而工堅十一年遷廣東巡撫禁賭闔姓粵民利賴之二十四年裁廣東雲南湖北三巡撫缺振禕調內用乞假歸逾年卒附祀江蘇河南曾國藩祠

### 任道鎔

任道鎔字筱沅江蘇宜興人拔貢考授教職咸豐中在籍襄辦團練除奉賢訓導以籌餉勞晉秩知縣銓當陽多善政調江夏同治二年擢知順德府畿南匪起行堅壁清野法修治城堡屢擊賊於沙河平鄉間會捻衆北犯道鎔率練勇守沙河夜與賊遇揮衆奮擊矛傷及身不退賊徐引去晉秩道員洛河自廣平入久淤塞道鎔與鄰郡合濬又濬郡北響水河復民田萬餘頃總督曾國藩李鴻章迭薦之十一年調保定尋擢開歸陳許道剔河工積弊驗工料必以實嘗

冒風雨搶護中河險工。四晝夜始定。光緒元年署按察使。授江西按察使。省獄羈囚四百餘人。道銜便宜訊決。三月而清。四年遷浙江布政使。調直隸。直隸自軍興。州縣報銷未清。又數值謁陵大差。交代糾葛。道銜分別新舊案。定限清結。裁革州縣攤捐。實發養廉銀以卹吏。勸屬縣積穀備荒。七年擢山東巡撫。疏陳營務廢弛。易置統將。以綠營額餉練新軍。責郡縣勤緝捕。泰山沂水之間驛路崎嶇。發卒開治平坦。行旅便之。旋以保獎已革知府潘駿羣被議。又以失察編修林國柱預報起復。被劾褫職。降道員。家居久之。二十一年起河道總督。故事河督開封濟甯並設行署。自咸豐時常駐開封。山東河事由巡撫專治。至是復改議河督駐濟甯。而河南巡撫兼治河道。銜言官吏不相屬。則令難行。不如仍舊使報可。時河患多在下游。河督專司上游。事簡道銜務節省。歲以餘帑還司庫。二十六年拳匪起河南。姦民乘機煽亂。道銜處以鎮靜。練河標三營助省防。次年調浙江巡撫。承國威新挫後。民教相鬩。案多未結。持平訊決之。籌集償款。衛其緩急。民不重困。二十八年乞病歸。逾三年卒於家。年八十三。

錫良

錫良字清弼。巴岳特氏。蒙古鑲藍旗人。同治十三年進士。用山西知縣。歷任州縣。有惠政。光緒

初晉大旱，錫良歷辦振務，戶必清查，款必實放，民皆德之。二十年山東巡撫李秉衡奏調補沂州知府，擢堯沂曹濟道，抵任值單縣大刀會滋事，亟率隊往，張示諭衆，祇擒首要，搜獲盟單，當衆焚之。匪黨感畏，皆散。調山西冀寧道，晉按察使，調湖南，擢布政使。二十六年拳亂召禍，京師危急，錫良以湖廣總督湖北湖南巡撫會委統率鄂湘軍隊入衛，迎駕山西，立授巡撫。時和議未定，洋兵闖入晉邊，錫良念兩宮幸陝，和局固應兼顧，而保晉衛秦亦不容忽，乃通令各軍嚴行防守，別遣委員出境犒師，相機因應，幸保無事。和約定，晉始弛防，調湖北巡撫，復開缺，旋授河南河道總督，以事簡奏請裁歸巡撫兼理，詔允行，調補河南巡撫，兼管河工。豫省吏治久墮，劾去道府以次數十人，政紀肅然。泌陽教案事起，立派兵馳捕首犯，被擾難民，無分民教，一律撫恤。調熱河都統，熱河本就蒙地，設治向沿舊習，不講吏事，尤患多盜，錫良首請改制，設立求治局，綜理吏治財政，開辦圍場荒地，以興墾務，整飭巡防，專意緝捕，匪風始戢。又以熱境地廣官少，奏請升朝陽縣爲府，並增設阜新建平隆化三縣，熱河自此始有吏治。二十九年擢閩浙總督，調署四川，時方議借外款修川路，錫良力主自辦，集紳會議，奏設專局，招商股，籌公股，復就通省田租歲抽百分之三，名爲租股，數年積至千萬以上，股款之多爲中國自辦鐵路最。二十九年廷議整飭藏事，藏人疑懼，駐藏辦鳳全被戕，錫良飛檄提督馬維騏督兵進勦，並令

建昌道趙爾豐率師繼進，遂克巴塘，仍飭爾豐進討裏塘，裏屬桑披寺築碉謀抗拒，爾豐以長圍困守六閱月，斷其汲道，始克攻破。桑寺既平，諸番懾服。於是打箭爐以外直至察木多巴裏、鄉城、德格等處，均改縣治，擴地至數千餘里。且興墾開礦，設學廣教，番人漸知向化矣。三十三年，調雲貴總督。滇省軍政久廢，器械尤缺，乃創練陸軍，設講武堂，添購槍礮，舊有防營一律改編。自是滇省始有新軍。滇多煙產，土稅爲收入大宗，錫良毅然奏請禁種，各省煙禁之嚴，唯滇爲最。滇南連越，越匪竄入河口，戕官擾境，立飭出隊分路截勦，數日而定。滇西土司以數十計，日漸姿橫，宣慰使刁安仁曾遊東洋，外人稱以王爵，尤驕妄，聞有改土歸流之議，輒思蠢動。錫良先派員詢察，曉以利害，並令應襲各土司迅辦承襲，以安其心。刁安仁聞而畏感，遣其弟至，痛哭自陳改悔，邊境得以無事。宣統元年，授欽差大臣，調東三省總督。東省自日俄戰罷，俄佔北邊，日踞南境，局勢日危。錫良蒞任，即疏陳東三省逼遼京畿，關係大局，遼東租借之約，十三年即滿期，請朝廷主持。上下一心，以天下全力赴之，以贖回遼東半島爲歸。否則枝枝節節爲之，恐其不能及也。疏入不省。錫良又以東三省兩隣分據，非修大支幹路，不足以貫串脈絡。因擬修錦州至環瑋鐵路，願須橫貫南滿東清，必非日俄所願。尤非密借強國外款，不能取均勢而策進行。適美國財團代表遊歷來奉，遂與密訂借款包修草約，三日議定，電奏請旨，速正式

簽定。即日俄再爭。已落後着。乃部議梗緩。復機事不密。事竟報罷。及日俄協約。東事益急。錫良以救亡興政均非款莫辦。再請商借二千萬兩。以千萬設銀行。其餘半以移民興墾。半以開礦築路。仍不省。錫良慮東省危急情形。朝廷尚未深悉。乃請入覲。而陳時醇親王監國攝政。籌備立憲。廷議方注重集權。錫良先疏請實行憲法。歷陳立憲精神。在貴賤上下胥受治於法律。先革其自私自利之心。若敷衍掎克。似是而非。財力凋敝。人心渙漓。九年立憲。終恐爲波斯之續。又以近年重臣親貴出洋考察。徒飾觀聽。見輕外人。疏請停派。並慎選親貴。實行留學。再疏諫中央集權。以爲朝廷分寄事權於督撫。猶督撫分寄事權於州縣。無州縣即督撫不能治一省。如必欲以數部臣之心思才力。統治二十二行省。則疆吏咸爲贅旒。風氣所趨。軍民解體。設有緩急。中央既耳目不及。外省則呼應不靈。爲患實大。均不報。至是入都。而陳監國語尤切直。不省如故。告罷又不允。其時朝鮮爲日併。錫良以事勢益迫。欲固民心。先厚民力。當以防匪爲名。設立清鄉局。籌備預備巡警。部以兵法。實即民兵。奉人慮患思痛。爭先應募。期年得數萬人。全省皆兵。未幾防疫事起。疫起俄境。沿東清鐵路逐處傳染。未浹旬蔓延吉黑三省。俄日羣思干涉。錫良以防疫純屬內政。嚴起防治。三月而疫絕。十一國醫士來奉考察。開萬國鼠疫研究會於省署。錫良主議。咸起頌之。錫良督東。嚴吏治。肅軍制。清理財政。整頓鹽務。籌辦八旗生計。

頗著成績。唯目賂內憂外患日危一日。顧所以爲東邊計者。既多未如志。而朝政日非。民心日去。又無以挽救。屢稱病乞罷。三年始允解任調理。武昌變作。召入覲。廷議本以錫良赴山陝督師。並請獨領一軍衛京畿。顧有人碁之。乃改授熱河都統。力疾赴任。遜位詔下。以病勢難支。乞罷。允之。臥病六年。堅拒醫藥。卒年六十有六。諡文誠。錫良性清剛。自官牧令。即挺立無所倚。嫉惡嚴。所莅止遇不職官吏。劾治不少恤。非義之財一介不取。於權貴尤一無饋遺。故遇事動相牽制云。

附 錄

清代河督任卸年表

楊方興 順治元年七月至十四年五月任河道總督

朱之錫 順治十四年七月至康熙五年二月任河道總督

楊茂勳 順治十六年十二月至十七年六月署河道總督 康熙五年十一月至八年九月任河道總督

白色純 順治十七年六月署河道總督

苗 澄 順治十七年七月代署河道總督

盧崇峻 康熙五年三月任河道總督

羅 多 康熙八年十月至十年二月任河道總督

王光裕 康熙十年二月至十六年二月任河道總督

靳 輔 康熙十六年二月至二十七年三月任河道總督 康熙三十一年二月至十一月任河道總督

王新命 康熙二十七年三月至三十一年二月任河道總督

董 訥 康熙三十一年署河道總督

于成龍 康熙三十一年十二月至三十四年八月任河道總督 康熙三十七年至三十九年三月任河道總督

董安國 康熙三十四年八月至三十七年十一月任河道總督

徐廷璽 康熙三十九年署河道總督

張鵬翮 康熙三十九年至四十七年十月任河道總督

趙世顯 康熙四十七年十一月至六十年十一月任河道總督

陳鵬年 康熙六十年至雍正元年正月任河道總督

齊蘇勒 雍正元年至七年二月任河道總督

稽曾筠 雍正二年閏四月至七年三月任河南副總河 雍正七年三月至八年四月任東河總督 雍正八年四月至十三年任南河總督

尹繼善 雍正六年四月協理江南河務 雍正七年二月署河道總督 乾隆十八年至二十年任南河總督

孔毓珣 雍正七年三月至八年四月任南河總督

朱 藻 雍正八年協理河務 雍正九年十二月任東河總督 雍正十二年任北河總督 乾隆三年正月至九月任北河總督

田文鏡 雍正八年署東河總督

沈廷正 雍正八年八月至九年九月任東河總督 雍正九年九月至十年二月任北河總督

劉於義 雍正八年十二月至九年任北河總督



高斌 雍正九年九月至十年三月任東河副總河 雍正十一年十二月至乾隆六年八月任南河總督 乾隆六年至十二年兼理北河總督 乾隆十三年至十八年八月任南河總督

孫國璽 雍正十年至同年十一月任東河副總河

阿蘭泰 雍正十年十一月至十二年十二月任東河副總河

王朝恩 雍正十年至十一年八月任北河總督

顧琮 雍正十一年至十二年十二月任北河總督 乾隆二年八月署北河總督 乾隆三年改協理 乾隆三年至六年八月任北河總督 乾隆十一年署南河總督 乾隆十三年至十九年三月任東河總督 乾隆三年

白鍾山 雍正十二年七月至十二月任南河副總河 雍正十二年至乾隆七年十二月任東河總督 乾隆七年至十一年閏三月任南河總督 乾隆十八年至十九年協理南河 乾隆十九年至二十二年正月任東河總督 乾隆二十二年正月至二十六年三月任南河總督

劉勳 雍正十二年至雍正十三年任東河副總河 雍正十三年十月至乾隆二年七月任北河總督

劉永澄 雍正十三年至乾隆元年任南河副總河

德爾敏 乾隆元年任南河副總河

完顏偉 乾隆六年二月任南河副總河 乾隆六年至七年十二月任南河總督 乾隆七年十二月至十三年三月任東河總督

周學健 乾隆十一年九月至十三年閏七月任南河總督

那蘇圖 乾隆十二年任北河總督

方觀承 乾隆十五年任北河總督

張師載 乾隆十五年至十八年七月協辦江南河務 乾隆二十二年正月至二十八年十一月任東河總督

策 楞 乾隆十八年至同年九月署南河總督

富勒赫 乾隆十九年至二十一年十月任南河總督

劉統勳 乾隆二十一年署南河總督

愛必達 乾隆二十一年十月至二十二年正月任南河總督

稽 璜 乾隆二十二年正月至二十三年三月任南河副總河 乾隆三十二年九月任東河總督

高 晉 乾隆二十三年協理江南河務 乾隆二十六年至三十年四月任南河總督

葉存仁 乾隆二十八年至二十九年六月任東河總督

李 宏 乾隆二十九年三月任東河總督 乾隆三十年至三十六年八月任南河總督

李清時 乾隆三十年至三十二年七月任東河總督

吳嗣爵 乾隆三十三年至三十六年任東河總督 乾隆三十六年至四十一年三月任南河總督

楊廷璋 乾隆三十三年至三十六年十月兼北河總督

姚立德 乾隆三十六年八月至四十四年四月任東河總督

周元理 乾隆三十六年至四十四年三月兼北河總督

薩 載 乾隆四十一年至四十四年正月任南河總督

袁守侗 乾隆四十四年至同年十二月任東河總督 乾隆四十四年至四十六年十一月任北河總督 乾隆四十七年至四十八年五月兼署北河總督

李奉翰 乾隆四十四年至四十五年二月任南河總督 乾隆四十五年二月至四十六年正月任東河總督 乾隆四十六年正月至五十四年三月任南河總督 乾隆五十四年三月至嘉慶二年九月任東河總督 乾隆

陳輝祖 乾隆四十四年至四十五年二月任東河總督 乾隆四十五年二月至四十六年正月任南河總督

楊景素 乾隆四十四年三月兼北河總督

國 泰 乾隆四十五年八月兼署東河總督

韓 鏞 乾隆四十六年至四十七年七月任東河總督 乾隆五十五年六月幫辦南河河務

鄭大進 乾隆四十六年至四十七年十月兼北河總督

何裕城 乾隆四十七年至四十八年三月任東河總督

蘭第錫 乾隆四十八年至五十四年二月任東河總督 乾隆五十四年三月至嘉慶二年十二月任南河總督

劉 峨 乾隆四十八年至五十五年二月任北河總督

康 崧田 乾隆五十四年署南河總督 嘉慶元年幫辦南河工程 嘉慶二年至同年十二月任東河總督 嘉慶二

梁肯堂 乾隆五十五年五月至六十年任北河總督

司馬駒 嘉慶二年至四年三月任東河總督

吳 璉

嘉慶三年至五年二月任東河總督 嘉慶五年二月至九年十二月任南河總督 嘉慶十一年至十三年六月任東河總督 嘉慶十三年至十五年八月任南河總督 嘉慶十九年至二十年正月任東河總督 嘉慶二十五署東河總督

王秉韜

嘉慶五年至七年七月任東河總督

稽承志

嘉慶七年八月至九年四月任東河總督

徐 端

嘉慶九年至十一年任南河總督 嘉慶九年至同年十二月署東河總督 嘉慶十一年六月至十三年三月任南河副總河 嘉慶十三年至同年十二月署南河總督 嘉慶十四年至十五年八月任南河副總河 嘉慶十五年七月任南河總督

李亨特

嘉慶九年至十一年四月任東河總督 嘉慶十五年至十八年九月任東河總督

戴均元

嘉慶十一年六月至十三年三月任南河總督 嘉慶十八年至十九年正月任東河總督

那彥成

嘉慶十三年至十四年正月任南河副總河

馬慧裕

嘉慶十三年至十四年七月任東河總督

陳鳳翔

嘉慶十四年至十五年十二月任東河總督 嘉慶十五年至十七年八月任南河總督

蔣攸鈺

嘉慶十五年十一月任南河總督

吉 倫

嘉慶十五年署東河總督

黎世序

嘉慶十七年至道光四年二月任南河總督

初彭齡 嘉慶十七年署南河總督

李鴻賓 嘉慶十九年五月至二十年正月任東河副總河 嘉慶二十年至同年五月任東河總督 嘉慶二十四年  
至同年十月任東河總督

李逢亨 嘉慶二十年至二十一年十一月任東河總督

葉觀潮 嘉慶二十一年至二十四年八月任東河總督 嘉慶二十四年十月至二十五年三月任東河總督

張文浩 嘉慶二十五年至道光元年七月署東河總督 道光四年至同年十一月任南河總督

姚祖同 道光元年署東河總督

嚴 煥 道光元年至四年十一月任東河總督 道光四年至六年三月任南河總督 道光六年三月至道光十一  
年十月任東河總督

張 井 道光四年至六年三月任東河總督 道光六年三月至十三年三月任南河總督 道光十三年暫署南河  
總督

潘錫恩 道光六年四月至九年四月任南河副總河 道光二十二年至二十八年九月任南河總督

林則徐 道光十一年至十二年二月任東河總督

吳邦慶 道光十二年至十五年五月任東河總督

麟 慶 道光十三年至二十二年九月任南河總督

栗毓美 道光十五年至二十年二月任東河總督

鍾 祥 道光十五年署東河總督 道光二十三年至二十九年四月任東河總督

文冲 道光二十年至二十一年任東河總督

朱襄 道光二十一年任東河總督

王鼎 道光二十一年署東河總督

慧成 道光二十二年九月至二十三年七月任東河總督 咸豐二年至同年十月任東河總督

楊以增 道光二十八年至咸豐六年正月任南河總督

李星沅 道光二十八年署南河總督

徐澤醇 道光二十九年署東河總督

顏以煜 道光二十九年至咸豐二年六月任東河總督

陸應燾 咸豐二年署東河總督

福濟 咸豐二年至三年三月任東河總督

長臻 咸豐三年四月至五年五月任東河總督

李鈞 咸豐五年七月至九年三月任東河總督

蔣啓敷 咸豐五年署東河總督

庚長 咸豐六年至十年五月任南河總督

邵 燦 咸豐六年兼署南河總督

黃贊湯 咸豐九年至同治元年七月任東河總督

瑛 燦 咸豐九年署東河總督

王夢齡 咸豐十年兼署南河總督

譚廷襄 同治元年八月至三年七月任東河總督

鄭敦謹 同治三年十月至四年四月任東河總督

張之萬 同治四年四月至五年八月任東河總督

蘇廷魁 同治五年九月至十年八月任東河總督

喬松年 同治十年十一月至光緒元年二月任東河總督

錢鼎銘 光緒元年二月兼任東河總督

曾國荃 光緒元年四月至二年八月任東河總督

李鶴年 光緒二年至七年八月任東河總督 光緒十三年至十四年七月任東河總督

勒方鈞 光緒七年任東河總督

梅啓照 光緒七年至九年二月任東河總督

慶裕 光緒九年至同年十二月任東河總督

成孚 光緒九年至十三年九月任東河總督

李鴻藻 光緒十四年暫署東河總督

吳大澂 光緒十四年至十六年二月任東河總督

倪文蔚 光緒十六年署東河總督

許振禕 光緒十六年至二十一年十二月任東河總督

裕寬 光緒十九年兼署東河總督

劉樹堂 光緒二十一年兼署東河總督

任道鎔 光緒二十二年正月至二十四年七月任東河總督 光緒二十四年九月至二十七年四月任東河總督

裕長 光緒二十五年兼署東河總督 光緒二十六年兼署東河總督

錫良 光緒二十七年至二十八年正月任東河總督



# 清代河臣傳補遺目次

鍾祥

清史列傳

朱襄

蕪湖縣志

王鼎

清史稿

李星沅

同上

蔣啟勳

碑傳集補(節)

倪文蔚

清史列傳

清代河臣傳 補遺目次

二二〇

清代河臣傳補遺

鍾祥

鍾祥楊氏。漢軍鑲黃旗人。嘉慶十三年進士。歸部銓選。二十一年選授浙江龍泉縣知縣。二十五年調山陰縣知縣。道光元年陞嘉興府乍浦同知。旋丁父憂回旗。三年服闋。捐陞知府。分發湖北。以親老告近。改掣山東。四年奏補濟南府知府。六年七月擢兗沂曹濟道。十一月擢山東按察使。七年遷山東布政使。九年丁母憂回旗。十年命署理雲南布政使。十一年五月服闋。實授。十二月調江西布政使。十二年九月授山東巡撫。十一月祭獲南河空隄首犯陳瑞之。袁雙觀奏辦如律。十二月以曹州府知府王廷濬曹縣知縣秦錫九千總花應春等緝捕不力。奏請分別撤任。摘頂示懲。上諭之。十三年二月遵旨籌議給事中渥克精阿奏各省倉庫虧缺。一懸款。東省舊案懸款以各官養廉二成分年扣補。新案交代。絲毫顆粒均期滴歸源。不必再議提補。一攤款。凡動支之款果係歷辦成案舊有名目者。酌令照案攤辦。儻事係新爲。變易名目。不准流攤。必分依限歸補。一捐款。事屬公需。方准捐辦。但可截止者。即當減除。務須籌捐者亦當撙節。惟通融之法。一時之宜。未便明定章程。轉致日久生弊。一倉穀。東省見辦州縣交代均

不准作價流交。委員盤驗，取其實存在倉印結。至從前賑糶出借及參案報虧，均應買補。如州縣政將倉穀私用私糶，一經查出，嚴參懲辦。得旨：依議。癸亥行。九月，請將參革長清縣知縣李應曾任內應領採買截漕腳價餘款四千七百餘兩發商生息，以爲充登曹三鎮隨時修理要械之用。並請派買倉穀，以重儲備。允之。十二月，奏裁堂邑縣永通開閘官。十四年，訪拏鄉試包攬傳遞之候補守備馬德俊等革職審究。奏入。上嘉其查拏認真。十五年二月，借東河河道總督吳邦慶奏請於捕河廳屬之壽東汛加築土隄，以利漕運。三月，以濟南東昌武定等府秋成歉薄，青黃不接，糧價增昂，請將奉天進口糧船暫免輸稅，以恤民艱。並從之。六月，奏歷城等三十五州縣二麥被旱，請分別緩徵。八月，因本年麥收歉薄，奏請將章邱等二十三州縣應收麥石改收粟米，俱允所請。十月，疏請於省城添建義倉，以補常平不足。略言東省常平倉穀動缺已多，買補必俟豐年，且一時亦難驟買如額。見在倡率捐廉，於省城添蓋倉房，分爲四廠。自道光十四年始，巡撫與司道府按年捐輸，以二百石爲率。州縣之力能捐者，祇令百石至二百石而止。每年可得穀一萬數千石。近省城者，俱交本色。稍遠者，按每石一兩三錢折交司庫。遇歲歉價昂，無論遠近，均即折交。俟價平時，由司委員照常價購買，以備災賑。再於兗州曹州繁要之區，以次酌量建倉捐儲，輔常平而濟民食。得旨：此舉甚好。要在妥實二字。勉之。尋兼署河東河

道總督奏言鄒平等三十七州縣衛得雨較遲。嗣又被水被蟲。收成歉薄。請分別緩徵。如所請行。十六年四月勘明恩縣等處境內四女寺支河壩工。奏請援案發帑辦理。下部議行。又奏益都等四十六州縣均未豐收。請緩徵以紓民力。允之。七月擢閩浙總督。十七年正月京察屆期。諭曰。閩浙總督鍾祥精明沉細。務常清慎持躬。公勤莅事。朕將有厚望焉。尋議合巡洋而覈實稽考章程。奏請於閩省南洋九營除提標中營無庸添撥船隻外。其餘八營及北洋面營以次添撥哨船。無論南北巡船行至閩安鎮海口。俱令稟報總督。其南境哨船巡回之時。必過廈門。即令就近稟報提督。北境哨船巡回之時。必過福寧。即令就近稟報總兵。以憑稽察。庶官弁不致畏險偷安。亦不能捏飾混報。並咨行浙江一體辦理。得旨。所議并非有條。用心週到。可嘉之至。著照所請行。三月偕福建巡撫魏元烺籌辦查夾帶私鑄並勒限收繳情形。奏稱閩省實福局久撤。尙不慮有局私。惟奸商自外携來。或名砂壳。或係夷錢。在於毗連江西廣東一帶地方。攙使。亟應嚴行禁止。海船夾帶尤當嚴查。其海口島嶼。即無窩存私鑄。亦不可不豫爲防範。又民間攙用之弊。見均查禁。仍勒限給價解省銷毀。咨部以憑查覈。得旨。總在認真辦理。時御史王漢疏請查勘沿海港汊村莊。以清盜源。上命江浙閩廣各督撫妥議章程。五月偕浙江巡撫烏爾恭額福建巡撫魏元烺奏言閩浙洋面西南至廣東北至江蘇。島嶼林立。各按就近洋

面委員親查。今公同酌覈。謹列六條。一沿海港汊宜實力編查保甲。以靖盜源。一海口要隘及偏僻沙塗必稽查周到。俾無縱漏。一造報商漁出海船隻宜聯環保甲。不准出租。以杜影射。一水師巡洋宜遵新定合巡章程實力巡緝。一沿海各屬米石非奏明撥運。不准私載出洋。以杜接濟。一私藏槍礮軍火器械宜嚴行查禁收繳。從之。八月奏准裁撤福州糧捕通判缺。其所管督捕事務改歸捕防同知管理。十八年查辦延平建甯邵武汀州四府實匪。酌定防緝章程。責成延建邵道汀漳龍道率屬防緝。並於鄰省交界處所建設卡房。專派丁役盤查。奏入。諭曰。法在必行。勉力認真。毋忽。十九年五月赴泉州府校閱營伍。行寓印信被竊。自請從重懲處。下部嚴議。尋議褫職。諭曰。總督統轄兼圻。責任重而體制嚴。所用關防尤爲緊要。此次鍾祥赴泉州府屬閱伍講習武備。衆所觀瞻。宜如何外示嚴明。內存敬慎。關防係隨身攜帶之物。小心守護。並非照料難周。何至匪徒等蚤夜在其住屋偷竊。如入無人之境。儻查出。卽時人賊並獲。應行懲辦。尚可稍從寬宥。乃日久無獲。於該省吏治武備廢弛。已可概見。鍾祥著卽照部議革職。以示懲儆。二十年賞三品頂帶。授四川布政使。二十二年召來京。以三四品京堂候補。二十三年四月賞頭等侍衛。充庫倫辦事大臣。閏七月授河東河道總督。二十四年正月以壩工掃段遭風墊動。未能先事預籌。自請治罪。上以鍾祥到任未久。予革職。給七品頂帶。暫留河督之任。

將來興舉大工，即責成鍾祥偕河南巡撫鄂順安督辦。三月撥勘上年中河漫口以後，上游四廳長隄均形單薄，請將隄堰壩工擇要興修，估需銀兩，則由豫省動撥。如所請行，七月諭曰：頻年軍餉河工一時並集，正供所入不無支絀之虞。儻此次大工可緩至明歲秋間再行辦理，諸事益當順手。鍾祥鄂順安受恩深重，具有天良，著即密籌全局，據實直陳，旋偕鄂順安覆奏密籌中牟大工，勢難緩辦，得旨：趕緊修築。鍾祥鄂順安辦理大工，責無旁貸，惟當相度機宜，實心經理，於慎重之中力求安速，固不可草率從事，尤不可遷延遲玩，坐失事機。二十五年正月奏言全河大溜悉歸故道，暢達東趨，並將善後工程督令道廳節慎估計。豫籌防堵，上以鍾祥鄂順安經理得宜，迅速歲事，賞還鍾祥二品頂帶並賞戴花翎。八月請預提下年防險銀兩，諭曰：豫東河工採辦碎石銀兩，年年預提，甚屬不合。此次姑允所請，准其預提丙午年例撥銀兩，嗣後仍當按例採辦，不准再行預提。二十七年議請嗣後估辦土工，以三成錢文搭放。計豫東黃河每年估修土工以三十五萬兩為率，每年可搭錢十五萬串。報聞，二十九年二月疏稱沛縣賽堰工程為運道所經，關係甚重，請仍歸江南省民辦。諭曰：該處切近十字河，如遇水漲噴著，鍾祥責成洳河同知隨時實力搶撈，惟常不分畛域，任怨任勞，求於公事有濟。三月偕河南巡撫潘鐸山東巡撫徐澤醇遵議裁併冗缺，請將山東運河道屬之泉河通判河南開歸道屬之

歸河通判併歸河營協辦。守備各缺一併裁撤。以歸簡易。如所議行。四月卒。子德振錫振。均候補主事。

朱 襄

朱襄原名一貫。字雲溪。又號唯齋。安徽蕪湖人。由優貢登嘉慶己卯賢書。庚辰聯捷成進士。授編修。督學河南。選拔真才。培植寒賤。時論美之。仁宗召詢宋儒道學。襄以周程濬源。張邵旁出。游謝衍流。惟朱子獨得其大。條對詳明。欽賜學粹性天獅紐晶章。用褒稽古精微之意。歷官文淵閣校理。清秘室幫辦。咸安宮總裁。翰林院侍讀。簡放淮海河務兵備道。常鎮通海兵備道。徐州河務兵備道。時欽差大臣石麟深奇其才。封章入告。道光十三年。欽差河南查辦事務大臣。所至有聲。署江蘇按察使。平反冤獄甚多。洵擢兵部右侍郎。總督東河。安瀾著績。疊荷恩榮。錫以福壽匾額。玉如意等件。在工事無鉅細。必身親之。積勞卒官。年五十有一。遺摺奏聞。特旨賜祭。并治喪銀兩。以示篤念。蠶臣之意。生平著作甚多。有祿餘堂文集行世。

王 鼎



王鼎字定九，陝西蒲城人。少貧，力學尚氣節。赴禮部試，至京。大學士王杰與同族，欲致之不就。杰曰：「觀子品概，他日名位必繼吾後。」嘉慶元年成進士，選庶吉士。丁母憂，服除授編修。兩以大考升擢，累遷內閣學士。十九年授工部侍郎。仁宗諭曰：「朕向不知汝，亦無人保薦，因闕大考考差文字，知汝學問，屢次召見奏對，知汝品行，汝是朕特達之知。」調吏部，兼署戶部、刑部。二十三年兼管順天府尹事。復諭曰：「朕初意授汝督撫，今管順天府尹，猶外任也。且留汝在京，以備差往各省查辦事件。自是數奉使出按事鞫獄。」二十四年調刑部，又調戶部。道光二年，河南饑工奏銷不實，解巡撫姚祖同任，命鼎偕侍郎玉麟往按。督署巡撫疏陳儀工用款，至辦奏銷與部例成規不符，乃以歷辦物料土方價值合之豫省成規，互相增減。於糶料引河等款增銷一百三十萬，夫工麻斤各款減銷一百三十萬，雖有通融銀數，仍歸實用。惟八子錢一款，以銀易錢，多於舊價，每兩提八十文充入經費。而於各員應繳之銀一併扣算，實違定制。疏入，命覈實報銷。而薄譴祖同。是年擢左都御史，父憂歸。五年服闋，以一品銜署戶部侍郎，授軍機大臣。浙江德清徐倪氏因姦謀斃徐蔡氏，獄三年不決。按察使王維詢因自盡，巡撫程含章與按察使祁瑋鞠之，甫得情而犯婦在監自縊。宣宗特命鼎典鄉試，就治其獄，廉得徐故富家，以獄破其產。官吏多受賄，勾結賸庇，致獄情譎幻，悉發其覆。寘之法。浙人稱頌焉。六年授戶部尚書。八年回

鹽平以贊畫功加太子太保。繪像紫光閣。慮鹽積疲。商累日重。命鼎偕侍郎敬徵察辦。議以鹽務首重年清年款。先將節年帶徵釐剔。見年正款不難按數清完。道光二年以前未完銀九百餘萬爲舊欠。三年以後未完銀爲新欠。緩舊徵新。請以堰工加價二文。半解部充公。半抵完商欠。新欠抵完。續抵舊欠。蘆商生息帑本內直隸水利趙北口兩項。非經費歲需。請停利三年。限滿加一倍利。本息同徵。舊有拔繳水利帑本一百十七萬兩。請停徵三年。自道光十一年起歲徵十萬兩。五萬完舊本。五萬完新本。以恤商力。近年商力疲乏。不能預買生鹽存坨。新鹽多滯。耗請每包加鹽十三斤。俾資貼補。從此款目既清。庶經久可行。又請免繳嘉慶十七年加價交官半文未完銀一百八十四萬餘兩。疏入。並允行。十年蘆商呈請調劑。復命鼎及侍郎寶興往按。鼎以前次清查。傳集各商詳詢定議。皆稱可免虧累積壓。雖因銀價漸昂。尙不致遽形虧折。遂議駁。時淮鹽尤敝。兩江總督陶澍疏陳積弊情形。命鼎偕寶興會同籌議。中外論鹽事者多主就場徵稅。疏言詳覈淮綱全局。若改課歸場。尙多窒礙。惟有就舊章大加釐剔。使射利者無可借端。欠課者無可藉口。似較有往轍可循。擬定章程十五條。曰裁浮費。減窩價。刪繁文。慎出納。裁商總。覈滯銷。緩積欠。恤竈丁。給船價。究淹釣。疏運道。添岸店。敬輪規。飭紀綱。收竈鹽。又請裁撤兩淮鹽政。改歸總督辦理。以一事權。並詔允行。陶澍得銳意興革。淮綱自此漸振。鼎之

力也。十一年署直隸總督。十二年管理刑部事務。十五年協辦大學士。仍管刑部。直上書房。十八年拜東閣大學士。二十年加太子太保。二十一年夏。河決祥符。命偕侍郎慧成往治之。尋署河督。議者以水勢方張。不宜遽塞。請遷省城以避其衝。鼎持不可。疏言。河灌歸德陳州及安徽毫穎。合淮東注洪澤湖。湖底日受淤。萬一宣洩不及。高堰危。淮揚成巨浸。民其魚矣。無論舍舊址築新堤。數千里工費不貲。且自古無任黃水橫流之理。請飭戶部速具帑。期以冬春之交集事。不效。願執其咎。具陳民情。安土重遷。省垣可守狀。初至汴城。四面皆水。旦夕且圯。躬率吏卒巡護。獲無恙。洎工興。親駐工次。倦則寢肩輿中。次年二月工竣。用帑六百萬有奇。前此馬營工用一千二百餘萬。儀封工用四百七十五萬。原議以儀工爲率。及蒞事。加增百餘萬。然事艱於前。微鼎用節工速。不能如是。敍功晉太子太師。積勞成疾。命緩程回京。自禁烟事起。英吉利兵犯沿海。鼎力主戰。至和議將成。林則徐以罪譴。鼎憤甚。還朝爭之力。宣宗慰勞之。命休沐養病。越數日。自草遺疏。劾大學士穆彰阿誤國。閉戶自經。冀以尸諫。軍機章京陳孚恩。穆彰阿黨也。滅其疏。別具以聞。上疑其卒暴。命取原稿不得。於是優詔憫惜。贈太保。謚文恪。祀賢良祠。後陝西巡撫請祀鄉賢。特詔允之。鼎清操絕俗。生平不受請託。亦不請託於人。卒之日。家無餘資。子沆。道光二十年進士。翰林院編修。

### 李星沅

李星沅字石梧，湖南湘陰人。道光十二年進士，選庶吉士，授編修。十五年督廣東學政，粵士多健訟，檄道省籍諸生之干訟者，牒報調治之。士風以肅。任滿，授陝西漢中知府。歷河南糧道、陝西四川江蘇按察使。在川陝嚴治刀匪、囑匪，屢禽其魁，奠之法。遷江西布政使，調江蘇。二十二年擢陝西巡撫，署陝甘總督。二十五年調江蘇巡撫。二十六年擢雲貴總督，兼署雲南巡撫。先是永昌回亂，迤西道羅大池濫殺，不分良莠，衆回益擾。總督賀長齡提督張必祿急於主撫，降者輒復叛。至是緬甯匪首馬國海被勦亡走，潛結粵州回馬登霄海連升等復起事。迤西大震，星沅追論肇亂之由，長齡天池等並獲譴。二十七年遣兵進勦，解散被脅回衆，首逆就殲。餘匪肅清，詔嘉其功，加太子太保銜，賜花翎，尋調兩江總督。星沅未第時，客陶澍幕中，爲章奏，又歷官江南，習於鹽漕，河諸利弊時度支告匱，廷臣主南漕改徵折色，解部於北省採買，星沅謂折多徵收不易，折少採買不敷，殺賤銀貴，民間展轉虧折，且州縣藉端浮勒胥吏高下其手，防之皆難，迭疏論列，議遂寢。淮鹽自陶澍整頓之後，歷年又多積欠，星沅疏陳引鹽壅積課款支絀情形，揆厥所由，官以畏難而因仍，商以畏難而取巧，成本增於雜費，行銷滯於售私，年復一

年。幾同痼疾。先當以內清場。私外敵鄰。私爲急。則治標之計。本年回空糧。私奏請查禁。其川私粵私潞私浙私均咨行堵緝。又引船夾帶爲害最鉅。扼要搜查。於揚州仙女廟及江甯下關緝獲百餘萬斤。提省審辦。他如慎出納。提緩課。派懸引。刪繁文。配運殘引。提售新鹽。裁浮巡費。禁捏報淹銷。酌議章程八條。以圖整理。疏入。下部議行。舊制總督兼管河務。自道光二十二年後。停止。至是復命兼管。會兼署河督。疏請嚴禁聽員聚處清江。飭各歸工次。奏籌外海水師事宜。曰磨厲人才。曰變通營巡。曰覈實實哨。曰扼要堵緝。曰配兵足數。又請添造戰船。勸捐給獎。並允行。俄羅斯通商舊由陸路。忽有商船之上海。執約拒之。在任兩年。宣宗甚加倚任。因久病請解職回籍。尤之。三十年宣宗崩。赴京謁梓宮。復以母老陳請歸養。會廣西匪亂。方熾。起林則徐督師。卒於途。命星沅代爲欽差大臣。是年十二月抵廣西。駐柳州。時左右江匪氛蔓延。諸賊尤以桂平金田洪秀全爲最悍。巡撫鄭祖琛提督閔正鳳皆以貽誤黜去。周天爵向榮繼爲巡撫提督。二人者並有重名。負意氣。議輒相左。星沅調和之。仍不協。軍事多牽掣。咸豐元年春向榮進勦。賊由大黃江牛排嶺竄新墟紫荊山。星沅檄總兵秦定三李能臣率滇黔兵追蹙。賊復竄武宣。榮天爵各進擊。賊踞東鄉。兩軍攻之不克。星沅以事權不一。奏請特簡總統將軍督勦。詔斥其推諉。尋命大學士賽尙阿率衆兵達洪阿都統巴清赴湖南防堵。將以代之。賽尙阿至湖

南。遂授欽差大臣。赴廣西督師。命星沅回湖南治防。四月星沅力疾赴武宣前敵督戰。至則已  
憊甚。數日卒於軍。遺疏言賊不能平。不忠。養不能終。不孝。歿後殮以常服。用彭臣咎。文宗覽而  
哀之。依總督例賜卹。賜金治喪。存問其母子二人。命俟服闋引見。諡文恭。子桓。官至江西布政  
使。

蔣啓敷

蔣啓敷字明叔。號玉峯。廣西全州人。父勵常。乾隆丙午舉人。融縣訓導。啓敷早慧。九歲善屬文。  
十三試本州童子冠其軍。十五補博士弟子第一。學使者贈詩寵異之。公承訓導公之教。學賅  
體用。厥後起家爲循吏。爲勞臣。果不負所學云。嘉慶丙子舉於鄉。道光壬午成進士。以知縣銓  
發江西。權廣昌德興會昌。補新城。調贛縣。殺獲盜功。以知州升用。攝永豐。服除再補貴溪。調南  
昌。用卓薦擢定南廳同知。權義寧甯都二州。補南昌同知。權饒州廣信二郡。循捐米京倉格得  
知府銜。復循捐格得升道員。再署江西鹽法道。簡授河南河北兵備道。奉檄入大梁。主軍興供  
張。賊至。佐城守有功。賞戴花翎。加按察使銜。河帥卒。詔行河督事。坐河溢鐫秩。仍令自效。旋復  
原官。疾作。卒。陳橋工次。年六十有二。其官自縣令洊擢至監司。署東河河道總督。其階自通議

大夫至資政大夫。江右鄉關分校者二。監試者二。提調者一。公吏績多在江右。凡三至。農田水利學校教化。靡不舉。民尸而祝之。然其大者在識議與處置。卓絕過人。遠甚於贛。作贛郡利病書。言莠民有三。曰會匪盜賊鹽梟。三者急則合。緩則散。治之之法有四。曰寬處分。裕經費。聯保甲。興文學。大府聽其說。鄰邑龍南大姓廖李世爭山爲仇。令往封閉。以廖從李。憤投石。誤傷令。走白守請兵。公亟謁守曰。吏往足縛獻。不煩兵也。守曰孰可。則自請行。先使吏諷告之。皆投械。叩頭曰。惟命。至則鑿倡噪者六人。還圍村帖然。江右郭外歲冬設廠行糜粥。待貧者。人日給籩子。簞食。南昌新建二令主之。或請易錢。會湖北流民大至。府令復行粥。公請別議賑。不從。赴者至十二萬人。不能給。呼號踏藉。死者相枕。洶洶且入城。大吏議閉城授兵。公爭曰。是驅使亂也。請罷粥給錢。亟榜通衢。尅期分棚。如其言。乃定。漕之訐也。起於銀黃。道光丁未。臨川民聚城下。謹叟守令白請兵。中丞吳公遣公往。開城曉譬。平其忿納。民歡呼載道。明年樂川等邑相繼以漕事譁。貴溪尤甚。公適權廣信。但捕逮鼓衆者。餘不問。大吏咎其寬縱。吳公亦惑焉。或勸且勉。從。公曰。銀黃吏又持之急。官困民獨不困耶。奈何。遽曰爲畔逆。吾非市恩。亦不敢避責。然竟移公南昌。使讞長寧崇義會匪獄。吳公徐聞公言。大悟。以貴溪獄付公。僅論四人死。其會匪連坐亦得輕比。全活無算。此其尤磊落大者。他不勝書也。公號爲達於政。乃其兵事亦練。在江西扼

海關賊折北而走。在大梁。值故相琦善公充欽差大臣督師南下。調發供億。悉倚公倉卒無格。令一切辦治。已而逆賊由歸德犯大梁。撫軍他出。或謂公盍返任。公不可。借官吏乘隙。日夕拒守。賊氣奪走去。則率師次彰德。遏之。而河北聯莊會起。藉團練抗租賦。公進議曰。是非江石比。彼民困者宜恤。驟威以兵必變。此民悍宜懲。不懼以兵且亂。當事者不納。由是禍大熾。卒主用兵。公亦馳驅剿撫。乃得平。論者見公儒生。不意胆智開敏如是。成大驚異。最後受河事。連值洛洞。又窳度支。殆不可爲。咸豐甲寅。伏秋汛大漲。漂塚埽皆盡。公露坐堤上不去。僅一老兵侍。隄齧過半矣。比明。兵役復集。乃貸料於民。撻治三晝夜。隄卒完。次年權河督甫十日。夜大風。雨。蘭陽隄決。公馳奏自劾。上雖予諡。仍責後效。丙辰五月。河帥上公勤勞狀。詔復其職。公荷上寬仁。又念父子明國恩。益感憤。盡瘁宣防。其年六月。疾革。伏枕處。分皆治河事。惟以決口未塞爲憾。竟卒於工次。著有問梅軒詩文集。宦海一蠹。教士彙編。他論撰甚多。公政事緣飾儒雅。德興邑先儒余瀚父子從朱子游。舊志載理學。爲私憾者削去。公復補入之。浮梁金鄒二姓互詆其祖。公据新唐書。謂各爲其主。有功德於民一也。兩家悅而解。公居官治事一於誠。不知有禍福。處寮友上官係於怨。不知有嫌怨。事親孝。訓導公沒。廬墓三年。兄弟友愛無私財。置義莊。贍族。里黨待以舉火者數十家。葺家乘尤合史法。子六。長琦齡。道光庚子進士。翰林院編修。歷官



順天府府尹。次琦。沅州庠生。先公卒。次珣。候選同知。次珖。鹽提舉銜。候選通判。次琦鴻。早卒。次琦清。候選同知。

### 倪文蔚

倪文蔚。安徽望江人。咸豐二年進士。改翰林院庶吉士。三年散館。以主事用。籤分刑部。十一年。河南巡撫嚴樹森。駐師陳州。辟文蔚襄辦營務。時叛練苗沛霖覬覦汴梁。欲與汝捻合爲一氣。分黨王金奎。苗金開。由潁西竄入沈邱。突踞荆寨。官軍乘賊築壘未定。夾擊破之。賊趨項城。嚴樹森令文蔚率剛銳饒果等營馳援。與參將劉鳳岐。都司李永祿。力解城圍。陣斬僞軍師李鶴鳴等。馘千餘級。賊潰走。沈項一帶肅清。彼功加郎中銜。賞戴花翎。同治元年。嚴樹森爲湖北巡撫。疏調文蔚隨營帶兵。命發往湖北差遣委用。六年。丁祖母憂。七年。擒匪平。湖廣總督李鴻章。以文蔚在營出力。請量予超擢。得旨。刑部候補主事。倪文蔚始終兵事。未進一階。頗爲廉讓。可風。著加恩。以該部郎中即補。十年。二月。補官。九月。捐免歷俸。截取以知府用。十一年。授湖北荊州府知府。與修萬城大隄。光緒四年。以河南旱災。捐銀二千兩助振。河南巡撫涂宗瀛奏獎。以道員用。六年。四月。擢河南開歸陳許道。八月。擢廣東按察使。七年。閏七月。擢廣西布政使。八年。

正月陞巡撫。先是關外匪首陸之平勾結股匪，屢擾邊界，稔惡二十餘年。文蔚履任，即派兵追勦，擒斬之。又誅鬱林州匪首吳晚，大破其大竹根老巢，招撫覃思娣、李亞生等。九年九月調廣東巡撫。漸行疏劾廣西按察使國英、恍惚外謬，不勝監司之任。詔開國英缺。十二月以山東黃水爲災，倡捐賑銀十年。閏五月籌助湖北賑捐出力，均交部議敘。尋以內閣學士周德潤疏劾文蔚在廣西濫保廣東知府鄒觀臬，諭曰：鄒觀臬赴廣西查辦案件，綜計其往返程途日期，何能遠至關外，著有勞績，其爲徇私濫保，毫無疑義。著交部議處。尋議降二級調用上，加恩，改革職留任。八月法蘭西權釁，越南沿海戒嚴，上聞文蔚等曾銜示諭沿海居民措辭失當，傳旨申飭。十二年四月召來京，時文蔚已得疾，請開缺，回籍就醫。允之。命俟病痊後仍遵前旨來京。陞見十三年正月起病入覲，五月授河南巡撫。八月河決鄭州，文蔚以兼管河務，疏於防範，自請交部議處，得旨寬免。命妥籌賑撫。會同河道總督成孚將搶護堵築事宜趕緊籌辦。是月慈禧端佑康頤昭豫莊誠皇太后軫念災民，頒發內帑，交文蔚查明黃水經過被災地方，覈實散放。九月搶築東西壩，裹頭工竣，疏請籌款購料，以便盤築壩基。得旨：先由部庫撥銀一百萬兩，仍著戶部撥款接濟。該撫身任地方，亦屬責無旁貸。前因甫經到任，從寬免其議處。務當激發天良，同心協力，速歲要工。時黃沁兩河先後被淹，災區甚廣。文蔚飭屬勸募助賑，先捐廉銀爲倡。


以鄭州倉卒興工。士夫索價居奇。因招集災民設立工賑營。令總兵董明禮等分統之。奏調前山西布政使紹誠前山東按察使潘駿文令赴工。分司兩壩堵築。又調湖北道員陳建侯直隸州知州何嗣規綜覈款項。辦理工振。詔皆允之。先後命刑部左侍郎薛允升禮部尙書李鴻藻前往河南將見辦大工情形查奏。又起前河南巡撫李鶴年署理河東河道總督。十二月命李鴻藻督辦大工。會同文蔚迅籌堵合。十四年正月大壩開工。三月疏言鄭州自去冬興工。時日迫促。工程浩大。明知其棘手而不能不力任其難。如近壩沙解。取土寫遠。一難也。日計不足。必兼夜工。燈燭之光不能及遠。二難也。水集下游。州縣糶料由周家口水路運工。以輔路運之不及。逆流上駛。牽輓無路。三難也。前與李鴻藻李鶴年會商。用西洋鐵路土車以速運土。用電氣燈以速夜工。用小輪船沂江入淮。挖帶料船。以速運料。見在購備鐵路電燈運至工次安設。運土迅速。較之士夫推送。難易不啻倍蓰。電燈照耀有如白日。可以晝夜覆工。惟淮泗等河經黃流奔注。溜勢趨向無定。深淺靡常。試行小輪船時虞阻隔。見令多集民船。輻輳運送。尙能源源接濟。六月東壩共成二百四十七丈。西壩共成三百五十八丈。七月連挑水壩共成占六百餘丈。挑引河二千九百餘丈。功在垂成。卒以伏秋大汛驟至。金門束溜太急。突陷數占。而民間舊儲糶料已罄。新糶未收。暫議停工固守。上責李鶴年日久無功。褫職遣戍。文蔚革職留任。摘去

頂戴李鴻藻回京。八月御史劉綸襄燕起烈劾文蔚糜餉誤工等款。上令署河道總督吳大澂查奏。尋言文蔚以辦料委之州縣。係援照祥工成案辦理。該撫目擊河工待用情形。催趨未免過急。書差擾累並無確據。在工人員薪水亦係照案支銷。得旨免議。文蔚乃與吳大澂力持保守舊占之策。俟秋汛稍平。竭力接築。次第開放引河。以分水勢。十二月合龍。上嘉文蔚督飭在工員弁認真襄辦。使大工尅期告成。不負委任。開復革職留任處分。賞還頂戴。仍交部優敘。十六年正月兼署河道總督。三月交卸署任。即赴南陽校閱營伍。五月疾作回省。六月卒。布政使廖壽豐代遞遺疏。奏言文蔚自任河南巡撫。未及匝月。即值鄭州決口。其時司庫款項奇絀。籌工議賑。事煩費鉅。文蔚殫心擘畫。年餘之久。奔馳工次。酷暑嚴寒。不辭勞瘁。遂得帑料應手。功近垂成。忽遇伏汛中變。愈滋浮議。文蔚以一占之費動需萬金。已成之工守而勿失。與河臣吳大澂和衷商榷。霜清後次第接築。大工即慶合龍。各屬災黎幸免昏墊。而受病之由實基於此。迨賑務即蒞。凡地方善後。如興修水利。抽收釐稅。編查保甲。整頓營伍。諸大端。皆已釐定章程。次第修舉。近年江浙東皖等省水旱告災。尤能不分畛域。首先捐廉。續籌鉅款。協濟以故。豫災乞貸。各疆臣感其厚誼。皆有以報之。上年夏間染疫。因科場在邇。不俟假滿。即力疾銷假視事。嗣兼署學政。接辦文武兩闈。未敢一息暇逸。本年正月兼署河督。二月即出省。周歷南北兩岸。

查驗新舊工程。甫卸河篆。又復出省。校閱營伍。初抵南陽。即已攫疾。猶按營訓練。一切公事照常判覈。迨至旋省。病即不起。身後蕭然。殊堪憫惻。疏入。諭曰。河南巡撫倪文蔚。由部屬歷任道府。洊擢封沂。實力有年。克勤厥職。前因患病。賞假調理。茲聞溘逝。軫惜殊深。加恩著照巡撫例賜卹。任內一切處分悉予開復。應得卹典。該衙門查例具奏。尋賜祭葬。八月。河道總督許振禕疏言。文蔚忠清亮直。始終不渝。所在無表異矜奇之迹。而去後。每繫人思。任事無畏。難苟安之心。而功成常居退讓。鄭州一役。當時定謀發議。實抱孤忠。而憂憤積勞。其受病亦即在此。查文蔚前襄撫臣嚴樹森營務視師陳州。還過通許。捻匪猝至。文蔚慮通許城守單弱。回馬疾馳。與賊爭先至城下。僅而得入。百計助守。竟以擊退。城賴以全。迨嚴樹森撫湖北。與督臣官文奏調來營。相隨督師。所向皆捷。該撫臣贊襄之力居多。大學士曾國藩督兩江時。數稱其賢。招致幕府。以祖母年老辭。愈益重之。在江寧主講書院。多所成就。終養後。復隨李鴻章勦賊德州。計在軍營立功最久。而始終謙退。未進一階。捻匪既平。特旨賞郎中。補官截取。擢守荊州。在郡八年。百廢俱舉。萬城大隄。爲下游十數州縣屏障。長二百餘里。江流剽急。每遇盛漲。一塌輒數十丈。文蔚於濱江陡岸。砌爲坦坡。下列巨椿。上累大石。層層收築。上游自是無傾塌之患。沙市繁庶。就隄列肆。遷之則民悉重擾。仍之則隄不可加。乃因肆之廣狹。分植石柱。橫施插板。以備不虞。

前次荆江大水，恃此無恐。文蔚既周知隄之險要，而除其積弊，乃著萬城堤志，使後之莅事者有所法守。尋擢廣西巡撫，時積匪十餘股，久擾關外，抗拒官軍。文蔚勦撫並用，其經畫皆見諸奏牘。調撫廣東，自擊濱海居民貪沙山之利，築堤基與水爭地，故致汜濫，遂嚴申基圍之禁。至今頌之。及撫河南，到任匝月，河決鄭州，先是文蔚任開歸陳許道時，即以石家橋來童寨等處險工爲慮，議於廣武山，脚建壩挑溜，旋即去任，議不果行。人皆服其先見。方河決時，文蔚即以搶築裹頭爲第一要策，親歷災區，察看情形，議設鄭工總局賑撫總局，委員分設賑廠，拯救飢溺，安集流亡，當是時也，羣情惶惑，衆口沸騰，謂口門過寬，斷難合龍者十人而四五，謂黃流當徙，萬不可塞者十人而二三，老於河務者欲引中牟成例，擬請分年辦理，通籌大局者又欲先疏南河故道，然後堵此決口。文蔚力持定見，不爲衆說所淆，請款集料，一意塞決，又奏募工賑，營以工代賑，以杜土夫之居奇。於天津設轉運總局，於省會設官錢局，接濟不窮，以杜奸商之壓價。凡有益於工振者，無不纖悉圖之。伏念鄭州一役，前之不就，在與辦之太遲，後之速成，在舊占之克保。比吳大澂接續進築，和衷商辦，而計日程功矣。際此大災昏墊，而豫民不至流亡餓殍，荒政之善確有明徵，較之一意督工，尤有難者。疏入，諭曰：已故河南巡撫倪文蔚前以主事從戎，旋由知府擢封疆，歷任廣西廣東等省，除患安民，政聲卓著。其在河南巡撫任內，鄭

州一役督辦工賑事宜。尤能實力實心。不辭勞瘁。著將生平事實。直付國史館立傳。以彰蓋績。  
子世熙。花翎三品銜。戶部候補郎中。世讀。鹽提舉銜。候選通判。







運



洪防



溉灌



水給

建設總署



中國水利珍本叢書

第二輯 第二種

中華民國二十六年二月出版

清代河臣傳

汪胡楨編次  
吳慰祖

全二冊 實價二元

校對者 吳 慰 祖

句讀者 吳 慰 祖

印行者 中國水利工程學會  
(南京梅園新村三十號)

代售者 上海生活書店

南京正中書局

南京鷄鳴書屋

印刷者 東南印刷所

(南京洪武路二十五號)



777  
11644

中1178  
920.1/312.6

